






















JOSEPHO PRIMO  
AUGUSTISSIMI CÆSARIS  
LEOPOLDI FILIO  
IN  
ROMANI IMPERII REGEM  
ELECTO ET CORONATO

*VITAM, GLORIAM, FELICITATEM.*

uam Augustæ nuper ad hostilium Regionum terrorem, solatiumque patriæ, augusta Octovirorum Imperii Principum corona per coronam unanimi suffragio in Teos reclinavit humeros majestatem, tanta est; ut quia eidem paria afferre perquam arduum, gratulabundam à folio Tuoreverentiam, vel arcere, vel revocare TIMOR posset: nisi is, quo, ut omnibus tuis amabilem TE præstas, ita singulos quoque eorundem benignè complecteris, AMOR erigeret animos, & invitaret. Suavissimo proinde hoc illicio ut se vidit animatum, sic & piaculo se obnoxium credidisset is, quo AUGUSTISSIMÆ DOMUI lubentes obstringimur, affectus: nisi nos quoque, ubi orbis in plausus

sus abit universus , nostrum de gloria TuA sensum aliquo saltem festivæ gratulationis testimonio explicaremus. Hoc equidem & longè minus esse titulis , debitoque nostro , & multum infra eam , quâ felicibus auspiciis ornatus es , dignitatem , ipsi profitemur. Quia tamen de Regibus , & quidem Sanctis , est argumentum ; ut maximè Regium , & Regio affectu dignum ; sic & MAJESTATI TuÆ quàm accommodum , tam acceptum fore , confidimus. In Regio enim cùm Te paludamento , velut solem in Auroræ purpura exorientem veneramus ; aliud menti insinuat se nostræ indumentum ; de quo , & in quo , tanquam symbolo interna simul , & externa indolis præclaræ decora complexo , gloriæ TuÆ & nomini gratulemur. Splendidiorum siquidem ut elegantia vestimentorum corporis tum artuum , tum colorum symmetriâ eminentioris venustatem , etiam operiendo , clariorem reddit ; ita præstantior virtutum illustriorum ornatus animo ad magnanato , interiores etiam aperiendo dotes , gratiam addit omnino singularem. Vidit hoc utrumque , ac verò etiam suspexit oculatio electi quondam populi vetustas in JOSEPHO magno Magni Patriarchæ Jacobi filio : quando & vestis illi non vulgari arte contexta , & virtus industriâ præcellente concinnata spectantium addixit oculos , ac mentes. In tunica namque sua , quæ  
pri-

primum innocentiae florem in ætate adhuc tenera præstantiori formæ Sociatum commendabat; pulcherrimè prælusit eximio virtutum supremo etiam capite dignissimarum ornatui, quo in Ægyptio deinde folio clarissimus, & soli Regnum gubernantifecundus affulsit. Hujusigitur Principis non minùs omine, quàm nomine, memorandi POLYMITAM damus; quâ ut Paterna benevolentia adolescenti gratiosissimo gratiam auxit; sic DIVINA quoque PROVIDENTIA quasi typo præmonstravit sive dotes, sive laudes inter Sceptra quondam juveni enascituras. Erat enim vestis illa, ut symmachus, Vatablus, diversique sacrarum paginarum interpretes notavère, & artificioso liciorum contextu, & pulcherrimâ colorum sibi colludentium varietate, & elegantissimis acûs phrygiæ picturis, atque figuris ad singulare oculorum illicium elaborata. Translato autem ad sublimiora sensu, ut Rupertus ac Philo, & cum his alii Doctores voluère, multifor- mem Principis solertiam, prudentiã, virtutem, quâ conspicuos esse decet Rectores populorum, symbolica velut imago quàm scitissimè referebat, memoriæque commendabat. Et verò eâ felicitate respondit res figuræ in clarissimo Memphitici postmodum Regni fidere; ut vaticinium certissima veritate nixum, eidemque POLYMITÆ meliùs, quàm cortinæ Delphicæ, intextum fuisse vi-



deretur. Ubi enim factus & ipse Vates, in Sceptri focium assumptus est à Pharaone; tantâ illico solertiâ, tantâ prudentiâ, tantâ virtute Regiones, quibus præerat, omnes & implevit, & recreavit; ut quasi capiendis ejusmodi laudibus angustiores forent, ad exteras quoque nationes, accrescente nomini gloriâ, easdem evulgarent. Jucundissima verò tantiplausus recordatio cùm digito, SERENISSIME REX, intento ætatis Tuæ, indolisque florem & nomini respondentem, & summa quæque promittentem proponit oculis; animos quoque eâ, quâ par est, sinceritate addictos TIBI, confirmat in spe de TE concepta: fore, ut & Tuæ MAJESTATI tum felicitas, tum gloria, cum virtutis incremento identidē amplificentur. Rem in fronte libelli hujus expressam ære, velut in compendio inspice. Excubat in cœli atriis DIVINA PROVIDENTIA, quidquid splendidum, magnificumque divite concludit orbis gremio, in Regiū hujus ornatūs Majestatem ordinatura. Hujus imperio coronarum vetustas ad Vulcani resolvitur incendia; ut nova inde auri fila Regio accessura splendori venusta glomeret Pandora. Exspoliât studiosa Charitum trias pretiosas bombycum exuvias, quarum incolæ suo soluti ovo, veluti tot coronati honoris Tui præcones, per æreas regiones innocuis applaudunt alis. Affundunt Napææ selectas Veris delicias: ut amœnâ  
flo.



florum gratiâ gratiæ ferviant augendæ ; felicitatemque Tuam perpetuo flore perennaturam augurentur. Complures Oreadum turba defert adamantes: ut , dum nobiliore gemmarum sorte MAJESTATEM Tuam extollere nititur ; Martium, & vinci, frangi que nescium tibi robur advoveat. Sed & peregrinæ Euxino etiam è ponto Nymphæ sua ambiunt honori sacrare Tuo munera : dum propinant fœcunda Margaritis conchylia : sive ut pretium adjiciant operi ; sive ut futurum TE sibi Dominum deposcant , ac venerentur. Deferuntur autem hæc Minervæ ad elaborandam GLORIÆ Tuæ POLYMITAM artem suam exerenti ; & ne quid invidiæ virus afferre possit impedimenti , devictam sub pedibus Arachnen triumphanti. Ubi & porta respicit portam. Unde coronæ TIBI veterum plures, ut optamus, & speramus, accessuræ, & lauri oleis respondent : ut & virtus , & gloria Tua ab Occidente in Orientem, ad solatia tuorum, & publica Orbis emolumenta , tam bello , quàm pace proferatur.

In hac igitur POLYMITA , ut mentem nostram aperiamus ; brevi obsequiosæ gratulationis compendio exhibemus VIRTUTES REGIAS : quas hæreditario velut jure, indoli que infitas accepisti, Materno cum lacte imbibisti, in consortio Augustissimo folerter addidicisti, industriâ ætatem superante nutritivisti ; ac demum gratiâ de cœlis ad futu-

futurâ perduces ad coronidem , feliciterque coronabis , ut felicius inde coroneris. Duodenos MAJESTATI TUÆ proponimus REGES non tantû rebus præclarè gestis insignes , verûm etiam electos è multis , etiam optimis , imò & sanctorum ALBO Sententiâ Vaticanæ Sedis insertos , præterea verò etiam , si non omnes , potiore saltem numero , AUGUSTISSIMI SANGUINIS Tui confortione claros , atque adeò ut Tuos , sic vel maximè imitandos. Horum autem vitam , dum succincto tantûm stylo non tam describimus , quàm reteximus ; potiores quidem , quibus excelluere , laudes memorantur ; singulæ tamen in singulis eminentiores , velut è coetu se vocatæ , statuuntur in alto ; ut harum duodenâ ritè collatâ , quam volumus , emicet virtutum Regiarum Symmetria in unum , absolutumque ornatum animi coronis nati concinnata.

Cujus quidem duodenæ præstantiam ubi adjecta Symbola , encomiaque sub involucro paucis explicant ; clarissima CORONATORUM CAPITUM exempla multis , & apertè commendant : ut nempe REGIA MULTORUM VIRTUS RENOVETUR IN UNO. Neque verò aut fatum tulit hoc , aut casus , ut numero duodenario rem centenario & majorem , & graviolem definiremus. Imò etiam fausti in argumentum ominis hunc Regiarum virtutum , idearumque numerum totidem , quorum

Ca-

Caput es , Regna suasisse , ætatis Tuæ anni postu-  
lâsse , ipsumque cœlum , velut oraculo , suggestis-  
se videbitur eundem penitiùs , & accuratiùs inspe-  
cturo. Siquidem hic ipse numerus est olim Jovi ,  
supremo scilicet Regi , dicatus à veteribus ; eò ,  
quòd ejusdem potestate , atque gubernatione  
crederent solis cursum duodecim mensium in-  
tervallo , totidemque Zodiaci signorum trans-  
itu , in communia mundi commoda , felicissi-  
mo quasi circulo circumscriptum. Ut vel ideo  
tum auspicatus , tum Regius haberetur ; quia Di-  
vinus , ac SUMMÆ NUMINIS MAXIMI PROVI-  
DENTIÆ in orbis moderatione cum primis usita-  
tus. Unde & AUGUSTUS CÆSAR animo , ut e-  
rat , liberaliore lætus , hoc ipso numero convi-  
vas adhibuit Deorum , Dearumque personam  
sustinentes ; ut vel hac ratione propitium Impe-  
rio suo Cœlum redderet , Fortunamque faven-  
tem devinceret. Verùm , ne commentis fabu-  
las redolentibus niti spes nostra videatur : DEUS  
ipse electum sibi populum duodecim tribubus di-  
stinxit ; post duodecim in deserto stationes , la-  
tis legibus instruxit ; duodecim in Elim & fon-  
tium , & palmarum inventione recreavit. Sed  
& APOSTOLOS , futuros nempe FILII SUI per  
orbem LEGATOS , primos item Sacræ reipubli-  
cæ PRINCIPES , venturique demum JUDICIS

ASSESSORES, in Sedibus eodem numero constitutis collocandos, nec plures, nec pauciores voluit esse duodenis. Denique gemmea supernæ, æternæque Civitatis fundamenta, stadia murorum longitudinem circumscribentia, portas eorum ambitum interstinguentes, ANGELOS iisdem assistentes, milliaque Signatorum illic INDIGETUM duodenario hoc numero sapientissimè, sanctissimèque definivit.

Cum duodenis itaque, quos ex eadem civitate BEATOS adducimus in hoc theatrū, REGIBUS, adfavebunt utique MAJESTATI TUÆ, ut REGI APOSTOLICO APOSTOLI, ut ANGELICO ANGELI, ut JUSTO JUSTI: quò facilius Regias eodem numero virtutes duodenni, quā flores, ætate, complectaris, & ad optatissimam tuorum gubernationem perficias, in gradu etiam eminentiore: quo in terris agenti coronæ duodenis duodenæ feliciter accedant; & in cœlis olim beato plures in una conferantur.

Atque hoc est, quod in POLYMITA honoribus TUIS dicata volumus; in virtutibus autem eidem responsuris, & felicitati TUÆ servituris gratulamur eo voto; ut omnium TIBI obstrictorum sensa nostris accedant affectibus: quibus omnia TIBI fausta desideramus.

Cætera dum gratulatoriis hisce votis preces jun-


gi-

gimus; vive SERENISSIME REX, & vale in canos  
etiam annos INCOLUMIS, FELIX, GLORIOSUS.  
Cumque tenue hoc opusculum benigno digna-  
ris oculo; affectui ejusdem Authori fave, & fove  
FAVSTA, FESTAQUE IOSEPHI  
VIRGINEÆ, DEIPARÆQUE MATRIS  
VIRGINEI SPONSI LUCE.

SERENISSIMÆ MAJE-  
STATI TUÆ

*Devotissimè devotum*

COLLEGIUM SOCIETATIS  
JESU GRÆCENSE.



# S. HENRICUS ROMANORUM IMPERATOR Clementiâ Illustris.



Rimum in HENRICO SECUNDO virtutis decus  
cælo, an mundo, imò & mundo, dedit Bavaria.  
Et ita dedit, ut fæcundam se & in hoc probaret matrem,  
& nutricem sanctiorum animorum.

Dedit etiam suis majorem Majoribus,  
& quamvis multarum ab aliis laudum hæredem,  
plurimum tamen in aliis authorem:  
ut compendio multa daret in uno bona.

Optimorum igitur parentum soboles melior  
avitæ virtutis Patrimonium,  
quod accepit amplissimum,  
auctius etiam ad posteros transmisit.

Sivene, si non cumulâisset, videretur decoxisse;  
Cum, ut sacrum habet axioma, in bono non progredi sit regredi:  
sive ut tot habiturus hæredes,

Quot ex eadem SERENISSIMA DOMO PRINCIPES;  
industriâ rectè providâ relinqueret thesaurum  
tanto numero suffecturum:

adeoque ex uno in plura gazophylacia distribuendum.

Et verò divisus ille hætenus in omnes liberali manu,  
ut bona cujusque voluntas id ferebat,  
ditavit singulos abundè:

nescias, majore HENRICI gloria,  
an hæredum felicitate:

inclytæ certè stirpis laude utrinque immortalis.

Quæ AUSTRIACO præsertim insita stirpi,  
nunquam non vernat spirante pietate gratia,  
vel in autumnis, etiam adultiore:

quin & sub bruma semper florida, & æstiva  
Maturus virtutum fructus offert.

Nec ex hac felici arbore  
uno avulso, deficit alter aureus:  
imò & in plures proficit quandoque etiam unus.

Quia perenni, & felici serie  
succrescunt sibi Principes  
non boni tantum,  
sed, & frequenter optimi.  
Ex radice tam fecundæ stirpis  
pullulavit & HENRICUS iste  
indolis laudatissimæ furculus  
inter primos memorandus.

Ut cui aurea Imperii poma sponte accrescerent;  
unde plura deind e viridaria ditescerent,  
in publica Christianæ rei emolumenta.

Qui & ipse fructus ferret  
semper suavissimos, & mitissimos:  
in quos vel hostium impacti aliquando dentes  
obstupefcerent quidem velut attoniti,  
sed nimiam cum dulcedine bonitatem.

Quæ vitiato nonnunquam etiam palato solet arridere.  
Nec verò assiduam sua defecit laus culturam:  
cujus beneficio tenella ut plurimum germina  
plurimum promovent ad ubertatem.

Cælorum hæc munere ei obtigit à Wolfgango,  
Antistite inter prima Ecclesiæ lumina clarissimo:  
ut Sanctos nempe Principes à sanctis  
decet, & expedit institui Magistris.

Hujus curâ in eam profecit virtutis sublimitatem,  
quâ redditus terris major  
ex domestico seu viridario, seu topiario  
transplantari meruit in paradysum:  
ut altiores inter cedros emereret:  
& medullam virtutis suæ præberet Aquilis  
ad feros etiam posteros deferendam.

Scirpiculâ cultoris hujus admotâ,  
spuria omnis vitiorum propago,  
ubi vix se insinuâisset,  
illico succisa procubuit in herba velut ipsa, ac radice.  
Industriâ sanè felicissimâ:

ne temerè adnata stirpi  
genuinarum frondium imitatione adolesceret,  
serò, ut fieri sæpius amat, postliminio deprehendenda:  
& meliorem succum damno depasta irreparabili,  
tum demum notaretur adesse primum,  
cùm vix occurrente remedio obesse resciretur.

Fortunatissime Principum!

cui in illo ætatis flexu,



ubi boni, maliq̄ue ita confusi aditus;  
ut ægrè discrimen sentias, nisi in egressu;  
tam felix obtigit Mercurius.

Cujus ductu in ipso quasi bivio Hercules,  
non citiùs didicisti vivere, quàm vivere bene,  
vix terris editus, & egressus cunis,  
jam cœlo feliciter auctoratus.

Boni Numinis hæc fuit sollicitudo:  
ut novo huic Æacidi, ad majora nempenato,  
melior provideretur Chiron in Wolfgango,  
Magister fortitudinis.

Quæ Trojam olim alteram non perderet,  
Sed majore gloria servaret.

Cujus operâ non medullis jam leonum,  
sed exquisitis Lupi, quàm Germani, tam candidi  
servando huic agno vel maximè fervientibus,  
& sacris omnino visceribus,  
hoc est, Christianæ sapientiæ ac virtutis lacte,  
etiam ultra quinquennium nutritus,  
nil mirum, si tam & mansuetus evalit, & robustus:  
ut virtute leonem agno fociante,

hoc est, CLEMENTIA fortitudinem temperante,  
seipsum victor triumpharet.

Decidua verò hujus lactis stillæ  
signârunt novam virtutis galaxiam:  
quam sequentium sæculorum ingressuri Principes,  
rectiùs, ac in veteri illa lactis via,  
certum in cœlos iter, & meliùs lactati facilè tenebunt.  
At HENRICI pueritia præclarissimis imbuta feminibus  
non potuit non adolescere in segetem  
& uberem, & optimæ frugis matrem.

Nempe ver est vitæ pueritia:  
inde & juventutis adultæ messis,  
& virilium autumnus annorum pendet.

Malum hic omen crede:  
si impingas in ipso limine:  
ne dicam, prolaboris.

Ita namq̄ue reliquum vitæ iter vix inoffenso decurre pede:  
tantoq̄ue gravior metuendus erit sæpe lapsus;  
quantò longiore abieris viâ.

Quare & imperiali ad motus fastigio HENRICUS  
â seipso minimè degeneravit in alto:  
dum virtuti rectæq̄ue rationi,  
tanquam feliciori Ariadnæ,

porrecta semel manu permanfit subjeſtiſſimus ad nutum.  
 Flexuram, ad quam in furculo eruditus fuerat,  
 non dimittens, etiam in arbore jam grandiore,  
 digniſſimum ſe teſtatus eſt imperio orbis,  
 vel ipſa hac ſubjectione major, & eminentior.

Et Imperium quidem ſeptemvirorum ſuffragio delatum  
 primùm in HENRICO ambire didicit,  
 ſemper hætenus ambitum,  
 etiam extra ambitum Imperii,  
 plurimaſque per ambages.  
 Bono videlicet omine:

ubi purpura virtutis flore candidata  
 virtutem ut candidam, ſic candidatam ſequitur:  
 ut adjecto rubore candorem ornet ampliùs.

Ottonis hic tertii placet conſilium:

Qui ſummam poteſtatem ſucceſſioni ſanguinis ereptam,  
 poſthac in meritorum jura voluit concedere:

SEPTENVIRUM SENATU ritè conſtituto.

Qui conſilio reipublicæ ſervituro Principem legeret,  
 à quo dignitas ornaretur;  
 non qui ſolùm inclareſceret à dignitate.

Idque ſecundiffimis omnino auſpiciis:  
 dum prima vota in ſanctum hunc Cæſarem inciderunt.

Ut præſagam Ottonis mentem fuiſſe dicas:

qui Imperium liberæ obnoxium electioni fecit;  
 ut optimo, & optimè merito deferretur.

Quò nempe faciliùs ex Capite in membra virtus dimanaret:  
 & ex membrorum ſymmetria in Caput gloria redundaret.

Niſi potiùs ea fuit Numinis providentia

hoc inſtitutum hoc ſtatuto volentis comprobare:

ut quemadmodum hæreditarium priùs Imperium à ſancto duxit exordia;  
 ita cæptum ab electione ſancto ſtatim Capite inauguraretur.

Et verò melioribus etiam fatiſ:

dum illud à ſancto Auſpice

degeneravit in poſteros deinde quofdam  
 ſanguinis quidem, non virtutis tamen hæredes:  
 adeoque inter præcocia hortorum germina  
 vel in juvena effatum conſenuit.

Iſtud verò poſtea æquo electionis arbitrio,  
 quod ſuprema ſibi diphthera ſubſtituerat;

ut ſeliciffima ſorte deflexit in illos,  
 quibus pro hæreditate virtus eſt;

ſic in una eorundem ſucceſſione perennat, & perennabit,  
 etiam ſine hæreditario jure perpetuum.

Quando-

Quandoquidem & virtus jure suo perpetua est, & æterna,  
adeoque ipsa vetustate & fit illustrior, & roboratur.  
Idque præsertim istis in avitam hanc virtutem successuris ita;  
ut stante etiam integra electionis libertate,  
Imperium transiturum esset in hæreditatem:  
non suâ minùs, quàm eorundem felicitate.

IMPERATORIA cum primis CLEMENTIA,  
ut fidere primæ magnitudinis non postremo,  
præluisse, & præluisse credas HENRICUM:  
cui mitem esse, inter alia virtutum decora,  
primæ regnandi lex, & lux erat:  
nec aliud fixius hærebat animo documentum:  
quàm optimum officii magistrum esse amorem,  
pessimum deficiente altero, timorem.

Quod quidem in hoc Principe videri possit minùs admirandum:  
dum naturæ succurrit institutio;  
ut mansuetudo utriusque alimento nutriretur.

Quæ enim ex Christiani illius Senecæ,  
Wolfgangi nempe Sancti Schola,  
prodire potuit alius, quàm omnino alius à Nerone?  
Quo quidem HENRICUS fuit melior, etiam optimo;  
& in ipso quasi tirocinio Magister.

Optabat enim & iste in uno capite multa:  
sed ut alioqui fortè peritura conservaret.


Ferrum ergo nunquam strinxit,  
ne in hostes quidem, nisi Ecclesiæ;  
cujus vel paci asserendæ,  
vel finibus proferendis bella gessit.

Ex qua tam bona bellorum semine,  
dum largo cælum rore adfaveret;  
non potuit nisi larga gloriæ mellis germinare.

Illud verò inter agnatas rosæ spinas mirum;  
Principem ad pacis artes natum,  
& à CLEMENTIA singulari commendatum,  
frequentioribus fuisse turbis agitatum.

Sive ne deesset ansa statuendis in victos CLEMENTIÆ,  
alioqui fortè minùs eminentis, ac spectandæ, trophæis:  
Sive ne sine adversario, ut pronum est, languesceret virtus:  
quæ naturâ suâ gaudet arduis, & animatur.

Quando, ut ventis proceræ arbores,  
sic infestis casibus egregiæ mentes  
plurimum & roborantur, & proficiunt ad sublimitatem.  
Italia fuit illi amplior, quàm principio videri poterat,  
certaminum juxta, palmarumque campus:



utpote quæ non sæpius dimisit victorem,  
 quàm exceperit armatum.  
 Inde lauros in Germaniam transtulit;  
 felicissimâque insitione propagavit,  
 illicetiam, ubi crescere non solent.  
 Ticini quidem aliquid in eum sibi licere voluit  
 turbatis vecta curulibus Fortuna:  
 dum altero imminuit pede,  
 rotâ quasi suâ pressum,  
 Sed & hoc astu non effecit aliud;  
 quàm ut, qui celerius jam non posset currere,  
 aucto virtutis cursu expeditior,  
 deinceps ad victorias etiam volaret.  
 Quanquam & alterum ibidem accepit vulnus,  
 nec paulò gravius, quia pietati suæ inflictum,  
 virtutis tamen integritati per opportunum,  
 multorumque bono saluberrimum.  
 Exortonâque militem inter, ac cives dissidio,  
 & istis crudeli deletis excidio:  
 uti omnium vulnera unus,  
 & magis fortè, quàm omnes unâ, doluit  
 OPTIMUS HIC IMPERATOR;  
 ita doluit, ut unum putes omnia excepisse.  
 Nec dubitâsset Agesilaus iste melior,  
 ut animo erat ad miserandum pronissimo,  
 propriâ eadem obligare purpurâ;  
 si etiamnum sanandi locus, modûsque superfuisset.  
 At quem benignitatis prodigendæ campum negavit Insubria,  
 uberrimum obtulit Apulia:  
 urbe Trojâ diuturno tandem obsidio gloriosè subactâ.  
 Ubi in pœnam insolentioris contumaciæ,  
 ut ferebat belli alea, & consuetudo,  
 omnes incolæ Martis sacrificio destinabantur,  
 digna Mexicanis forsan aris hecatombe.  
 Felici tamen commentone, an invento, discussum est periculum,  
 apud eum, cujus animo CLEMENTIA imperabat, Imperatorem.  
 Quando puerorum agmen portis effusum  
 triariorum partes adeò feliciter egit:  
 ut facunda lacrymis oratione,  
 id est, quò mollioribus,  
 eò potentioribus, in re desperata armis,  
 læsam obitinatione CLEMENTIAM suavissimè mitigavit.  
 Ut nimirum huic Trojæ alioqui subvertendæ  
 salutis fuerit,

Quæ quondam perniciem advexerat alteri,  
simplex ætas.

Adeò non tantùm invitæ grues  
sed & aquilæ quandòque volentes  
vincuntur à pumilionibus:

ut ex parvulis major sit gloria triumphis.

Ita nãmque triumphante Romanain pompa Augusto,  
quin & seipso major abscellit CLEMENTISSIMUS IMPERATOR;  
ubi grandi pusillorum innocentia celsit:

ut suæ splendorem redderet eò luculentiolem;  
dum bello victor vinci se ab imbellibus pateretur.

Cujus equidem CLEMENTIÆ speciem  
quia teneris mentibus quàm suavissimè impressam,  
nulla non ætas

ita & vivaci, & gloriosâ continebit memoriâ;  
ut obliterari nullo unquam temporis lapsu possit.

Atque adeò Antæi quoquè hujus magnitudinem  
sic à parvulis dimensam,  
ex facti unius ungue  
omnis, & sera posteritas

cum laude memorabit, & venerabitur.

Sed ut cuilibet Andabatarum generi,  
adeòque maximè cæco Cupidini intensus erat;  
ita amorem molliorem non meliore habuit loco, quàm furorem:

utpote quem non admisit, nisi oculatum,  
hoc est, sanctum, & intemeratum:

castissimus juxta, ac clementissimus iste Princeps.

Hinc nec conjugii alterius lege stringi voluit,  
quàm virginalis:

in quo & virgo junctus virgini,  
& cælebs in thalamo,  
liberos non genuit, nisi cælo.

Reges hi fuere gemini,

Alter Hungariæ, alter Boemiæ.

Quibus pro hæreditate data veræ fidei lux, & virtus  
post sera etiam sæcula in utròque regno perennat;  
& quidem feliciùs, quàm gentilium lampades,  
in posteris inter stellas numerandis.

Nec unquam facilè desinet:

quia AUSTRIACO transcripta FIRMAMENTO.

Fortunatissimus omnino parens:  
qui nepotes nactus non sanguinis,  
verùm, quod solatii est solidioris argumentum,  
religionis, & sanctioris vitæ.

Securissimus insuper in his de perpetuitate generis:  
 quod firmatum sit in illa Domo,  
 quæ fundata super petram  
 semper stat, semper viget inconcussa,  
 Porro de clarissima in Superos pietate quid attinet dicere?  
 quando vel silentibus in terra cunctis,  
 templorum, quæ eorundem honori pro cælo multa struxit,  
 quàm dura, tam ponderosa voce,  
 etiamnum hodie loquuntur marmora.  
 Quibus incisum HENRICI cum laudibus nomen  
 felicius, quàm dedicatum in Capitolio,  
 gloriosissimam feret æternitatem.  
 Idque eò ampliùs, & beatiùs illic:  
 ubi coronata jam cum pietate virtus  
 præmio fruitur æterno.



TEMPERAT ÆSTUM, ET ADAUGET AMORES.



Quod soli Venus est, hoc est clementia Regi:  
Temperat illa æstum, justitiæ ista modum.  
Hinc veneranda fui Majestas auget amorem;  
Inde solet mundo gratior esse dies.  
Sic jubare in plaus<sup>9</sup> animastibi Phœbe columbas;  
Sic Princeps populi corda favore trahis.

174

175

176

177

178

179

180

181

182

183


184

185

186

187





# Encomium exegeticum Regiæ clementiæ.

**N**on minæ, nec vis truculenta, nec quam  
Obsidet sævus rigor, & ferarum  
Dira pœnarum series tyrannis,  
Regnātuentur.

Pessimus certæ fidei magister  
Est timor: mentes nec athena vincunt  
Claustra, nec longum populi favorem  
Vincula servant.

Quisquis augusta diadema fronte  
Gestat, & gentes moderatur æqua  
Lege subiectas, dominisque mundum  
Frænat habenis;

Ne velit vulgo potiùs timeri,  
Aut metum regni statuisse fulcrum:  
Tutiùs lato dominatur orbe,  
Quisquis amatur.

Aureis mentes meliùs catenis  
Vinculant Reges: & amore capta  
Certius quovis adamante servant  
Corda suorum.

Blandus & CLEMENS, placidique Princeps  
Pectoris, quem non furor inquietus,  
Nec cruentati recreant nocentùm  
Sanguine fasces;

Qui procul cædes, Nemefimque regno  
Arcet, & quamvis rigor æquis iras  
Suadeat, mavult pietate, læsam  
Vim reparare:

Hic regit felix, solii que certus  
Vivit; hunc ultro cupidæ regentem  
Expetunt gentes, & amata certant  
Sceptra subire.

Sic ubi sævas mare ponit iras;  
Et Thetis molles imitata somnos  
Conticet latè, bibulisque sese  
Sternit arenis;

Deferunt ripas, placidumque sponte  
 Ambiunt lætæ pelagus carinæ,  
 Floribus remos, hilarique proras  
    Fronde revinctæ.

Ast ubi cæcæ ferus hospes aulæ  
 Mugit effractis Aquilo cavernis,  
 Et procellosi tremefacta pulsant  
    Sidera montes;

Tum fretum damnat, tumidisque quassam  
 Subtrahit navim furiis, & omni  
 Pallidus remo fugit incitatum  
    Navita pontum.

Quilibet lenes amat: at furoris  
 Impotes, & quos malè feriato  
 Torvus in præceps agit ardor æstu,  
    Quilibet odit.

Hinc Deo par est bonus, & severæ  
 Infrequens Princeps Themidis, modique  
 Limites inter cohibere gnarus  
    Pectoris ignem.

Nempe Supremus Superum Monarcha,  
 Sæculo quamvis scelerum ferace  
 Fæta noxarum, nova monstra tellus  
    Fundat in horas;

Ac profanatis malè sana pubes,  
 Involet cælum manibus, Deumque  
 Templâ ferali genus inquinatum  
    Marte laceſſat:

Non statim densâ tegit astra nube  
 Parcus irarum, modicusque diri  
 Fulminis; nec, quos meruere fontes,  
    Depluit ignes.

Sed manu lenta tonitru ciere  
 Suetus, inflicta monet ante pœnas;  
 Insuper promptus veniam roganti  
    Parcit iniquo.

Sic & AUGUSTÆ DOMUS ALMA GENTIS  
 Floret; & multis dominata lustris,  
 Quos regit, vultu recreat benigno,  
    Sideris instar.

Unde, quod fasti memorent futuri,  
 Digna cenſetur Superum favore;  
 Ut regat felix gemini nitentes  
    Orbis habenas.

# S. CANUTUS

## REX DANIÆ

Modestiâ ornatus.

**R**egiarum virtutum compendium,  
 inclyta Majorum suorum gloria,  
 imò & corona CANUTUS fuit:  
 adeoque plus Parenti suo reddidit honoris,  
 Quàm Philippo quondam Alexander.  
 Nondum primos egressus annos futuræ prælusit magnitudini.  
 Subsequum namque nunciat Aurora diem,  
 umbra solem, ver autumnum.  
 Admirata est præternaturæ ordinem Dania  
 in Aurora meridiem,  
 in vere autumnum,  
 in infantia virum.  
 Reges natura nasci docuit, non fieri:  
 fieri tamen docuit virtus obstetrix naturæ.  
 Qualis futurus Hercules, cunas vide:  
 sed & in cunis robur admirare.  
 Quàm excelsam spondeat CANUTUS indolem  
 primam illius ætatem contemplare.  
 & in hac indolem venerare.  
 Ut solem produnt radii, sic primi virtutem anni.  
 Nihil in hoc præter annos tenerum  
 præter vires, teneræ scilicet ætatis, imbelles nihil.  
 In qua tamen ipsa maturum mores, virtutes probârunt Regem.  
 Et ita legitimo regni suffragio regnum est consecutus,  
 raro sanè prodigio omnium vocibus in unam harmoniam concinentibus,  
 post exactum chori turbatorem.  
 Hanc ut & Cælitum probarent aures, in sacris auxit Odeis.  
 Prima namque regni fundamenta stabilivit religione:  
 Utpote quæ, ut basis est virtutum, sic columen est regnorum.  
 Inde prima illi sacrarum ædium cura:  
 quas & redivis; & pretiosa suppellectili ornare cœpit:  
 ut reciproco hinc splendore & sceptrum illustraret.  
 Quia verò ad alta nati paria moliuntur animi,

Martem virtuti sociavit,  
 raro confortio pugil fortissimus & pientissimus:  
 ut religionem firmaret apud suos, induceret apud alienos.  
 Igitur & Marte, & virtute, tanquam fortissimo instructus præsidio,  
 quia gemino, mari fortunam quærit:  
 ut in elemento vel maximè instabili eam primùm stabiliret.  
 Cæcam hanc finxere Deam veteres:  
 dum sæpius immeritis benignam propinat faciem;  
 & bene meritos torvo respuit obtutu.  
 Est tamen etiam oculatior Argo:  
 quando virtutis illa comes, & virtus illi fomes est.  
 Itanamque quam concipit flammam, acuit in lumen;  
 quod candelabro imponatur.  
 His igitur facibus excutens latebras  
 piratica Myoparonum monstra feliciter edomuit  
 novus Daniæ Hercules, Neptuno arridente.  
 Qui & tutam in oceano malaciam, quâ firma staret victoria, indulgit.  
 Ut vel hinc fixa maneret sententia: cuncta virtuti cedere,  
 nec ullam illi inviam, & extra vias, esse viam.  
 His animatus in liquido,  
 in solidum è mari campum laureata transfert arma Rex gloriosus.  
 Sed & in his ut fertilem, sic tributariam habuit Fortunam.  
 Nam illico cecidit ad votum bellialea:  
 utpote Cælo adfavente jacta, & à virtute directa.  
 Sem bones, ac Estones Orientis populos aggressus  
 prospero in fugam vertit prælio.  
 Armis nempe pro Deo populoque sumptis:  
 eoque clarioribus, quod & barbarorum animos religioni subdiderunt.  
 Ab Oriente igitur heroæ virtutis splendorem retulit ampliorem:  
 dum tot victoriis clarior Patriæ velut meridianus illuxit.  
 Vix tamen sibi vespertinus fuit:  
 quando fulgores tantos crepusculo MODESTIÆ involuit suæ:  
 non sibi, non virtuti suæ, non fortunæ, sed exercituum Domino  
 sua in acceptis referens trophæa.  
 Quo quidem id consecutus est,  
 ut magnus prius aliorum victor, nunc sui major esset.  
 Ita, quod clarior ab Oriente rediit fortitudo,  
 hoc sibi visa obscurior in Occidente est MODESTIA.  
 Ut lauros foris natas cum Daphne Phœbum fugiente  
 nutriret inter umbras domi.  
 Umbras tamen auxit has ultra modum obitus Parentis ad umbras abeuntis:  
 & inde inter luctûs tenebras enatæ hæredibus umbræ,  
 an & larvæ, simultatis?  
 Nam Heraldus, & Olaus desides animæ

dum

dum Paternum insolentia stimulante ambiunt folium;  
imperante licet modestiâ CANUTUS taceat,  
perorant facta; dignissimûmque probat virtus.

Ut nimirum fatuos inter ignes, feralésque cometarium faces  
genuinum Cæli astrum, & in tenebris, sobolem se probat solis.

Interea diu anceps hæsit corona Daniæ,  
cujusnam secura vertici insideret.

Heraldum ætas, & natalium prærogativa,  
CANUTUM virtus commendabat:

illum otium & ignavia indignum folio,  
hunc exantlati pro Patria labores, excelsaque indoles  
scepro dignum comprobavere.

Quid faciat in hoc Alcidis bivio Dania?  
periculosa expositam se videt alex:  
sive maneat acephala, sive biceps fiat.

Ardui quippe laboris opus est,  
inter plures regni competitores, & unum, & idoneum decernere Caput.  
Facilis hic error est, nec facile, nisi mortis arbitrio corrigendus:

Heraldus, cui iners animus ad folium præclusit iter,  
apud rectè sentientes;

largi cre illud manu sibi aperuit apud ignorantes & iniquos.

Gemina ad folium via est, ut plurimum, aurum & virtus,  
Illam referat populus, qui publici boni cynosuram non respicit,  
sed privata potius crumenæ sequitur faces:

quæ cum vehementius accenduntur, sæpe vis exstinguit, & evertit jus:  
Corruptamque adurit rationem error.

Heraldo itaque CANUTUS, virtus vitio posthabetur:

â populo levi ad grave regni evehitur folium,  
qui levi promissorum aurâ impleverat spei carbasæ:  
an ideo etiam ad bonæ spei promontorium devehendus?

Non semper favent Naucloero Favonii:

siquidem prægnantia vel maximè iisdem vela  
graviolem sæpe tempestatem parturiunt.

Facile jacturam regni tulit, & injuriam robusta CANUTI MODESTIA.

Utpote quæ propria non ponderabat merita;  
& latere sibi malebat abdita, quàm spectari multis.

Heraldus verò dum Regem induit, fratrem exiit:  
ut ferocior in alto solet esse fastus.

Cui quò majores fiunt oculi per arrogantiam,  
eò minùs ferre possunt virtutis alienæ lucem.

Cujus fulgor excæcare solet, & invidiam, & ambitionem,  
geminas superbiæ pupillas.

Ergo quia livor corrivalem odit,  
Ambitioque semper timet regno,

CANUTUM, qui Marte prospero regni auxit limites,  
 Regno proscribit frater impius.  
 Ne scilicet, ut reâpse fuerat, is Rege major videretur.  
 Nec mirare tamen.

Per sæpe exulat regno virtus, ubi vitium imperat:  
 & felicior se sola foris est, quàm cum tali socio domi.  
 Fraterna hic dissidia Dania timere poterat,  
 adeoque pessima rebus ominari suis:  
 ni fratris injuriam CANUTI MODESTIA extinxisset;  
 atque etiam cedendo victrix regni spem crexisset.  
 Abit ergo regni decus exigua stipatus manu, virtute comite.

Quæ ut suus Herculi Theseus, una ipsi sufficebat,  
 ad comitatum, etiam regio splendidior em.  
 In Suediam ad Halstanum Regem pergit exul MODESTIA.  
 Quæ cum, ut virtutum, sic animorum sit moderatrix,  
 faciliè bonorum sibi subjicit amorem;  
 adeoque & amicos reperit, ubi non inquit.  
 Sic & extra patriam Pater Patriæ dici meruit;  
 Dum non tam productos regni limites ab hostium defendit incurfu,  
 quàm victorioso Marte produxit.  
 Cæpta namque cum Oriente bella etiam exul est profecutus:  
 ut & Patriæ minùs gratæ, & perfido fratri,  
 etiam extorris auget imperium.  
 Proprium est MODESTIÆ hoc artificium:  
 ut acceptis injuriis rependat beneficia;  
 & sub millione sui extollat supprimentes.

Dum sic pro Rege & regno, extraregnum, vigil excubat hic Antipater,  
 quàm securo, tam infami otio domi fruitur Heraldus.

Quia tamen decreta CANUTO cælitus Daniæ corona fuerat,  
 non diu indignum ornavit verticem:  
 Sed ad meliorem, cui gloriosius insideret, vel suo ipsa pondere properavit.  
 Igitur Heraldus evoluto vix biennio,  
 non quidem suo, sed fatali mortis arbitrio,  
 insignia regni CANUTO vel transcribit, vel potiùs relinquit.  
 Mox iste unanimi populorum suffragio, exultantisque Daniæ plausu,  
 tanquam felix piusque Princeps,  
 in avitum postliminio solium restitutus inauguratur.  
 Erubuit equidem regali in Ostro regalis MODESTIA,  
 & suo magis, quàm alieno, rubore triumphavit.  
 Neque tamen ausa est repudiare muricem,  
 qui sublimiori quondam purpuræ  
 inter electos Christi Martyres consequendæ præludere videbatur.  
 Inter plurimas regni curas prima fuit,  
 quæ primas jure tenet, ipse Deus.

Ut hujus promoveret regnum,  
quàm grandia, tam grandi animo suscepit, & subivit pericula.  
Laureata itaque sæpius, primùm in fidei Numinisque hostes transfert arma:  
& quia DEO duce, nunquam non gloriosa.

Reperit in hoc Lernæa bellua novum Herculem:  
Cujus & ferro, & mentis in DEUM ardentis face interiret.  
Curorum, Sembonum, Estonumque expugnat perfidiam,  
& errorum tenebras veræ fidei lumine amabilis hic Daniæ sol dispergit.  
Dispersis autem fidei hostibus,  
prostratoque hæreseos Pythone,  
non sibi, sed DEO triumphos instruit.  
Et quales?

Tace hîc tuos Roma: tace tuos antiquitas.  
Non facilè auditum victori in se DEO trophæum statuit.  
Dum tota nàmque Dania gloriosum Numini pæana accinit,  
CANUTUS IPSE:

Stupefce Orbis, & tanti Regis MODESTIAM contemplare!  
post hostium depressam audaciam, & productos Daniæ terminos,  
post copiosas victoriarum laureas, & erecta domi, forisque fidei labara,  
patibulati Numinis accedit simulacrum:  
præclaroque Regibus exemplo,  
summa prostratus veneratione, ad pedes ejus,  
regni abjicit cum scepro diadema.  
Et in hoc se, suosque perenni sacrat obsequio Regi Regum.  
Felix obsequium!

Nam sic fervire regnare est, & regna stabilire.  
Laureas quippe nectit laureis,  
& fortunæ instabili infigit clavum rotæ;  
qui tot inter palmas fastum superat.  
Time-te Principes, quibus partæ victoriæ attollunt supercilium.  
Nam qui est hostis arrogantia,  
Sequitur superbos ultor à tergo DEUS.

Post DEUM altera fuit cura publicæ studium utilitatis.  
Boni nàmque Principes non tam suo, quàm suorum serviunt emolumento.  
Restituit igitur sua tribunalibus jura, & restituta stabilivit:  
probationis justitiæ cultum severissimis promovit institutis:  
Virtutem fovit præmiis, sceleraque coërcuit poenis.

Archiatri scilicet boni more:  
ut integra staret legibus valetudo.  
Cæcam ubique æmulatus Astræam,  
non sanguini, non necessitudini celsit:  
ubi aliud suadebat æquitas.  
Non ignorans hanc perire, si privati regnent affectus.  
Verùm ut ad solis radios cæcutiunt noctuæ,

Sic ad justitiæ rigorem quandoque armatur iniquitas.

Hinc ubi bonorum succrevit amor bonum æquumque amanti,  
infelix lolium inspersere pravorum odia,  
apud quosdam præcipue magnates nata;  
qui ut steriles dominabantur avenæ.

Expectandum tamen tempus messis opportunum rata  
dissimulavit hæc omnia prudens Regis optimi MODESTIA.  
novis quin etiam favoribus exasperatos animos mitigavit.

Sopivit hoc rore, non extinxit incendium.

Scintillæ enim gliscebant sub cineribus:

ut in abdito maturescerent flammæ demum in publicum erupturæ.

Interea tamen & suas auxit vires virtus,  
tantò robustior postea in lucem proditura.

Comis erga omnes affabilitas, constansque civium amor,  
profusa in egenos liberalitas, splendidæque in bene meritos munificentia,  
largissima in sacras ædes pietas,  
assiduûmque sui pervincendi, & perficiendi studium,  
rara regiarum mentium ornamenta,  
animique Cælis nati monumenta  
maxima sumpsere indies incrementa:  
atque in septa spinis lilia effloruere.

Non tamen idcirco dimiserunt suos spinæ aculeos:  
quin etiam cum floribus irrigatæ sua exacuerunt arma.

Ubi namque vitium ad robustam adoleverit maturitatem,  
crescit clementiâ furor, amore ira, virtute impietas.

Et hujus illa demum Scopus est:

in quem sua tela ejaculetur.

Occasionem obtulit pientissima Regis Charitas,  
ut perfidia clavum obtinente,  
impia sibi velificarent odia.

Dum enim suppetias Angliæ opem Danorum imploranti ferre decrevisset,  
expeditionem belli commisit Olao fratri suo.

Hic verò improba regnandi illectus cupiditate  
in fratris perniciem vertit arma:

quando infensos æquitati, ac pietati procures; venalemque ad flagitia plebem  
adversus Regem concitavit.

Ut sceptrâ facilius in turbido piscaretur aureo ambitionis hamo:  
& scelestâ sibi fraude iter sterneret ad solium,  
quod illum jure fugiebat.

Ut autem boni non solent facile mala suspicari;  
integrum fratris animum esse, persuaferat sibi virtus innocua.  
Adeoque rebus in Anglia bene gestis, in partem gloriæ Olauum vocat.

Fidem spondet perfidus fratri hostis.

I nunc, & fide, sed cui, vide:



quando & frater fratri juratam fidem violat.

Instructa classe CANUTUS Lymaci advehitur oris:

Diurnâ illic morâ, longanimiq; MODESTIA præsentiam fratris præstolatur:  
eventu tamen vel minimè expectato.

Cunctando namque Cunctator Olaus

Trojanum, quem coeperat, equum perficit:  
obtentâ quidem populi defectione, sed suo malo.

Nam quæ fratri paraverat vincula, sibi injicit;  
et regni malè quæsitî splendore in carceris optimè meriti squalorem vertit:  
ut in se Perilli fata renovet novus Sinon.

Inopinato namque reditu CANUTUS fratris castigat perfidiam:  
fraterna tamen severitate.

Nam graviora meritum regii in vasorem solii  
tantisper vinctum in Flandriam relegat:  
ut fidem domi perditam foris quæreret;

& quos corruerat in regno mores, extra id corrigeret.

In perduellionis capite prostrata crederes membra:

nisi infamis Hydra in aliis denuo repullulâset.

Dum enim æqua defectionis poena â populo exigitur,

Oleum flammæ superaffunditur:

in novos, ac sceleratiores animatur ausus furor,

& in sacrilegum conspirat parricidium.

Cedendum hîc furori duxit mansuetissima Regis MODESTIA:

Sleswici tantisper maluit latitare voluntarius exul:

ut subducto ignibus alimento, faciliùs flamma supprimeretur.

Sed auxit insolentiam, quæ componere debuerat, mansuetudo:

dum excusso libertas iugo, furori pabulum subministravit.

Non erubuit hîc insolentiæ feroci cedere modestissimi Regis humanitas:  
ut vel exemplo humaniora docerentur, qui belluas fuerant imitati.

Subducere se decreverat in Fioniam:

Blaccus amicilâ vâtectus, ut ignominiosam Regi fugam dissuadebat:

Regio scilicet indignum animo, obtendens, cedere populo:

cedendo non sedari, sed animari furorem.

Mare siquidem procellosum sit populus, quem varii agitent venti:

qui ubi mitiores Regii senserit animi favonios,

Alcyoniam se componat ad malaciam.

Quam fovere solet non abditum sub nubibus,  
sed conspicuum, & serenum coronati Solis jubar.

Creddidit AGNINA MODESTIA induto ovem lupo:

Nèque sub speciosis personati amici monitis dolum est suspicata.

Alegatus mittitur ad seditiosum populum Blaccus ipse, ut voluerat:

& hostis nempe ad hostem, & amicus ad amicum.

Quid inde speres?

Non majora sunt expectanda facilè mala,


E

quàm

quàm â malo sub larva bonilatitante.  
**Ut** CANUTUM suo dolo perfidus immolet,  
 mendaciis auget odia, & simultates,  
 aranei muscas irretientis more:  
 & in cædem Regis intentam populum animat.  
**Ita** demum sceleratior, quàm abierat, redit impostor:  
 furorem in amorem abiisse nunciat:  
 tutum ut repetat folium, fallax admonet:  
 sed & innocentem in casses Regem trahit:  
 ut ad paratum in folio tumultum impellat.  
 Sciens autem Rex futurorum probè gnarus,  
 imminere sibi justitiæ causâ mortem,  
 optandam utique potiùs, quàm declinandam;  
 priusquàm suam subiret regiam,  
 sacram Regum Regis aulam petit,  
 dicatam scilicet Albano Martyri ædem.  
**Ut** & certaminis haberet arenam sui, & athletam athleta imitaretur.  
 Illic ut victor hostium fecerat antè,  
 jam sui quoque victor regalia submittit insignia DEO:  
 MODESTIA nimirum apicem adeptâ.  
**Ita** verò preces precibus, & virtutibus virtutes accumulans,  
 velut ex aromaticis quibusdam virgultis,  
 nidum sibi struxit sacer iste Phoenix:  
 In quo inter suæ charitatis, & furoris alieni flammæ,  
 renasceretur cælo.  
 Ubi pro temporaria regni non diuturni,  
 quàm DEO submittere, & pro DEO dimittere docuerat;  
 æternam æterni in DEO regni rependit  
 MODESTIA SANCTA CORONAM.



FORTUNAM REVERENTIA FIGIT.



Arboris ipsa graves inclinat copia frondes;  
Ne spolium Ventis Regia mala cadant.  
Hic typus est animi Superûm inter dona modesti;  
Dum se submittens auget honoris opes.  
Stare loco nescit Fortuna volubilis alto:  
Solus eam docet id, qui reverenter habet.



# Encomium exegeticum Regiæ Modestiae.

**Q**ui regna sceptris, sceptrâ qui dextrâ rotas;  
 Cui solis ambæ Regiæ  
 Tributa pendunt; cui Tagus gazas parit;  
 Ganges arenas gemmeas;  
 Pactolus aurum; qui cothurnato pede  
 Atria corusca proteris  
 Achate strata; mille cui vertex nitet  
 Cinctus Pyropis; purpurâ,  
 Ostroque Tyrio picta cui totum tegunt  
 Regale corpus firmata:  
 Regna modestè. Regis heu quantum decus  
 Offuscat invisus tumor,  
 Umbrisque fœdat! Mentis at mitis decor,  
 MODESTIÆQUE GLORIA  
 Quantum refulget! Regna si regnis nova,  
 Sceptrisque sceptrâ jungere  
 Fert animus, humiles fert vultus. Non micat  
 Diadema Regis clariùs,  
 Tantâque Majestate Rex nunquam valet;  
 Quàm quando nube MODESTIÆ  
 Obumbrat ora, & ignibus licet caput  
 Rutilet coronæ, spiritus  
 Ferat modestos. Hæc rapit virtus fibras,  
 Et subditorum pectora.  
 Emuntur humili corda risu. Tam feras  
 Nemo medullas contrahit  
 Ligustica de rupe, quas nequeat statim  
 PRINCEPS MODESTUS flectere.  
 Huic cornu Amalthæa, Charites risus suos,  
 Ceres coronam spiccam,  
 Bellona palmas tribuit. Et sago & togâ  
 Gaudet Deorum munere.  
 Hunc nec frementis tela deterrent stygis,  
 Minùs chelydris horridum  
 Caput Medusæ. Quem suo Cælum tegit  
 Favore, nec nimbis hyems

Inimica , nec ferox procelloſo poteſt  
     Notus Boote ſternere.  
 Fortuna regnis dubia præciſas habet  
     Alas : abire Principis  
 Solio modeſti non poteſt. Lubrica tamen  
     Faſtigiataſ deprimit  
 Turres. Quia parvulas finit rates  
     Sulcare tutè marmora ;  
 Irata Laomedontias puppes quatit.  
     Odit ſuperbos Jupiter ,  
 Fovet modeſtos Principes. Nunquam diu  
     Regno potitur , ſidera  
 Qui faſtuoſo premere contendit pede.  
     Obeliſcus ille perpeti  
 Firmatus ævo ſtabit , humili quem baſis  
     Suffulcit in fundamine.  
 Tumidi coloſſi , vix quidem nomen tenent.  
     Non æmuleris æthera ,  
 Sub aſtra cui Fortuna remigibus dedit  
     Pennis volare. Quæ Icaro  
 Conſtruxit alas , luſitans eadem Dea  
     Radiis liquavit Delii.  
 Extollit idem , & deprimit Reges Deus ;  
     Immifcet ima maximis.  
 Trabeam tumentis Regis extemplo in levem  
     Mutant lacernam Numina.  
 Siniftra Pygmalionios quibus dedit  
     Superare cenſus , dexterâ  
 Stipem rogare cerno. Quos tumido Polos  
     Calcere plantâ Phosphorus  
 Conſpexit , hos ſubire mox miſerâ vice ,  
     Famulante vidit Hæſperus  
 Collo lupata Regis alieni. Deus  
     Babylonis eſſe , thura que  
 Qui vult Deorum , ſubditi explodunt bovem ,  
     Probrumque faſtus improbi.  
 Rex ſceptra regni verſat , at Regem Deus.  
     Diu imperare Jupiter  
 Regi ſuperbo denegat. Cordis vices  
     Eſt Principi MODESTIA.  
 Diadema capite , ne caput throno cadat ,  
     Fuge mentis elatæ notas.  
 Favente navim forte firmatam reges  
     IN ANCHORA MODESTIÆ.



# S. EDILBERTUS CANTIANORUM ET ANGLO- SAXONUM REX.

Temperantiâ fulgens.

**E**DILBERTUM Regem Deo amabilem,  
Regno suo admirabilem, & posteris imitandum,  
in summo medium, & summum in medio tenentem,  
Regibus aliis ad viam veritatis Ducem, & exemplar  
Vetus Britannia, hodierna Anglia veneratur.  
Cui nobilitatem, & pretium, quod nomine sortitus erat,  
re postea consecutus cum gloria communicavit:  
quando ex errorum obscuritate evolutam  
orbi clariorem, & cælo digniorem primus fecit.  
Bertham sortitus conjugem è Regio sanguine,  
de tuo, Francia, gremio germen nobile, & salutare:  
quia ex Liliorum patria, amantibus lilia  
candorem Anglis allaturum.  
Nam ad vitæ ac salutis initium  
occasio illi fuit pium huius consortium:  
ut primus esset è Regibus Angliæ, & Australium ejus provinciarum,  
Cui cum Diviniore Austro Sol Justitiæ de Cælis affulgeret:  
ut ejusdem radios fortunatis ipse succellibus promoveret,  
ad plurima scilicet virtutum astra suo tempore oritura.  
Felix Hymenæus!  
Quibus tædam accendisti ad fidem tori conjugalis,  
Bertha re non minùs, quàm nomine pretiosa;  
etiam Fidei Orthodoxæ lucem sociasti:  
ut quasi nata esses in Geminis, diem geminares.  
Eo pacto consortem accepit EDILBERTUS, quo nuptui data fuerat:  
ut eandem ritu Religionis Christianæ vivere pateretur,  
cum Luidhardo Episcopo sancto, ejusque in Spiritu Magistro,  
quem viæ socium, atque Custodem Secum adduxerat.  
Hujus, & Conjugis exempla non visa priùs,  
rara vitæ austeritas, spectatâque morum Sanctitas  
& cum his Orthodoxa veritas sensim illius animum subingressa,  
ubi incurrit in oculos, & allapsa est per aures,

admirationem peperit, & occupavit affectus:  
ut pulcherrima in fide proles in lucem ederetur.

Sic viam Domino paravit Luidhardus;  
sic locum & sedem gratiæ Regi infundendæ disposuit:  
ut Sanctus videri inciperet EDILBERTUS, etiam in tenebris,  
quantumvis nondum lumen gratiæ adeptus:

ut nimirum creperam Phosphorus  
inter nebulas matutinas lucem vibrat:  
adeoque Christianis moribus præluderet,  
etsi nondum notatus Characterē fidelium,

nondum Ecclesiæ gremio receptus,  
gratioso tamen decreto Numinis jam Candidatus.

In quem non credidit, suscepit in Legatis suis Augustino & Sociis,  
Delegantem magnum fore arguens,  
qui tam claros miraculis, tam potentes verbo & opere viros,  
velut Cælestes quosdam submisisset Mercurios,  
nova scilicet è Cælis bona allaturos.

Æternæ felicitatis nuncium excepit gaudens, & laudibus extulit;  
cui ut adhuc tum diffideret,

â Majoribus hausta, amatâque â teneris superstitione imperabat.

Quemadmodum veterano pressi ortam sibi lucem  
obductis arcent valvis, dum omnino revalescant,  
& firmiore visu gaudeant.

Non tamen idcirco infestus aliis eripiebat lucem;  
quin etiam ad favebat, ne aliunde impediretur.

Ita collegit anxios advenas Urbe suâ Doroberniâ, quos nesciebat:  
& sub eo veritate excidit illud:

Ignoti nulla Cupido, nullus amor.

Ut novo stratagemate amorem sibi veritas conciliaret.

Novum equidem vidit, & alienum hominum genus,  
favorum tamen sinu benignè complexus est:  
etsi aut suspecta, aut odiosa esse solent omnia,  
apud summa præsertim Capita Reipublicæ;  
quæ aliena sunt, vel aliunde.

Vitæ necessariis provisum illis voluit, quorum Sectam non admittebat:  
liberalissimus Princeps, sæcundi gratiarum pectoris,  
& amplissimæ benevolentia:

cùm nondum Divinæ munificentia laudes percepisset;  
nec promissa beneficentia præmia intellexisset.

Horrorem facere poterant peregrini mores, & habitus:  
amorem tamen etiam suaviter conciliârunt:  
quia in mentem candidiorem inciderunt.

Non sola nempe similitudo morum, sed & dissimilitudo mater amorum,  
quando Spiritus amoris afflat mentes.



Utpote qui novit optimè, & suevit,  
 non fecùs, quàm pneumatico in organo diversas omnino fistulas,  
 in harmoniam corda concordem animare.  
 Quos modestia ac demissio animi infra omnes abjecerat, ut pusillos,  
 oculis respexit suis, imò & suspexit.  
 Idque eò magis, quò majore se reverentiâ de mittebant.  
 Magnum nempe quid, atque altum in ipsa humilitate notavit:  
 quæ cum amœna sit, rapit animos non superbos:  
 quin & manus pellicit, ut inter violas elevetur.  
 Qui vana numina damnaturi advenerant,  
 & aliam ducturi, docturique vitam,  
 mirum in Rege diversa sectato,  
 Sui, vitæque securos esse jussit, imò etiam fovit;  
 ne ullis subditorum odiis obnoxii palàm forent.  
 Tyrannum timere poterat pusillus grex, & Patrem est expertus:  
 imò plusquàm Patrem.  
 Cum Idololatræ non pauci  
 ne filios quidem CHRISTUM sequentes tolerârunt;  
 nonnulli etiam sustulerint è vivis.  
 Paternis enim legibus irritandis intentum,  
 salvo ubique pede stare voluit,  
 quem Regnorum plurium exemplo poterat exterminare;  
 vel minimùm dejicere supplantando.  
 Evangelio locum dedit, quod non receperat:  
 Converti suos clementer tulit,  
 qui Deorum cultui nondum renunciaverat.  
 Hinc argumentum cape:  
 qui nondum exutus gentium errorem, tam facilis fuit,  
 quantâ benignitate in CHRISTI fideles extiterit indutus CHRISTUM.  
 Ita Rex verè DEO amabilis in ipso quasi flore priùs,  
 quàm in fructu etiam gratioso,  
 Filii DEI nomen fortiebatur.  
 Cælibem Sacerdotum Orthodoxorum vitam obstupuit, & cõmendavit:  
 Cum pretium ejus adhuc ignoraret,  
 lege in membris ejus aliâ etiam tùm dominante.  
 Orandi fervorem, & assiduitatem suspexerat,  
 Cujus mens ultra humana & infima hæc se nondum extenderat.  
 vigilias pietatis causâ susceptas prædicaverat,  
 etsi vanus adhuc animus deliciis sæculi sopiretur.  
 Jejuniorum, & sobrietatis constantiam vix capiebat;  
 quem comoda vitæ escis irretitum suis capiebant.  
 Sed quod celebrare in tenebris delectabat,  
 num imitari deinde in fidei luce piguerit?  
 Quod habuerat in honore cæcutiens,

an illustratis postmodum oculis erubuerit?

Hinc facilis esse conjectura potest,  
quantum Ecclesiæ decus attulerit multiplici virtutum genere,  
qui præconem earum celeberrimum cœpit agere,  
priusquam in se earum dulcedine, & gustu perfunderetur:

hoc est, venales exponere Margaritas antè tentavit,  
quàm pretium earum satis cognovisset.

Fonte igitur sacro mundatum, & feliciter irrigatum est,  
tam candidum aliàs, tam dulce Caput:

in quo sibi cœlum complacuisse videbatur:

Ut in Capite Anglorum Angelis bonis jungendorum scriberetur.

Hoc maculis absoluto, in cætera membra venustas latè diffusa.

Nam ut magnete trahuntur populi exemplo Regum.

Rex velit honesta, nemo non eadem volet;  
nisi hostis fuerit honesti.

Illico cœpit undique resonare CHRISTUS, & coli palàm:

fana dirui, in Ecclesias delubra consecrari, idola subverti,  
superstitiones aboleri, omne vitiorum & scelerum chaos eliminari,  
errorumque tenebris procul abactis, lux affundi:

& in hac amandatâ Gorgone,

faxeis gentium diis verum substitui Numen.

Unde & morum elisa sensim est barbaries;

& feritate dedolatâ, humanitas faciem induit planiorem.

Vidisses Regem eundem, & Apostolum Zelo sacro ardentem,

Omnium virtutum exemplar factum, & ideam;

Verbo egregium Constantini Augusti imitorem:

quia & Augustini sancti discipulum.

Ad omnem virtutem nontam animos,

flabro aromata spirante imitatus Austrum, fœcundabat;

quàm currenti calcar, volanti impetum, oleum ardenti ministrabat,

assiduo conatu GREGORIUS ANTISTES ROMANUS.

Ingens illi ardor & studium fidem agnitam disseminandi:

usque adeo quidem,

ut in Societatem promissæ spei venirent omnes, quos posset adducere;

& pari sorte immortalis vitæ bearentur, inter obnoxios mortali vitæ,

quos par conditio mortalitatis fecerat similes.

Vidêre subditi & Regna exera, Sectatorem eundem, & Suaforem,  
fari non promptiorem, quàm facere meliora.

Quod Augustinus & Confortes ejus humili voce prædicârunt,

sublimi Rex Majestate confirmavit:

& factò grande verbis pondus addidit.

Quod plantaverant illi Apostolorum ritu,

Regiâ hic autoritate, minimè tamen violentâ, propagavit.

Hoc verò etiam pacto felicius omnia processêre,

Providentia Numinis fortunæ rotam dirigente:  
ne extra orbitam ferretur.

Neque sic vel Thebas Amphion fidium concentu erexerat,  
ut suavissimis, & exemplo amabili conditis EDILBERTUS illiciis,  
dura cæteroqui corda subditorum  
in unam Ecclesiam optatissimâ fidei unione conjunxit.

Sed neque Regnum tam fuit amplum,  
quin, ut bona se communicare solent,  
extralimites extenderet hanc pietatem.

liquidem & verbo, & exemplo potens  
alios quoque Reges ad imitationem sanctam invitavit.

Ut nempe suus Miltiadi Themistocles non deesset;  
& columba balsamo delibuta plures traheret ad foramina Petræ.  
Fideles ut fratres, atque domesticos sancto osculo complectebatur:  
utpote quos cives Sanctorum, & domesticos DEI crederet,  
& in cælo secum beatos esse cuperet.

Mirandum simul, & jucundum erat videre,  
usque ad Umbriæ fluvium dominantem:  
Obsequio tamen infimo, & sine umbris, egenis servientem;  
& inter orbis Capita eminentem

ne minimos quidem, etiam â pedibus, aspernantem:  
cum humilibus liberè versantem,  
se ipso tamen inde nil minorem, imò & majorem:  
quia demissione sui Deo propiorem.

Ita se semper attollebat humo, ut procul abesset â fumo:  
in puncto gloriæ acuebat honoris acumen, hebetando;  
ut illud figeret in supremo Virtutis centro.

Tanquam nihil habentem, & pauperem Christi exhibebat sese:  
Cui ad vitæ jucundioris, & Regiæ commoda nihil deerat:  
nisi quod ipse vincendi sui studio,  
virtutisve amore sibi deesse voluerat.

Quibus equidem factis mundo admirandum,  
Cælo autem jucundissimum exhibuit spectaculum.

Hoc verò in eo singulare miraculum, & virtutum compendium:  
Quod felix & continens, fortunatus & sobrius constanter incesse-  
rit, in lubrica etiam via arbitrii præpotentis, animo impressum habens:  
temperantem esse oportere, qui omnium animos temperaret:  
cùm nemo det, quod non habet;

Sobrium, qui sobria tractare consilia vellet;  
sanum, qui sana de rebus judicia ferre cuperet:  
continentem, qui legibus frænare populos desideraret;  
& haltere suo firmum; qui suos in recta optaret stare linea.

Hinc ne dubita sapientem fuisse Regem;  
cùm sapientiæ primarium fundamentum sit sobrietas:

quæ in se virtutum omnium continet femina,  
velut iliadem nuce clausam.

Sanum quoque, ac beatum vixisse, facile intelligis,  
qui Platonem audis: Temperantiam vitæ hominum custodem esse;  
& nihil in homine mali nasci posse, qui continentiam fuerit amplexatus.  
Ideo veterum, ac rectè sapientium Romanorum secutus exemplum,  
quasi matrem bonæ valetudinis, moderationem observavit.

Inimicam utique apparatus ad luxum epulis,  
alienam à poculis cerebro periculosis,  
ab usu Veneris vel illicito, vel minùs moderato abhorrentem:  
ut scilicet medium teneret ubique cum Beatis  
in medio virtutis integerrimæ puncto.

Noverat luxuriâ, & libidine virtutem atteri, & languere victorias,  
Sopitam gloriam in infamiam declinare,  
animique pariter, & corporis vires expugnari.

Epaminondam Sapienter æmulatus,  
tùm vel maximè vigilandum Principi ratus,  
cùm populus maximè, ut solet, indulget genio:  
ne virtus Regia in vanitate plebis evanesceret.

Regias igitur opes, & delicias EDILBERTI  
ne in desidia, luxu, voluptatibus quære.  
Exiis enim, quæ his neglectis, in lucro reposuit,  
tributarium secrevit vectigal Ecclesiis.

Imò & Aulam suam in Ecclesiam convertit per Augustinum.  
Exstruxit Cœnobita conservandis virtutibus apta,  
ut adelphotrophia pietatis.

Episcopatus erexit religioni propagandæ idoneos,  
tanquam publica fidei Seminaria.

Loquitur etiamnum ejus munificentiam Anglia, & Cantium.

Ubi insigne Monasterium Apostolorum Principibus dicavit.

Sub quorum scilicet umbra cum Augustino suo Rex quiesceret.

Ita nempe detractum sibi nimium transivit in optimum temperamentum.

Tandem qui sic vixit, ut non minùs cœlo, ac sibi, quàm suis, viveret,  
abiit è vivis eo TEMPERANTIÆ fructu,  
quo in æternitate felici perpetuò reficeretur.

Sex & quinquaginta annos Regnum tenuit:  
valetudine fere integrâ, & longævâ,

quia & Nutricem, & Solpitem habuit amatam semper TEMPERANTIAM.  
Cujus cultu cùm emineret, documentum Principibus reliquit singulare.

Quod, sicut intemperantia excidium est Regnorum,  
& infame Regum dedecus;

Sic TEMPERANTIA sit utrorumque gloria, & felicitas,  
tum in hac, tum in futura vita.

QUOD SATIS EST , HOC LUMEN ALIT.




Aurea, quam cernis radios diffundere, lampas  
Luce suâ multis astrum imitata favet.

Sic Princeps ostro simul, & virtute coruscus  
Fulgore illustri corda, oculósque beat.

Sanum, & longævum servat moderatio rerum ;  
Quæ, quod lychno oleum, viribus esse solent.





# Encomium exegeticum Temperantiæ Regiæ.

**F**ulgens quod nitidis Cynthus atriis,  
Phœbe quod tenebris, vitæque corpori,  
Hoc vobis tribuit mens jugè temperans,  
Regum, credite, purpuræ.

Hæc densas animi lumine Palladis  
Dispellit tenebras, vestràque plurimis  
Elucere facit nomina sæculis.

Hoc Regum jubar inclytum  
Bellonæ lituos in fera prælia,  
Et lauros animat viribus entheis,  
Hostili rabie pergama liberat,

Fulcit pegmata Principum.  
Heu quantis levitas, immoderatæque  
Vivendi jugulat sæva licentia  
Urbes excidiis! quot tumulos struit  
Terris, fatæque Regibus!

Nunc captiva tenet pectora Principum  
Effrænata gulæ, sædæque servitus:  
Quæ non Elysios Ætheris ambitus

Gratum non Hecates jubar  
Spectandi dederat fas Dionysio.  
Pro vili rapuit Martia poculo  
Sceptra, & lauricomum Lysimacho decus,  
Et prædas dedit hostibus.

Nam pacem Imperii flumina Liberi  
Effrænis rapiunt, inque rebellia  
Subjectos populos classica concitant;

Ut iusta excutiant iuga,  
Et cunctis dominos Sedibus exuant.  
Hinc sanctè vetuit Romulæ Caput  
Urbis, ne cui velpampineis plagas  
Fas sit pingere frondibus.

Quid pleni vacuâ pondere gurgitis  
Cernes Armeniâ Tigride fortius?  
Aut largis saturo corpore pabulis  
Pardo viribus ægrius?

Tempeſtiva famēs illius aggerit  
 Cum curſu celeri robora viribus :  
 Hunc venter ſuperat, fædâque prælio  
     Infamī ſubigit gula.  
 Laudes longa tuas ſæcula concinent  
 Romani Domitor Climatis Annibal,  
 Cui parcus Cyathus, menſâque debilis,  
     Incorruptâque puritas  
 Inter tot fuerant agmina Laidum,  
 Belliquæ juga fors ſub tua miſerat.  
 Sic laudum ſeges eſt læta perennium  
     Corpus vitâque temperans.  
 Hæc ſeptena vigenſ Palladiæ manet  
 Inter fulcra domûs : Pierii jugi  
 Hic fixiſſe ſuas inclyta Numina  
     Sedes, credite Principes.  
 Nempe hæc Niliacos Ætheris abdita,  
 Titanis ſalebras, ſignâque fiderum  
 Myſtas edocuit, tantâque fecerat  
     Longis nomina ſæculis.  
 O ſi magne vibres fulmina Jupiter !  
 Veſtris Eumenides ſternite barbaris  
 Sedis Tænariæ turba furoribus  
     Monſtrum dulce libidinem ;  
 Et nullo domitos limite luxui  
 Devotos animos ſternite Numina.  
 Hæc dulcis, ſed atrox eſca Cupidinis,  
     Omnis colluvies mali.  
 Hæc faſces, & opes, ſceptra, potentiam  
 Regnorum Aſſyriæ Principis ultimi  
 Quàm turpi Ducibus funere perdidit  
     Sævo Mulciberis rogo !  
 Humanos animos, quæis nihil altius,  
 Aut quid nobilius magna potentia  
 Naturæ peperit viribus exuit,  
     Nativumque rapit decus.  
 Hoc altis inhiat ſedibus impigrum  
 Dulce, at grande malum, bellua peſtilens.  
 Huc primùm gladios, telâque vertere  
     Ignita expediet, luem  
 Hanc, monſtrum hoc validis ſternere viribus:  
 Cingetque uberior laurea vertices,  
 Et vitæ ſeries tardior evehet  
     Longis nomina ſæculis.



# S. EDUARDUS REX ANGLIÆ

Synceritate fidei, veritatisque gratiofus.

**N**Umera ftellas, fipotes, virtutum;  
Quæ in hoc Rege Anglico, & Angelico  
tanquam Sereniffimo Ingenui Candoris firmamento,  
ad amabile Regiæ æmulationis Incendium fulsere;  
fulgebuntque ad splendorem non inanem in perpetuas æternitates.

Unum calamus obtendet unguiculum;  
ex quo, quifquis amans es iufti, metire Leonem.

Etenim EDUARDUM hunc  
an Regem in Regno;  
an in virtutis arena Palæftritam,  
an Incarnatum Angliæ Angelum dixeris?

Vix, aut ægrè decideris.

Ubi tamen trinum hoc in Eodem perfectum fubftitiffe ftatu-  
eris, rem acu tetigeris.

Nam & Regem, & Palæftritam, & Angelum  
eo gellit æquipondio;

ut quavis mole negotiorum occurfante,  
neque ad dextram, neque ad finiftram defle-  
ctens, medium virtutis callem conftanter terendo,  
in bene agendo callum obduxiffe vifus, Mediòque tutiffimus,  
non aliâ, quàm Regia, ad Sanctimoniam viâ,  
ut Regem addecet, ambulet;

& Coronam ipfam virtute coronaret.

Ex hac equidem linea omne tulit punctum:

**D**um ita concinnè fulgentiffimum Probitatis aurum Regali Purpuræ intexuit;  
ut & Regni, & virtutis omnigenæ Rex  
non tam audiret, quàm efferet.

In arduis quippe Hercules, in perplexis Thefeus,  
in bello Hector, in pace Gallicanus;  
ut Cordatum fe in omnibus exhiberet.

Non deerunt fortè tamen, qui excordem fuiſſe putent;  
ſi recolant animo, quòd cor ſuum non tam inter coſtarum abdita re-  
clufum, quàm

quàm in lingua, & manibus gesserit apertum.

Quò SYNCERIORI esset in omnes FIDE :

& vel hac arte omnium sibi corda devinciret.

Optimum quippe toto orbe Commmercium judicavit ;

si linguam inter, & cordis Provinciam

confœderatio sit mutua, amabilisque nexus:

quo, tanquam Gordio quodam adamantino,

facra amicitia, ac pacis jura stabiliantur.

Neque verò ignorabat, necesse ad hoc omnino esse ;  
ut quod mens Dictatricis instar, suo in dicafterio agitaret ;

fidelis ejusdem amanuensis Lingua sine dolo promeret ;

in tabulas utique veritatis referendum.

Dum Regem se esse meminit,

siderum Principis in se imaginem vidit.

Cujus indolem cum prætextâ indutus non degener ab hoc prototypo,

serenior & suis, & extraneis illuxit.

Verùm non tam ab ovo, quàm ortu,

ingressum Regni vias intuere.

Solem hunc velut in auroræ gremio,

latitantem etiam tum subter Matris viscera,

candido haud dubiè calculo,

in Regem delegisse visa est fortuna ;

& candidiore suffragio

suam isti cœlum sententiam junxisse, certum.

Siquidem ab Ipso APOSTOLORUM PRINCIPE,

inauguratione rarissima,

in Regem unctus memoratur.

Ita verò etiam deinde,

ut Dictator ille siderum sua trabeatus in luce Horizontem ingrediens,

antesignanæ Lucis purpurâ, velut umbrarum debellatrice,

omnem inimicæ noctis propulsat caliginem ;

exactisque tenebrarum copiis,

& abolita nocturnæ mortis imagine,

cum die vigorem, & vitam orbi reddit :

EDUARDUS quoque suo in folio feliciter emicuit ;

& optatis Regnum radiis animavit.

Nulla Ei ut lucis Angelo, cum doloso noctis genio amicitia ;

Nullum cum tetrâ stropharum Politicarum spectris commercium ;

Nulla inter fucatas fraudium nebulas consistentia.

Idcirco ut osor fallaciæ, cordiali candoris jubare perstrictos

& assentatores, & Palpones procul amandavit.

Illustri SYNCERITATIS radio extinxit vafritiem,

infaustasque Machiavelli noctuas propulsavit.

Semper discordes Phrynondæ exosus antitheses,

ludum Sinonisludere nescius,  
 Ulyssistechnas, acPyrrhandriSophismata,  
 recti, verique tenax Veritatis amafius  
 cane pejus & angue est execratus.  
 Dixilles Regiam ejus linguam genuina SYNCERITATIS indole imbutam,  
 & Magnetismo tinctam Sympathico.  
 Utpote quæ nè ad unguem quidem  
 à virili, Regioque verbo,  
 tanquam adamantina fidei regula, unquam exerraret;  
 nunquam à VERITATIS ARCTO,  
 tanquam cardine Politici cœli summo, declinaret.  
 Loquuntur hoc Principum, Regumque fasti:  
 ad quos ubi Lingua prævolaverat,  
 jurata vel ad sonum pedisse qua  
 secuta est & manus Executrix:  
 corde scilicet & hanc, & illam dirigente.  
 Plura Vaticano facundum eloquio, summiūque in terris Ecclesiæ Caput  
 suis posset è regestis de hoc amore veri promere.  
 Huic enim ut summum semper habuit honorem,  
 ita intimos mentis recessus, penetralia cordis, animique sensa  
 candore semper integro, eaque fide referavit;  
 ut omnes filii partes implēse diceretur.  
 Collactaneâ edoctuserat id virtute;  
 supremo Orthodoxorum Patri rectissimè arcana quæque pandi:  
 utpote cui claves humanorum cordium ad cœli fores aspirantium  
 obtigissent è Cœlo.  
 Eodem verò candore, quo filium se Pontificis probaverat,  
 pauperum se Patrem præstitit EDUARDUS.  
 Ac primū quidem,  
 nè subditos metuenda fortè paupertas premeret,  
 Onera ab eorum humeris non pauca submovit:  
 sed & tributorum partem liberali statuto remisit.  
 Eoque facto gloriosus victor  
 non fictum illum, sed verum, & inimicum veritati Cerberum,  
 quem collectis incubantem numis viderat,  
 non jam in lucem protraxit ex orco,  
 sed in tenebras orci profligavit.  
 Deinde verò etiam  
 non tam promissis, quàm factis erexit,  
 quos paupertas dejecerat:  
 ut nobilitatem suam non jactaret multa promittendo,  
 sed plurima præstando veram comprobaret.  
 In lamenta solvebatur miseria? illico Regia commovebantur viscera:  
 fatiscens nutabat inopia? Regia confestim adfuit fulciendæ dextera.

Ut quod sedebat intus animo, re ipsa staret foris.  
 Neque verò curta unquam ad succurrendum supellex esse poterat;  
 quam amplissima Regis pietas ad fines orbis extendebat.

Larga cum primis manu occurrere solebat iis;  
 Quos à petenda stipe privatos inter lares honestas cohibebat.

Nosocomia extruxit languentibus,

Xenodochia peregrinis,

Orphanotrophia derelictis.

Quos verò extra ejusmodi paupertatis asyla errare viderat,  
 apertâ passim crumenâ solabatur.

Ut vel hoc visco sibi caperet aves;

quæ felices in cœlo forent Oscines.

Sanctæ nimirum est avaritiæ strophæ:

dare pauperi, ut Domino scenereris.

Ita namque meliori modo deerit,

tam quod habes, quàm quod non habes:

Illud, quia in CHRISTI minimos dispersum:

istud, quia in cœlestes Thesauros congestum,

tuas est extra manus.

Imò verò sic & quæ habes, & quæ non habes,

omnia fient magis tua:

utpote in æternitate tecum duratura.

Hoc uti probè noverat EDUARDUS,

ita Sanctâ quâdam usurâ exercebat.

Adéoque eò longiùs largam porrigebat manum:

ubi dando plura, plura caperet, sine dolo, vel usura.

Quod quia non fit verbis:

Verbum, quo solabatur miseros,

& manus habuit, & pedes.

Nè cum sono tantùm evanesceret, sed & nubes penetraret.

Et verò etiam inde respondit Echo:

quæ non carebat manibus.

Nam cùm Sacerdoti ad aras facienti assisteret,

CHRISTUS levata illic manu Eidem benedixit.

Sed palmare unum, alterùmve admirare,

& misericordiæ, & Candoris argumentum.

Adierat Regē non tam suis, quàm alienis pedibus, pauper membris captus;  
 petiturus eleemosynam tam grandem;

ut pauci Principes eam vellent, multi non possent erogare.

Memorabat quippe mendicabulum illud,

ab Apostolorum Principe promissam sibi sanitatem;

si bajulo ad templum Rege uteretur.

Quonam responso solverent ejusmodi quæstionem

vel infimæ sortis Toparchæ?

An non plurium ora sive rubor, sive pallor oberraret?

Annon suspecta multis forent omnia?

Quid igitur hîc EDUARDUS?

Nil cunctatus, quàm hilari fronte, tam prompto corde,  
pio huic oneri substernit humeros;

Et pompâ plusquam regiâ defert ad aras:  
moxque in stipem optatam reddit sanitatem.

Ita extemplò factus est Æsculapius in templo:  
eâque medendi vis Regiis illius manibus adhæsit;  
ut non tantùm pluribus ægrotis esset sospitator:

sed non nulli etiam cæci lymphâ,  
quâ suas ipse manus abluisset,  
oculorum suorum tenebras eluerent.

Ita quò se charitatis, & simplicitatis ductu demisit magis;  
eò amplius à Domino, quem fuerat imitatus, est sublevatus.

Ita virtus, quam cæcus in pauperes amor,  
& præfulgidus ille MENTIS CANDOR ex oculâsse visus est;  
eòusque inclaruit, ut tunc maximè sit visâ Cœlitibus,  
quando se ipsam non videbat.

Porro quia connubio, ad quod invitum proceres adegere,  
virginitatem, nobiliore scilicet matrimonio, copulaverat;  
affectu teneriore ferebatur in DILECTUM DOMINI DISCIPULUM:

Angelus nempe in Angelum,  
quia in Virginem virgo.

Nè verò & huic amoris suus abesset CANDOR:  
ita sanctum hunc diligebat, ipso etiam factò;  
ut nulli quidquam, & unquam denegaret,  
quod amore Dilecti fuisset expetitur.

Hanc autem syncerissimam pietatem  
Regio deinde etiam annulo lucentius obsignavit:  
ut eò firmior utrinque staret fides, & simplicitas  
amoris minimè fucati.

Adfuit enim, ad lydium scilicet exploraturus aurum,  
non tam fortuito casu, quàm sacro amoris astu,  
mendicabuli personam indutus

DILECTUS HIC APOSTOLUS.

Eteccè

noto sub ignoti, imò melius noti nomine  
stipem flagitanti,

seu quòd aliud in flagranti non esset ad manum;  
seu quòd personatus id ipsum Sanctus designaret:  
ne cordiali quidem digito pepercit:

ut nempe rem ex corde totam agi, certum foret.

Sed extractum inde annulum in donum offert verè regium:

quòdque majus est, & præclarius:  
in donum CANDIDE AMANTIS.

Ufus est hæc eâdem tessera & JOANNES:  
ut suum & ipse contestaretur amorem.

Annulum remittit EDUARDO;  
& unâ nunciat mortis horam.

Quânimirum candidus hic Adamas  
æternitatis annulo sit inferendus:

in quo quàm Virginei, tam candidi  
perpetuò sibi conjungerentur amantes.

Accepti hunc nuncium lætissimo Rex animo;  
& mox toto vulgari Regno fecit:

Quò plura cum piorum precibus colligeret suffragia  
in eam horam servitura.

Ut qui candorem semper amaverat,  
candidis candidorum calculis adjutus,  
tanquam cœli candidatus,

faciliùs, & feliciùs è vivis morientium abiret  
in regionem viventium.

Abiit verò etiam quàm felicissimè:

& animum quidem Virgineum  
sacro Virginum choro sociavit;

corpus verò multo tempore integrum reliquit  
in thesaurum suis maximum.

Ita verò etiam non tam Anglos, quàm Angelos docuit imitari,  
Angelica mentis & corporis integritate

INGENUO MENTIS CANDORI,  
velut Angelico cum primis ornamento,  
sociatâ, perpetuòque lociandâ.



# CONCORDANT INTIMA SIGNIS.



Quàm bene concordant; neutro fallente, sonora  
Auroræ automaton, Memnoniumque melos!  
Adnantes conchæ patulo velut ore fatentur:  
Quod spes, hoc res est; nullus utrinq; dolus.  
Scilicet & Princeps aures, oculósque meretur;  
Si, quod verba sonant, córque manúsque probent.





# Encomium exegeticum

## Fidei & Veritatis Regiæ.

**O**Rbem subactum pectore candido  
Quicunque tractat, semper amabili  
Linguae maritat dexteram.

Hæc executrix invariabilis  
Quod verba spondent, sancit aheneis  
Firmare factis. Regio

Nunquam recumbit pectore discolor  
Ulyssis astus : Fallere nescia  
Ut sit loquela Principis.

Regum coronâ pileus est minor :  
Sed necolari pileolo decet,  
Cui pondus orbis incubat.

Verum ut coruscus temporis arbiter  
Nimbosa postquam sævit impete  
Hyems maligno, denuò

Vernante cœlo clarius emicans  
Depectit Æthram, & rumpere nubium  
Gaudet phalanges Cynthius ;

Ac mox odoris gramina floribus,  
Arbos renatis luxuriat comis,  
Tellusque læta subfilit :

Sic Rex triumphat, qui nivis æmulam  
Lactante cœlo, fuxit ab ubere  
SYNCERITATEM. Qui solet

Regale Sceptrum tingere eburneo  
Nitore veri, justæque limpidis  
Servare pactis integra.

Cui candor oris, verba adamantina,  
Pectus patescens cum stabili fide  
Phœbusque mentis albicat,

Hic æviternis sceptrâ securibus  
Felix maritat; sole nitentior  
Dispergit umbras : omnia

Quæ perduellis Cerberus evomit,  
Quæ toxicati filia Tænari  
Circe propinat, excutit.

Enubilantur Tartarei doli;

Sphinges necantur, monstra Acherontica;

Perit caligo fraudium.

Sinon recedit, Laomedontia

Facunda pestis, vafrities cadit,

Et multa fucis illita.

Est, est supremi Numinis indoles,

VERACITATIS CŒLICA TESSERA:

SI FACTA VERBIS CONSONENT.

Verbo Tonantis stat manus efficax

Propinqua semper. Dixit: & omnia

Sunt facta verbo, & unico.

Sic VERITATIS quisquis amarius,

Authoritati Pondus, & auream

Addit coronam Nomini.

Mendaciorum Vendere spongas,

Et discolori mentis in abdito

Vestire linguam Proteo,

Tenebrionum est, fæcis & algidæ,

Suetumque lixis. Est stygii horridum

Laværnionis ectypon;

Est fraudulentæ machina Vejovis;

Est larva Ditis, spumæque Cerberi:

Si verba corde deviant.

Mendax Ulysses, caudula vulpium,

Os Saccharatum, sed sine dextera,

Sunt monstra plusquam Caspia.

Nec stant perenni commoda Patriæ

Innixa fulcro: quæ stetit, occidit

Lapsu pudendo gloria:

Ruunt colossi, pergama concidunt;

Pax subditorum ter lacrymabili

Procumbit ictu perdita.

Fœdè implicatur Gordius Imperii,

Nodisque nodis illigat improba

Mendaciorum vertebra.

Eclipsis inter sidera Consilii

Non una serpit: quin etiam occidunt

Quandoque luminaria

Majora, casu non reparabili;

Atque in ruinas se Phaëtonias

Cæco resolvunt impetu.

Tantum est, dolosis carbasa pandere

Ventis, & alto credere se mari:

Si præses absit VERITAS.



# S. E R I C U S

## R E X S U E C I Æ

Constantiâ clarus.

**H**Uc, qui monstra desideras,  
raram in terris avem,  
album cernes corvum:  
nihil tamen insolens in septentrione.

Nempe inter aulæ corruptelas rectum & tenacem propositi virum:  
imò & hoc ipso Regem.

Quidni enim Rex, qui posuit metus?  
flekti nescius, præterquam in melius.

ERICUS hic est,

Adamâsne, an vivum adamantinæ constantiæ simulacrum?

Sidus hoc Principum succendit orbi Suecia:

quod solem dicerem,

nisi maculas juxta ignorâisset, ac eclipses.

Mirum verò tantiluminis patriam  
etiamnum tenebris laborare.

Sed talparum, ac nycteridum hoc fatum est,  
ut velin meridie cæcutiant.

Erras autem, si lumini imputes, quod vitium est oculorum.

Natales etsi non serenissimos,  
illustrissimos tamen habuit:

Regio stemmate, quanquam non Regibus natus.

Nec id sine Numine:

sive ne debere videretur sanguini,

quod habiturus erat â virtute;

sive ne hic sol ortus in purpura,

fædum procellis præfagiret meridiem:

melius occasum martyrii accensurus murice;

qui optatum tibi,


obvolute errorum umbris septentrio,

postliminio manè parturiret.

Ergo in auras editus extra aulas,

virtutem privatis incolarum

non mirum, si feliciusprehendit.



Hujus ingressus academiam,  
 non citius evasit discipulus,  
 quàm Magister.  
 Docere potuit puer, quæ senes ignorabant;  
 & crepundiis erudire canos ad ruborem:  
 melior Philosophus in prætexta,  
 quàm in pallio nonnulli.  
 At ne desipuisse putes, dum præmaturè sapuit;  
 virili CONSTANTIA præcoces juventæ fructus condivit:  
 nihil ut immaturi saperent,  
 qui florem præverterunt.  
 Annorum cruditatem castigavit solertiâ,  
 nihil aggressus, quod non suis absolveret numeris.  
 Fatuos exofus ignes,  
 qui ad prodigium in ortu lucidi,  
 ut crescunt annis, sic â splendore degenerant,  
 dum tandem evanescant.  
 Meliùs Solem æmulatus:  
 qui oriens quidem pleno micat lumine;  
 sed ad occasum usque nihil â fulgoris majestate remittit.  
 Interim rege suo orbatur Suecia.  
 Quis hîc ambigat, subrogandum ERICUM?  
 certè vota omnium occupaverat,  
 vel ante comitia.  
 In CONSTANTIÆ tirocinio institutus ad sceptrum,  
 vel nesciens debitum fert,  
 si ab honore candidato ambiatur.  
 Postulatur ergo ad regnum:  
 imò regnum mutare jubetur,  
 antè Rex fui, nunc futurus & aliorum.  
 Quanquam & mansurus fui.  
 Servit enim potiùs, quàm imperat aliis,  
 qui sua excidit potestate.  
 Dignus regali apice nullius non calculo, præterquam suo:  
 at hoc ipso dignior, quia sic indignus.  
 Abnuît tamen ERICUS,  
 nunquam solitis placitis accedere vulgi,  
 utpote magistri levitatis.  
 Nec annuisset unquam,  
 nisi vocem populi intellexisset esse vocem DEI;  
 quam vel inter confusos dignovit strepitus,  
 tanquam unice familiarem;  
 ut qui DEO quotidie colloqueretur.  
 Huic dum se subjicit, tertium meretur regnum:

imò & capessit.

Nam & DEO parere, regnare est.

Quo quidem de eventu ut nemo dubitet,

Coronâ, quam regni scutum exhibet, insignitum ternâ videat.

At verò folio illatus mutavit scenam, non personam,

perpetuâ virtutis CONSTANTIA:

quæ jam sub purpuræ involucro

ambitiosius etiam, quàm antè, se efferebat.

Caterùm idem recta persequendi institutum Regi, quod privato.

Primus forsan ut esset,

in quo honor mores non mutârît,

ne in meliores quidem:

quia semper servârat optimos.

Princeps ei cura, ut genuinam veri Principis ideam expingeret:

ideóque omnem sceleris umbram declinavit:

nullâ humanæ censuræ curâ,

dum pingeret æternitati.

Effigies ad vanitatis aram appendendas

ejusmodi dehonestamento credens honestandas:

at imaginem in sacrario Divinitatis dedicandam

novo censens elaborandam artificio, absque umbris:

ut judici oculo supra solem lucido probetur.

Idcirco animum præcipuè obfirmavit in recto:

quod in sublimi locatus,

quod varii perflant turbines,

perstaret firmior à lapsu.

Voluptates procul habuit, ut blandas pestes:

probè gnarus, non alpes Hannibalem,

sed Campaniam enervâsse:

indignum autem esse, mentem, quæ vulgo emineat,

sterni telo tam vulgari.

Primum ergo edictum tulit in illecebras

dudum reas Majestatis:

quas & exilio multavit,

postquam tot imperia prodidissent.

Hisdem junxit Cupidinem profanæ Veneris cæcam pupillam.

Sive quia malè conveniunt majestas & amor;

sive quia metuebat regno;

cujus non rex, sed vel inquilinus esset iste puer.

At læsus amorabit in furorem:

& quia armatus est,

clasicum canit in ERICUM.

Hunc ille ut expugnet hostem,

orditur pugnam à fuga:

ingens CONSTANTIÆ monumentum, dum non itat.

Quando tamen & decernendum cominus,  
ne fortè semper fuga notaret ignaviam;  
novo congressurus pugnandi genere,  
glacialis aquæ cados iubet apparari.

Fallor, an Neronis revocaturus tempora,  
Aqueum instruis amphitheatrum ERICE,  
novam spectatori exhibiturus cœlo naumachiam?  
an potiùs hic ille circus est,  
in quem antagonistam Venerem provocas ad certamen,  
ludos daturus verè olympicos?

Ita nimirum, ut quæ malè nata in undis,  
undis extingatur:

& cunæ dent, sandapilam.

Quando eodem in fonte quærenda veneni antidota,  
unde pestis emanavit.

Sed actum agitur.

Nunquam se huic palæstræ committet Venus:  
quæ inimica frigori, nativisque amica ardoribus,  
& delicata pro sexûs more,  
ma vult in pluma, quàm brùma, decertare.

Mergitur interim argentibus undis invictus pugil;  
& toto se proluit corpore:

sive ut Spartani æmulus roboris  
hoc in Eurota induret artus in luctam;  
sive ut totus obrigescat in glaciem,  
contra tentamenta voluptatis  
tam lubricæ, quàm glaciatae.

Quanquam si modò obriguisset in glaciem,  
dissolvi poterat ad ignes Cypridis:  
nunc ad eosdem etiam obfirmatur.

Ut Stygium amnem has undas dixerim;  
quibus merfus Æacides melior  
igneæ Cupidinis tela sine vulnere potuit exceperisse.

Venus autem, dum non vincit, victa  
palmam concedit, victorique cedit.

Bene habet: vicisti ERICE,  
ipsa hostis confessione superior!  
Nunc tuo in cado, velut essedo triumphali,  
ipse tibi æternum sta trophæum  
animi in voluptates obfirmati.

Novus, & melior Democles obtinuisti à glacie,  
quod hic ferventi quæsit in aheno.

Utrûmque tamen si compono,

Democlis victoria haud parùm ab ascendente  
 non tam bullientis aquæ,  
 quàm vanæ gloriæ fumo obtenebratur:  
 tua verò in æmula cryftalli glacie  
 sinceræ mentis symbolo,  
 splendore geminato elucescit.  
 Meruisti coronam:  
 nec aliam, quàm myrteam:  
 non tam quia cum Romano illo  
 rem gessisti sine sanguine;  
 quàm quia triumphas de Venere:  
 cui sacra myrtus.  
 Quanquam jam ternis suo in insigni  
 te Suecia coronis ornat:  
 Sive quòd mos est Belgarum populis,  
 triplici ferto cingere Virgines;  
 sive quòd uno in certamine  
 & profligasti hostem tibi,  
 & servasti civem cælo:  
 adeoque verus Imperator innumeris exemplo  
 parem ad victoriam præivisti.  
 Cado nunc felici insculpimus encomium.  
 Non solus Diogenes in dolio philosophatur,  
 Cynicæ quondam palæstra pervicaciæ:  
 Christianæ jam gymnasium evasit CONSTANTIÆ  
 Rege magistro nobilitatum.  
 In hoc ERICUS aperuit ludum;  
 ex quo non verbis, sed exemplis  
 voluptatis contemptum,  
 & sanctam in illecebras docet obstinationem.  
 Accede orbis, & disce.  
 At non minùs contra aurea, quàm ignea tela,  
 animum exhibuit invictum.  
 Falleris Philippe: cujus sententiâ nihil auro inexpugnabile.  
 ERICI animus est ille scopulus:  
 ad quem victrix hæc mundi machina naufragatur.  
 Inauditum populi suo cum Rege certamen spectavit Suecia,  
 dum ille opes nolenti obtrudit,  
 hic obtrusas volens respuit.  
 Utrique ad victoriam tantò rariore contendunt viâ;  
 quantò insolentius est,  
 tributa sibi imponere subditos,  
 & prohibere Reges.  
 At Gallicanum hunc Herculem constantior vicit ERICUS:



repulitque vincula tot cordium illigatione famosa.

Quamvis non eo, quo sperabat eventu.

Nam dum vectigal abnuit,

ad vectigal impulit:

sanctius tamen, quia non nummorum, sed animorum.

Interim stabit hæc invicto Principilaus:

Mentem illum gestasse eo adamante obferatam;

quem olim nec imber aureus reclusisset.

Bene equidem.

Quis enim non indignè ferat,

auro Regem subjici, cui vel à subditis imperetur;  
aut Divinæ potestatis æmulum damnari ad metalla?

Maluit soli similis esse ERICUS:

cujus est, minoribus astris lucem concedere,

non ab iisdem mutuari.

Rejecit obtrusas opes:

ne confusione indigentiae macularet purpuram;

aut certè, ne voluptatis admitteret incentiva:

qui voluptates dudum subegisset.

Gnarus, Romanis plus Asiæ divitias,

quàm Cannas, & Trebiam obfuisse:

eosque non hostium acinace,

sed opibus eorundem captis fuisse subrutos:

parvo discrimine, ferrone, an auro, juguleris.

ERICUM verò domi tam fortem

quis miretur, non minus animi in hostes attulisse?

Nempe eruditum in umbra ad soles,

& inter domestica pericula victoriis peregrinis præludentem.

Ingens harum seges Finonum natio,

Prætoria tenebrarum principis acies:

eoque in ultimos seposita recessus aquilonis;

seu ut tueretur sedem imperii,

seu ut quondam inde emissâ,

orbem iterum cultui dæmonum vindicaret.

Huic certè sacramento auctorata,

veri Numinis vel ipsum nomen averfabatur.

Nec aliis opus, ut hostem haberet ERICUM:

qui nihil unquam moderat, præter scelera, & superstitionem.

Ergo inimicitias palàm professus,

quam it perditum, salutem offert genti:

victoriæ metam statuens hostium felicitatem.

Hanc ut recipiant, precibus rogat, etiam armatis.

Sed obstinata in malo impietas

indomita cervice obsistit:



fructu non alio , quàm ut flecti renuens frangeretur.

Iteratis ERICO colliditur præliis ,  
suâ quasi pertinaciâ CONSTANTIAM hujus esset expugnatura.  
Saxa diceres impingi in chalybem :

nec vanè.

Mox enim illustrissimus fidei splendor emicuit :

quo illustrati barbari  
colla non citiùs victori ,  
quàm Christo, supposuère.

Lætitia tamen ERICO non integrâ :  
qui lacrymis vel in triumpho madens ,  
infelicitati ingemuit eorum ,  
qui perire maluerunt , quàm salvari.

Adamantem hædorum sanguine eliquatum crederes.

Sed ô invidiam virtuti semper inimicam !

ERICI victoriæ quot hostes domuerant ,  
totidem excitârunt ,

tantò quidem peiores , quantò familiariores.

Antesignanus omnium , nescio quæ ex orco furia , Magnus :  
dignus hoc cognomento :

at non aliter , quàm æternâ per orbem famâ Herostratus.

Hic palmis cupressos destinat inspergere funestas ,  
& victoris gloriam ejusdem sanguine obliterare :  
sic tamen etiam , & magis , velut purpurisso illustraturus.

Divinis aderat pius Rex :  
nec quære , an pro more.

Palmari sibi duxisset probro ,  
desultorio duntaxat cultu Numen venerari.  
Quidquid egregium constat hoc de Principe ,  
id proprium vitæ totius decus est.

Sacris nondum peractis , atrox adest rumor ,  
imminere sicarios.

Dilabuntur cæteri : solus cum Christo perstat ERICUS :  
ut quæ ei meliùs , quàm Plato quondam Antimacho ,  
unus esset instar omnium.

Nec movetur enormitate periculi :  
qui periculum omne dudum infra robur suum duceret :  
ratus , ut scelus tuta etiam metuit ,  
sic virtuti nec inter discrimina trepidandum.

Perstrepat infestis armis vicinia :

non tamen stationem deserit ,  
aut pium obsequium abrumpit ,  
sanctior Protogenes ,

manum non remoturus â tabula , vel in medio hostium ;

dum

Dum absolvat opus.

Indignum Rege ratus, authorem esse operis imperfecti:  
nisi fortè tumultus non advertit animum,  
meliùs in cælos defixum:

aut novus Archimedes scribendo virtutis circulo intentus,  
parùm pensi habuit, quid circa se ageretur.

Donec nefarius percussor ferro abruptit laborem,  
imò consummavit:

& ERICUM circulo beatæ inferuit aternitatis.

Quâ invidenda martyrii coronide  
dum hæc Regalis CONSTANTIÆ ornatur columna;  
ipsa jam sibi augustius quovis alio  
stat gloriæ monumentum.


Cui meliùs inscripserim,  
quàm quo olim gloriabatur ille:  
se non philosophandi priùs, quàm vivendi, finem fecisse.

ERICUM vivendi finem fecisse cum virtute,  
& quidem CONSTANTISSIMA:  
hoc est, etiamnum vivere:

Quando virtus vivit etiam post funera.



NEC SISTUNT CURSUM, NEC STATIONE MOVENT.



Eximium celsæ decus est constantia mentis;  
Quã nec blanda trahant, nec metuenda fugent.  
Hoc & in Engonasi Tyrinthius exhibet Heros;  
Et qui stagna levi vomere fulcat olor.  
Consilio Princeps fortunam vincit utramque;  
Si sit in officio firmus ubique suo.





Cessisse, quovis cellior impetu,  
 Fatigue jactu non superabili:  
 Et probra mentis fastuosæ  
 Ingenio superare doctus.  
 Isest, qui Olympo vertice non minor  
 Incedit, auras, & variantium  
 Transgressus arces nubilorum  
 Empyreæ regionis hospes:  
 Magnoque Divûm concilio inferi,  
 Utcunquæ mistus terrigenis agat,  
 Meretur, & summæ Deorum  
 proximus accubuisse sedi.  
 Sic nempè vultu Jupiter aspicit  
 Terras eodem semper inanium  
 Experte curarum, Gigantum  
 Sive furor minitetur Ossam;  
 Sive inquietas impia concitet  
 In arma gentes sanguineo ferox  
 Erynnis æstro, barbarique  
 In rabidas furientur iras:  
 Ut regna clades obruat, & cruor  
 In stagnatè defluus, ac faces  
 Per arva bacchataë nefandum  
 Objiciant oculis theatrum.  
 Terris superstat propositi tenax  
 Vir, cui serena ludus in obvias  
 Exire majestate mortes,  
 Atque truces hilari tyrannos  
 Terrere vultu. Qualis in ultima  
 Firmatus alto pectore Regulus  
 Tormenta, quò decus Quirinum  
 Affereret, patriæque honorem.  
 Ultro vetantes exilium Patres,  
 Flentésque natos, ut capitis minor,  
 Aferemovit, quando Byrsam  
 Egregius properavit exul.  
 Ubi & feroces Asdrubalis minas,  
 Crucemque, & ignes hoc animò tulit;  
 Quo proprios quondam triumphos,  
 Ac Equitum populique plausus.  
 Hac arte summi cælica Principes  
 Tempa attigerunt. Quos merito haud minor  
 CONSTATE qui planta sequetur,  
 Sidereo bibet ore nectar.

# S. FERDINANDUS R E X C A S T E L L Æ , E T L E G I O N I S . Prudentiâ conspicuus.

**G**Randia semper in occidente Nomina FERDINANDI,  
non quodd Hispaniæ Grandium, & Alemanniæ Magnatum:  
sed Summorum Iberiæ Infantum, Maximorum utriusque Regum,  
Quin etiam Imperatorum.

Quasi lumina non occidua sunt inter terrena Principum Numina,  
in Horizonte gloriæ eminentioris.

In uno FERDINANDO hoc nomine Tertio, Castellæ, Legionisque Rege,  
plurium Iliadem, omnium Compendium obstupuit Orbis.

Fuit in eo FERDINANDI I. Magni Regis regiarum magnitudo virtutum.

A FERDINANDO item Secundo, secundiores per bella adores,  
imitatione magis, quàm sanguine;

Nepos Gloriosus sibi fecit hæreditarias, & secundissimas.

Eademque decora, ut à duobus nominis sui Regibus hausit:

sic duplicato fœnore in quaternos ejusdem nominis Hæredes & Nepotes,  
Cæsareæque etiam coronâ clarissimos  
quàm felicissimè transmisit:

ut vidit, & hodie dum videt AUSTRIA:

Inter hos tamen Planetas tanquam Sol;

inter Aquilas has tanquam Phœnix,

prærogativâ emicuit singulari:

quia in summo fastigio, quàm rarum, tam clarum adeptus nomen Sancti.

Alphonso Legionensi Rege, & Berengariâ Alphonso Castellæ Regis Filia

Parentibus Porphyrogenitus FERDINANDUS,

videri poterat à Patre nihil, omnia à Matre traxisse:

itâ Ledam virtutum claram vivâ circumferebat imagine,

& Castor, & Pollux in seipso sibi.

Tantum interest bonam habuisse matrem,

ut, licet Heroum filius, non possis esse noxa.

FERDINANDI certè, si ullus uspiam, partus secutus est uterum:

ut præstantissimus præstantissimâ nasceretur.

Itâ, quod Blanca Gallis dedit in Ludovico seriùs;

hoc Berengaria Hispaniis bis, quia citius, contulit in FERDINANDO.

Par Nobile Fratrum, rectique, & virtutis amore Gemellum,  
duabus tamen simillimâ virtute Sororibus,  
dispari tantum temporis, & loci conditione prognatum.

Hæc DEI providentissima fuit Sapientia, & Æquitas,  
ne alterutri Firmamento majora deforent luminaria.

In monte quoque iam editus FERDINANDUS,  
lucem vix accepit, & jam dedit.

Quidni fastigiatae Turres Iberiæ venerabundo gestu  
Solem suum per Occidentis juga primo mane refulgentem  
salutarent, & adorarent?

Quantus olim futurus esset, nativa dictâ celsitudo visa est  
ex monte tanquam cathedra:

ne dubitari posset, nil humile, nil abjectum animo suscepturum,  
qui de monte, vix natus, etiam summa despexisset.

In vanum certè non parturiit hic mons Hispaniæ:

quia generosum Leonum Castellorum Catulum in regio hoc foetu dedit:  
qui suam comprobavit originem fati,

in montibus, & campis magno multorum bono Magnus.

Inter brachia Matris arctatus Infans tornatiles explicuit palmulas;

& necdum puer Patrem egit pauperum, vel â cunis.

Bullas è collo pendulas in egenorum turbam quasi per ludum deflabat:  
ut, quod magnos decet, nihili faciens ipse bullas,  
cuique suas esse sineret.

Quod ne frequentius actitaret, nummulis implenda erat manus;  
quos in arentem mendicorum terram pusio aureus deplueret,

Rhodos imitatus imbres.

Adolescenciam ingressus est sinè pueritia;

adeo nihil pueriliter unquam egit:

supplente ætatem virtute senibus imitanda.

Lilium inter spinas vernantis ætatis illæsum retinuit,

raro in adolescentia floris prodiga prodigio.

Solis viam tenuit in erroneæ ætatis cursu:

cumque non erraret cum stellis, correctore non eguit:

cum labe careret, censuræ non subjacuit.

Ter senos numerans annos, senes annosus est supergressus.

Fuit namque in eo senectus venerabilis morum, & cana PRUDENTIA.

Quæ cum omnes raperet in stuporem,

Matrem Castellæ Reginam ita attraxit in amorem, ac æstimationem;  
ut dignius eam efferrî non posse crederet, quàm ad Solium Regium.

In Filium ergo transferens regnum, metaphoram fecit:

qualem olim in Perdiccam Alexander.

Vel ideo exactam, quia de loco proprio, in proprium etiam locum PRUDENTIÆ:  
in FERDINANDUM scilicet præstantissimum, quia PRUDENTISSIMUM.



Rex iussus alium Rectorem, imperatorem alium non requirebat:  
Reginam Matrem admittebat.

Tùm, si unquam duos Soles Polus, regnantes duos regnum cepit.  
Quamvis enim coronam posuerit Berengaria,  
Coronæ curam nequaquam deposuit:  
honorem mutans onere.

Neque FERDINANDUS, cùm Regem induit, Filium exuit:  
ipsum etiam Diadema subjici, sceptrum incurvari voluit Matri,  
totus ab ea, velut ex uberibus pendens in annum quartum, & vicésimum:  
quò magis roboraretur in Atlantem,  
& Regni Olympo solus sustinendo par excreceret:  
non ignarus, regna esse ingentia quædam onera,  
quæ si imbecillis obveniant, mole sua in casum ferentes trahunt.

Sub illis vel Gigantes fatiscunt, nedum Pumiliones.  
Novus Regni Sponsus Beatricem Philippi ex Duce Sueviæ Imperatoris,  
& Mariæ Constantinopolitani Imperatoris isaaci Filia Filiam,  
eâque Friderici Secundi Romanorum Imperatoris Cognatam,  
& tori, & regni Consortem sibi jungit ipso Divi Andreæ festo.  
Crucem sibi despondisse putes, sed beatam in Beatrice:  
quæ eum copiosâ beavit, & pulchrâ fecit prole Parentem.  
Sed ut fluxa in terris solatia, nihilque ab omni parte beatum,  
extinctâ Beatrice, Joannam Comitissæ Pontivi filiam  
secundis nuptiis non minùs secundis adlegit,  
lectissimæ sobolis lectissimus ex ea Pater.

Fidem, quam bis dedit conjugalem, ne semel vel minimùm dirupit:  
semper boni, rectique tenacissimus.

Nil contra quorundâ Regum morē, licere sibi voluit, quàm quod deceret:  
maximè regium æstimans, nulli servire voluptati;  
& cupiditates magis in potestate sua, quàm subditos, habere.

Regni gubernaculis, ut ditissimæ navis clavo gubernator, præfedit.  
Utenim huic opes, quas vehit, non superbiæ, sed curæ sunt materia;  
ita regendi munus sollicitum fecit, non elatum.

Sed ut cūque curas habeant invisas Reges;  
minimè curarum, maximè coronarum  
patiuntur invasores.

Et, quam Hercules supremo fine domari comperit,  
in foribus ipsis occurrit labor, invidia:  
hoc ipso majoribus, quòd hostem aliis postremum,  
primum ipsi detriumphent.

Sic triumphavit FERDINANDUS,  
cùm Rodericum de Camberiiis refractarium clementiâ infregit;  
Consalvum de Molina molientem plurima molli tractatione emollivit;  
Didacum Lopez Biscayæ Dominum dominatum parantem,  
adeoque malè meritum, dexteritate sua sibi optimè demeruit;

Alvari Comitis fuscitatem seditionis flammam  
ingentia novo Regno incendia minitantem

Prudentis sua, comique virtute, affusâ velut frigidâ, sedavit:  
cùm seculis non crederetur sopienda.

Quot prius inimicos habuit, totidem sapientissimè effecit amicos,  
comitate nempe, & suavitate morum gravi;  
quâ omnes facillè adamantinis Regi vinculis obligantur.

Timeri potuit perduellibus Vindex: Pater esse maluit:  
ut ostenderet, bonum Principem nihil differre â bono Patre.

Amari, colique majus Imperio duxit:

Supplicia multa nō minùs turpia Regi credens, quàm Medico multa funera.

At pepercerit licet FERDINANDUS, non pepercit tamen DEUS:

ne licentia lædendi Deos terrestres  
abiret in exemplum pessimum, & Superos invadendi.

Nam fere omnes gloriæ Regiæ invidentes

In gloria morte ingloriam vitam, ut duxerunt, ita cum anima egerunt.

Conformantur siquidem sceleribus poenæ:

ut matribus malis simillima sit soboles.

Quis verò miretur intestina illa dissidia?

cùm ipsa paterna Alphonfi viscera

in carnem suam FERDINANDUM movere bellum ausa.

Regni Castellani serenus Splendor, dum Parentis oculos perstrinxit,  
invidia poenè excæcavit.

Nulla tam modesta felicitas, quæ malignos invidentis oculos vitare possit.

Habent semper fortunati Antagonistam, cum quo luctentur, invidiam.

Rarissimus ille, qui inter mortales gloriâ livorem vincat,  
etiam summa quæque petentem.

Pater Filium bello laceffit:

Regno ejus inhiat, cui suum daturus erat.

Quis non dicat jura naturæ violari?

Sed felicem Patrem!

Qui sibi ante conflictum â Filii pietate victoriam polliceri potuit:

Pius Filius!

Qui bellum, seu vinceretur, seu vinceret, ex æquo crudele abhorruit.

Offensus â Patre minimè insensus Patri,

ne Berengariam monentem offenderet, se contra Patrem tantùm defendit:  
non minùs in Matrem reverens, ac in Patrem pius.

Arma itaque moventem Alphonsum armatâ precibus Epistolâ exarmat.

Ut verò in nullo non esset Filius,

Manlius alter, quò horridiorem habuit Patrem,

eò majori laude, ejusdem periculo subvenit:

dum ipsi perfidos per fidem restituit.

Sic Æneas alter è mediis seditionum flammis extulit Parentem.

Regia planè pietas, nisi Patre servato, servari nolle,

Defensi Patris præmium, paternum tulisse Regnum dices:  
sed meruisse regnum, est regno majus.

Attamen à morte Patris, prudenti Matris institutione, impositus hæres  
Maternum planè adiit.

Paterno doctus exemplo: fieri nonnunquam consuevisse;  
ut, dum cupidius, quàm æquius, nova acquirere laboramus;  
ea, quæ paravimus, in pœnam amittamus.

Alterius regno quisquis inhiat invidus, eum successorē patietur vel invitus.

Filiarum ex Tarasia Alphonfi Patris, regni potiùs Harpyiarum  
ingluviem triginta millibus aureorum sapientissimè compressit:  
aut certè pingui hac ossa Cerbeream Regni famem extinxit Alcides alter.  
Jam Regna Castellæ Avitum, & Maternum, Legionisque Paternum,  
quæ virtute meruit sua,  
non modò tuitus est juribus, sed viribus etiam effecit auctiora,  
Rex semper Augustus.

Idque eò felicius, quòd, cum augeret sua,  
suis quoque semper adauxerit REGNUM CHRISTI.  
Imò prudentissimè primas Religioni, Fideique dedit:  
ut secundas servaret sibi ditiones.

Basim nempe firmam, primamque Regnorum novit esse Religionem:  
neque aliud Imperii beatiorem proventum, quàm augmenta pietatis:  
regiones item cum Religione stare, & cadere cum Religione.

Bella, quæ in armis Religiosus, religiosè elegit, Religionis fuere:  
fuisse sacra nullus ambigat.

Nam à Sancto, sub labaro sacrato, gladio consecrato, quot gesta,  
contra Mauricam impietatem sunt confecta.

Nec infeliciter cedere potuerunt, quæ in causa DEI gerebantur.

Primum namque victoriæ auspiciū est causa bona.

Ideo victorioso gladio non nisi victrices messuit lauros:

& quocunq; manus tetendit, palmis palmastenuit.

Quò se manus extenderint, è Gothico nomine Fer-din-handus omen lege:  
& fatere: longas Regibus esse manus.

Illis imprimis,

qui non libidine dominandi arma arripiunt, sed maximā gloriam ducunt,  
si maximum Deo procurent Imperium;

qui munus suum credunt, latissimè cultum Christi promovere,  
qui latius Deo imperare nolunt.


Cæsarem potentiā, virtute Lucillum, magnitudine Pompejum  
dicas FERDINANDUM;

nisi ei pro copioso milite exercitus fuissent præcipuè  
confertissima exercitia pietatis, & precum.

At hoc ipso Maximis majorem habe.

Castella innumera, dum coronā cinxit, lauro coronariā verticem incinxit.

Oppida quot adiit, tot aut fame, aut famā, aut Marte, aut arte,



Victor perambulavit.

Celeberrimas in Regnis urbes, cum urbibus Regna  
Argonense, Jaëense, Granatense, Beatiae, Valentiae, Murciae,  
cum Regnis Reges, aut in clientelam suscepit, aut vectigales reddidit.

Amicos amicè agendo auxit,  
inimicos fecit, ut desinerent esse, etsi nollent.  
Quoties cum hoste bellavit, toties debellavit.

Multis millibus capitum Mauricā hydram aperto, & occulto Marte minuit.

Frequenter vix visus ipse, jam victus hostis.  
Tantum valuit ad arma, inermis, minimè enervis pietas.

Hinc secula discant, indomitum nihil esse Pio.

Trajano Principe melior, Augusto felicius esse debuit.

Sic verum illud:

sola pietas Regibus sufficit ad salutem: adde, & victoriam.

Sine hac nullius sunt momenti Exercitus, robur imperii, & apparatus.  
Neque rebus adeo secundis, quibus egregii quandoque Duces inolescunt,  
elatus animo, novit parcere subjectis, & debellare superbos,  
Amor simul, & Terror Hostium.

Reges Regnis eripuit, non Regna Regibus, eos in alia transferens:  
quia aequè pulchrum judicavit, & vincere Reges, & facere.  
Magnanimitati SAPIENTIAM sociavit, utraque hostibus formidandus.

Nam fortitudo, quæ insipiens, est imbecilla.

Tantam SAPIENTIAM non potuit latere,  
nullum majus boni imperii instrumentum esse bono Consiliario.

Circa se ergo habebat prudentissimos,  
quos, ut consiliis melius consulere, maluit consulere PRUDENTISSIMUS ipse Princeps.  
A sancto Ilidoro Hispalensis olim Ecclesiae Pastore  
de obsidenda Hispali monitus,

paruit sapienter Coeliti, ut ei Coelum in coeptis obsecundaret,  
& pro Astris bellanti Castra bearentur.

Obsidione arctā omnia arctabantur, præter annonam,  
cujus copia copiosam Mauris insultandi materiam præbuit.

Pons Trianae ferreis nexibus firmiter connexus viam stravit commeatui;  
prægrandis catena per Bætīm tensa  
spem propè intercipiendi victūs intercepit.

Remora hæc fuit unica Triumphī, sed mox removenda.

Navigia duo rumpendis vinculis destinata  
nil nisi ventum adspirantem aspirabant.

Ergo in ventos impendit vota, fretūque Rex sanctus triduo,  
nullius præsentiam passus in tam secreto colloquio,  
quod cum Cœlo inierat.

Novus Scipio, alter Annibal magis divinitatis reverentiā,  
quàm vi, bella gerere voluit.

Et verò tantum inerat in illa vera Cœli consuetudine momentum,  
ut pileo cum Henrico Sueciæ Rege ad pileum inclusos carcere  
ventos evocâsse videri posset;

nisi magnum iis emendis pretium preces obtulisset.

Die Inventionis sanctæ Crucis felicibus austris provehuntur  
sericeis vexillatæ Crucibus naves.

In his Signis Constantinus Occidentis vincere debuit.

Hæc signa fuere victoriæ certiora, ac in Prætoria,

Levino Consule Athenis opitulante nata Laurus.

Catena rumpitur, pons dissiicitur.

Torquatum inficietur quis FERDINANDUM,

qui torquem Mauris Barbaris ad Bætim extorsit?

Machinas quascunque hostiles non mediâ Medeâ,

sed Magistrâ VIRGINE DEI MATRE,

Sacratior lacon feliciter evertit.

Tredecimnavium classe triginta navium classem devicit,

Æthere illi commilitante.

Igniariâ navi flammâs, & excidium classi Christianæ minitante,

in fumum verò evanidum abeunte,

gratias tantas DEO, ac DIVÆ VIRGINI fudit,

ut totus extra se effunderetur in extasim.

Spiritum putâsses, ita nemini visus, ac omnia penetrans

ipsam subivit Hispalim.

Durante obsidione cum hoste plurimas, secū ternas hebdomade qualibet,

cruentas flagro iniit velitationes, sui prodigus sanguinis.

Ad pugnandum loricatus incessit, sed thorace aculeato

ad infligenda sibi sua,

ut facilius aliena arceret vulnera.

Ita secum egit, ut ante arcem corporis sui,

quàm Hispalim urbem expugnare videretur.

Longiùs producta obsidione longanimis, & prudens magis animum erexit.

Omnem belli aleam in Bellona sua

Icone Virginis à Regibus dicta collocavit.

Hanc cum semper inter primos haberet ordines terribilem

ut Castrorum aciem ordinatam,

vinci non potuit in acie.

Semper, & ubiq; fortunatus extitit ab aurea hac fortuna nunquam dimissa.

Dicere veriùs, ac ille, potuit:

Equidem sum, quem Tu me fato quodam effecisti.

Tu enim, & Fatum meum es, & Fortuna.

Marianum hoc, non Trojanum Palladium capiundæ urbis omen fuit.

Nam festo sancti Clementis, Superùm clementiâ,

anno quadragesimo octavo seculi tertii, ac decimi,

à seculorum quinque, & ampliùs exantlata sub Mauris servitate,



impensâ sedecim mensium obsidione,  
 asserta tandem est libertati Sevilla â FERDINANDO.  
 Maurorum trecenta solo, centena falo millia possellis ita excessere:  
 ut nunquam in veterem redierint possessionem.  
 Summæ mox turri Crux imposita nunquam talem exaltationis diem vidit.  
 Insigni hoc proposito apparuit, cui militârit, cui vicerit FERDINANDUS.  
 Triumphum dein egit, quo Occidens certavit Orienti;  
 & Oriens propè indoluit, se factum Occidentem.  
 Suæ quippe Exercituum Dominae, cui debuit victoriam,  
 triumphalem instruxit currum.  
 In Capitolium ejus nomine sacrandum invecæ Comnenus Occidentis,  
 â pedibus iens nunquam gloriosius,  
 quàm sic sine curru, triumphabundus incessit.  
 Verùm inter tanta miracula maximum fuit FERDINANDUS,  
 cui reliqua debebantur.  
 Prodigium enim summum Rex sanctus.  
 Tantus ejus sanctimoniae splendor, etiam iniquum aliàs lucis Judicem,  
 Maurorum Principem in laudes excivit:  
 fieri nempe non potuisse, ut urbem Hispalim tam generosè defensam,  
 tanto incolarum numero constipatam,  
 exercitu tam exiguo vinceret alius, quàm Rex sanctus.  
 Quin omnis Arabum Natio,  
 si Romanis impressos Aquilis characteres in symbolum assumpsisset,  
 ac jactabunda interrogatione ænigma explicuisset:  
 Saracenorum Populo Quis Resistet:  
 responsionem re experta, verbis ipsa sibi, vel invitus Oedipus dare debuisset:  
 Sanctus Pius Que Rex.  
 Sanctitate nempe Reges magis, quàm armis, profligant hostes Christi:  
 hæc ab illa robur, & animam sumunt.  
 Genuinum Ecclesiæ Romanæ Filium se probans, defensando Matrem  
 contra Fridericum secundum Imperatorem,  
 meruit in specialem cum Regno curam, & protectionem suscipi  
 ab Honorio Tertio summo in terris Patre.  
 Majora meritis est de minoribus Ecclesiis: quibus maxima contulit.  
 Burgenſi, aliisque regiâ munificentia decorem restituit:  
 cathedrales Toletanam, Cordubensem, Jaënsem, Giennensem, Hispalensē  
 fundavit, erexit, dotavit:  
 semper magis de Ecclesiarum, quàm urbium statu anxius.  
 Profana Arabum fanâ in sacra convertit odea,  
 spurcitiâ Mohometi omnibus liminibus eliminatâ.  
 Nullum oppidum, nullam civitatem bello sibi tributariam fecit;  
 ubi non famulum tributum, & aliquod pietatis monumentum statueret  
 erga pientissimam, & sibi dilectissimam DEI MATREM.  
 Pro infinita in hanc devotione, nullus ei finis excitandi templa:

quia & hinc, & indè infinita, & æterna spectabantur.

Tantus cùm esset Fundator, ac Tutor Ecclesiarum,  
Patronus in Saracenorum partibus est nominatus à Gregorio Nono.  
Ecclesiis jura sanctè servavit, Ecclesias juribus contra omnes injurias.

Beatius semper dare censuit,

quàm accipere quidquam aut Ecclesiis, aut Ministris earundem:  
quamvis in Regnorum ejus salute, Religionis etiam staret felicitas;  
solum nimirum beneficentiæ thesaurum expertus inexhaustum.

Maluit ab eis precum pensa, quàm pecuniarum expensas,  
orationes, quàm proventuum rationes, exigere:  
illis, non his, in vota Cælum flecti gnarus.

Captis urbibus prima ei cura, captivos Religioni parare animos.

Neminem non inimicum communem cum Deo habuit:

inimicissimus hæreticis fidei Catholicæ inimicis, ubicunque hærentibus,  
nullibi Regnorum suorum stationem, nedum sedem figere passus.

Quos induratos comperit, flammis tradidit resolvendos:

Ipse ignem, & ligna sceleribus ejusmodi delendis aggelit.

Videri potuit ipse pyram circumferre FERDINANDUS:  
cùm tanto fidei, ejusque cultûs tuendi, ac propagandi æstu flagraret.

Quàm terribilis improbis, tam bonis fuit amabilis:  
ut nec facilitas auctoritatem, nec severitas amorem diminuerit.

In pace, si quam habuit,

cui continuum cum hostibus, & vitiis, bellum;  
Salomonem se præstitit, PRUDENTIA cum primis eminente.

Ne sineret Regni, ut Maris esse conditionem,  
ubi piscium majorum minores explent ingluviem;  
ex æquo cuique æquitatem dispensavit.

Constantiâ eminusit regiâ, omne cœptum glorioso fine coronans:  
animo fuit supra humana excelsio:

nullis prosperis potuit efferri, nullis dejecti adversis.

Regiæ Matris fatum doluit, non est lamentatus:  
sensit lethum, sed lætus:

velut Phœbus Phœbes Eclipsin intuensegit  
perpetuum nullâ temeratus nube serenum.

Mortalem se meminit genitum mortali.

LYCURGUS PRUDENS in civitatibus Politicum instituit statum,  
in ordinem confusa disposuit,

fundos distribuit, & Literatos advocavit:  
militem strenuum donis, populum annonâ,  
cunctos dulcedine comitatis pellexit.

Gravissimis bellis gravatus, nulli vel nummo emungendo gravis,  
thesaurum suum censebat opulentiam Populorum.

Nec tondere, nec deglubere voluit optimus Pastor.

Castra ejus claustra referre videbantur:



ita omni pietatis genere inter milites certatum gloriosè.  
Virtutes sub Duce virtutis Archetypo stipendia meruisse credas.

Hoc valet exemplum.

Rex namque est ingenium, & mores omnium:  
utque Ducum lituos, sic mores castra sequuntur.

Fefellit non fatidicus, sed falsidicus vates:  
virtus, & summa potestas non coeunt;  
quando in FERDINANDO utraque refedit ita,  
ut pulchro ab omnibus vocabulo nominaretur; REX VIRTUTIS.

Rex quoque felicitatis dici poterat:  
si, qui alia omnia vicerat, Victor invidiæ, Victor hostium, Victor Sui,  
& mortem vincere potuisset.

Imò ex fato quoque duro felicissimus:  
siquidem vera est felicitas, felicitate æternùm felici dignum haberi.  
In Africam igitur transfretare cupiens ad debellandos fidei hostes,  
præmium tulit bonæ voluntatis.

Res enim intentione, ac incepto egregio, non irritò eventu DEO probantur.  
Necdum solvit à littore, & dicere potuit felicior Julio Cæsare:  
teneo te Cœlestis Africa!

Omnia ad expeditionem instruxit:  
ne Æternitatis iter iniret sine apparatu:

quanquam omnis ejus vita in hunc terminum collineârit.

Exemplo moriendi ut esset, omnes de suis adesse voluit:  
Alphonso Filio cognomento Sapienti, & Primogenito sapientissimus Parens  
primùm benedicens, Regni, ac suorum curam tradidit:

Granatensi Regi de reddenda Jaën urbe fidem servandam commendavit:  
ut ad mortem usque probaret se fidelem.

Regni rebus compositis, totus incubuit in suas, rerum tunc optimè fatagens.

Pharmaca melioris, & vitæ, & salutis expetiit:  
Divinissimi Hospitis Humanitati ter Maximæ responsurus,  
è lecto obviam processit.

Genibus, & cubitis terræ innixus Cœleste Manna largiùs collegit.  
Restim collo circumdedit, planè cœli captivum se profitens.

Indignum se reputans Hospite dignissimo in voces erupit:  
Domine! unde merui, ut venires ad me?

Cereum benedictum in manus sumens ceu lampadem,  
ut in vita, ita in morte fuit è numero PRUDENTUM.

Christo in Cruce pro se inclinato,  
cui omnia vivus, seipsum moriturus inclinavit.

Tormenta Redemptoris ex ordine recensens,  
gratam rependit memoriam.

Crebris osculis veneratus est in imagine DEUM:  
quem mox osculo Oris sui dignaturus esset DEUS.

Magno dolore pectus percutiens



LUX, ET DUX SIT IN OMNIBUS ISTA.



Laudatur multis imitatus Protea Princeps:  
Nec malè, si formas dicteret amica fides.

Nam dolus, & fraudes, feralia scilicet astra,  
Exitium Authori sæpe vel ipsa creant.

Ergo per ingenium prudentia sancta coronam  
Dirigat in cursus, ut Cynosura, suos.



peccatorem se maximum dixit

sceleris omnino purus:

veniam in nullo offendens ab omnibus oravit.

Fidem Catholicam, quam innumeris intulit oris, ore protestatus,  
ut in ea semper vixit, vixisse voluit.

Regia indumenta à se auferri jussit:

& ita deposuit prius ipse Regem, quam invitatus à Morte deponeretur.

Bene nempe egit, gessitque Personam in vitæ Theatro:

exiit suam meliori permutandam.

Sanctorum Societatem se vidit expectantem.

Post tantam enim in vita cum Divis familiaritatem,

quidni familiarem mereretur invitationem, & comitatum?

Magnæ cœli, terræque Dominæ, ut servus esset perpetuus;  
etiam mortuus ad pedes ejus jacere voluit.

Clerum sibi præsentem post Sanctorum Syllabum decantatum,  
re undique bene gesta, relatæque de ipsa morte victoria,  
intonare jussit hymnum Ambrosianum.

Uti sanctam vitam obivit, ita obiit,

anno Regni, Christi quidem M C C L II. sui verò XXXV.

die tricesima mensis Maii,

ut flos Regius in viridarium cœli transplantatus.

Hic si stas Viator,

sepulchrum, aut statuam non aliam spectâ, nec expectâ;  
nisi quam sibi posuit in vita, & esse voluit post fata FERDINANDUS,  
vitam immaculatam, & gesta:

quibis illa decoribus merentur præmia Reges.

Vitæ ejus integritatem post mortem loquitur integritas  
à quadringentis annis incorrupta.

Sacris Hispaniarum Fastis jam olim adscriptus,

à Clemente decimo Sanctorum est inscriptus Festis.

Officioso in Cœlites jam Officium est decretum.

Pro aris plus, quàm focis, certanti  
ad aras certatim etiam num supplicatur.

Ergo luctum pone Hispalis  
sedes, & quies FERDINANDI!

Non dole amissum:

sed de pignore tanto cœlis immisso tibi,

Justitiæ de Vindice,

Legibus de Solone,

Curiis de Catone,

de Oraculo consiliis,

de Numa Religioni,

de Theodosio Basilicis,

Fidei orthodoxæ de Propugnatore acerrimo,

Hesperiaꝝ Regno de Salomone SAPIENTISSIMO, PRUDENTISSIMOQUE,  
 Regibus de Prototypo virtutum absolutissimo,  
 Hispano-Austriaco, & Austriaco-Hispano Orbi  
 de LEOPOLDO Primo,  
 Augustissimo, Potentissimo, Inviſtissimo,  
 ROMANORUM IMPERATORE,  
 Et CAROLO II. MONARCHA HISPANIÆ, & Indiarum Serenissimo,  
 vivaciſſimis FERDINANDI ſancti Ec̃typis,  
 Utrique DOMUI AUSTRIACÆ  
 de Augusta, dignaque Patre tanto Sobole,  
 JOSEPHO I.  
 ROMANORUM, HUNGARIÆQUE REGE  
 tot FERDINANDI Nomine clarorum  
 Cæſarum, ac Regum,  
 & hujus inter Majores cum primis venerandi  
 NEPOTE quidem ſero,  
 ſed vero, & glorioſo,  
 gratulare, & applaude.



# Encomium exegeticum

## Prudentiæ Regiæ.

**V**irtutum Regina potens PRUDENTIA, summum  
 Regum decus, splendorque, quo Procerum super  
 Ora levantur humo,  
 Semideumque choro miscetur : prima valentum  
 Salusque, faustitasque regnorum, quibus  
 Gemmea seclâ datur  
 Largo haurire sinu, hâc Divâ aurigante curules  
 Principis eburnos, simul & Augusti flagrum  
 Imperii, arbitrio :  
 Intorquente suo. Non turbo ferocior intra  
 Prognatus oras Imperi, iratas minas,  
 Tectivorasque faces,  
 Fulmineosque diu gladios impune per urbes  
 Ejectat audax : flamma vel cinerum dolo  
 Seditiosa latens,  
 In cunis restructa chaos sub PRINCIPE primum  
 PRUDENTE repetit, pacis adamoto otio  
 Luxuriatur humus.  
 Exulat omne nefas regno, viret omnis honesti  
 Copia, sagaci Regius quando Solon  
 Jure, bonis meritas  
 Laudes, & claros apices decernit honorum :  
 Reis, Themista judice, ad mensum malo  
 Supplicium. Medio  
 Si sedeat Patrum Princeps Cato fortè Senatu,  
 Consum immigrasse pectori, totum æstimat  
 Concilium, è Tripode  
 Fundi verba putat, magis aurêo pendet ab ore ;  
 Ac Gallicani populus eloquio Viri ;  
 Gloria quanta, decus,  
 Nomen, Majestas, & amor subnascitur indè  
 Animis suorum, terror & quantus, boni  
 Prò Superi ! tumidis  
 Hostibus, obliquumque tuentibus ore maligno  
 Incutitur horror. Scilicet Reges cato  
 Conspicui ingenio  
 Instar magnetis subjectum corda catenant,

Pectora inimicūm frigore inglaciant metūs,  
 Exanimantque gelu.  
 Munere centoculi si Rex adstringitur Argi,  
 Omnis chorea siderum virtus erit  
 Cætera; sed vigilans  
 Nocte, diēque oculus solertia præscia Regis,  
 Intenta rerum publico semper bono,  
 Et studiosa mali  
 Civibus arcendi. In specula, speculantur ab alto  
 Solio Archi-Nautæ providi, Martis truces,  
 Horrifonāsque minas,  
 Et, longè positi, bellacis acinacis æstum  
 Sapiente frangunt robore: at si jam seges  
 Horrida inundet agros,  
 Nec pigri infanis armorum fluctibus, arma  
 Nec imparati, pace meditata aggerem  
 Objicient, rabidas  
 Victrici planta proculcabuntque procellas,  
 Almāque niveis advehent bigis Deam.  
 Taliæ regna decent  
 Reges, & tales regnorum frœna Monarchas,  
 Qui fronte Jani duplici insignes, sibi  
 Sceptra, mitrās, populos,  
 Se Populis, Regnis, salvos præstare laborant.  
 Sic auspicatum Regibus cautis stetit  
 Imperium Solymes;  
 Incautis, levibusque retrò Sors egit habenas  
 Aurea, nimis que triste succellit chaos.  
 Consilium stabilit  
 Regnorum clavos; Regis mens indiga mentis  
 Everfa miserum sceptra sub jugum trahit:  
 Si tamen immerito  
 Stemmate clarandus, quem virtus Regia nescit,  
 Et non agrestūm potiùs addendus foro,  
 Orbi iterum tragicam,  
 Si detur, Phaëtontas equos agitare superbos,  
 Flebilè daturus fabulam. His vacua malis,  
 Atque soluta metu  
 Regna sub AUSTRIACIS captantia fascibus umbras  
 Placido quiescunt Morpheo: dū INDUSTRIA  
 CONSILIO comes it.  
 Sic nempe AUSTRIACUM firmat PRUDENTIA sceptrum,  
 Longēque fines semper Augusta evehit,  
 Indomitōsque domat.

# S. GUNTRAMUS REX FRANCIAE

Magnificentia splendorus.

**G**UNTRAMUS non Lucinae calculo,  
sed excelsa meritorum suffragio  
Clotarii Magni Filius Maximus,  
traduce Serenissimi sanguinis privilegio hæres,  
jure virtutis insita prerogativo Galliarum Princeps,  
Regnum Patris sui  
concordi Fratrum discordia in se divisum obtinuit.  
Nimirum hæret non tantum  
semper odorifera proxima spina rosæ;  
sed lilia quoque adversi ut plurimum sentes ambiunt:  
ubi dominandi ambitus in diversa animos abducit sententias.  
Corrivalem gloriæ nemo facile admittit æmulum;  
quisque tamen complures patitur: etsi nolit.  
Onerosa alteri alterius est felicitas:  
illumque premit maximè,  
quem tangit minimè.  
Unius in manu sceptrum spina est in oculis aliorum:  
quibus ad idem natura æquale jus decrevit.  
Zelotypos regia dignitas sustinet Procos;  
nec uni jungitur sine offensa cæterorum:  
si par in omnibus sit sanguinis conditio.  
Ut individuum supremi honoris punctum comparetur;  
etiam Gordium fraterni amoris vinculum non rarò solvitur.  
Hinc colliduntur capita, quæ concurrunt;  
nec rarò etiam franguntur:  
dum convenire nequeunt eadem sub corona.  
GUNTRAMUS igitur charitatis servandæ,  
quàm dignitatis consequendæ,  
sancto studio ambitiosior,  
ingens Regnum Franciæ  
in minora maluit subdivi Regna;  
quàm Fratrum animos invicem conflatos  
inimico solvi divortio, ac separari.

Lapis etenim offensionis quandôque tollitur,  
 cùm inter meum, & tuum,  
 confinium limites, ut fas est, statuuntur.  
 Sors cæca justitiæ administra diremit litem:  
 dum GUNTRAMO Regnum attribuit Burgundionum,  
 Fratrum cuilibet suum reddens.  
 Cessant jurgia; ubi suo quisque potitur jure:  
 nec alieno inhiat, qui proprio satiatur.  
 Ut acceptam igitur teneret Regni potentiam,  
 fundavit illam solidè in SOLO DEO,  
 & pietatis basim jecit in cœlo:

quò violentæ hostium manus non possunt penetrare.

Cum Domino exercituum habiturus pacem æterno fœdere juratam,  
 in perpetuum illi omnes animi affectus tributarios fecit:  
 & nullon non loco, seu privato, seu publico,  
 devotæ mentis vectigal pependit accuratissimè.  
 Pacis conditiones statuit divinæ legis articulos:  
 quos prævaricatrix tamen subditorum rebellio  
 tantâ violaverat audaciâ;

ut vindicatricem scelerum Nemesein ad bella, & in flagella provocârint.

Consilium igitur quærendum vel maximè censuit in arena:  
 quò cœli æquissimè favientis potentiam feliciter eluderet.

Et verò etiam reperit minimè poenitendum:

dum ad poenitiæ cinerem confugiens

Ninivitarum Regis exemplo,

jejunia, & obsecrationes indixit populo, & sibi;

femetipsum humilians sub brachio Numinis præpotenti.

Unonámque pietatis stratagemate invicti vincuntur Superi:

quos impietatis bellum justam ad iracundiam provocavit.

Princeps Regni sui ornamentum honoris Divini existimavit cultum:

quem licentiosa morum fuligo ita reddiderat incultum;

ut præter apparentem nominis umbram,

fulgoris sui reliquum habuerit nihil.

Ad pristinam igitur formam religionis decorem studuit renovare:

&, quia opus hoc grande ad dextram spectare novit Excelsi;

Concilia convocavit Episcoporum,

quos peritissimos hujus rei artifices æstimavit.

Nihil hîc novi suo vel arbitrio, vel placito sanciri voluit:

sed vetera Patrum statuta in recentiore petiit observantiam animari.

Festam Dominicæ diei lucem sacrilegi laboris eclipsi fuscata

in debitum publicæ venerationis asseruit splendorem.

Infames ab erroribus disciplinas non ad vanam oculorum speciem,

sed cum radicibus, ne pullulare deinceps possent, evulsit sapienter.

Discrepantes Fidei sectas,



tanquam perniciosas Regni scissuras,  
 quàm salubri, tam sancto abominatus odio,  
 ubi exterminare potuit, omnem lapidem movit.  
 Libertatis Ecclesiasticæ Vindex eo fuit acrior;  
 quò eandem pluribus obnoxiam scivit incurſibus Harpyiarum.  
 Idcirco effrænem militum licentiam ſeveriſſimis cohibuit decretis:  
 ne bona ſub iuriſdictione Numinis conſtituta unquam invaderent.  
 Sacerdotes majorine amore, an reverentiâ fuerit proſecutus,  
 problema haud facili labore decidendum poſteris reliquit.  
 Eorum conſilia excepit ut oracula;  
 ſententiâ quàm ſolidâ, tam firmâ perſuaſus,  
 omnem felicitatis eventum ab eorum ſententia, & reverentia dependere.  
 Animus illi in quacûnque bellorum tempeſtate ſerenus,  
 in decumana Regni perturbatione compoſitus,  
 in rebus deſperatis ſolo DEO nixus.  
 Par ſibi in utrâque fortuna, & ſimillimus:  
 quia utriuſque Dominus.  
 Proſperam, dum ſe inſinuaret, tulit moderatè;  
 dextrè cum ſiniſtra dimicare ſemper aſſuetus;  
 ad illatas ſibi injurias quaſi ſenſu deſtitutus,  
 lædi ſolùm viſus eſt alienis.  
 Illas clauſo velut oculo negligere potuit;  
 has raro ad modum diſſimulavit.  
 In delicta ſeverus,  
 in delinquentes mitis,  
 ita juſtitiam clementiâ temperavit:  
 ut neutri eſſet injurius, neutri quidquam detraberet.  
 Neque enim recuſant marito fociari vinculo,  
 quantum viſ inter ſe diſſentire videantur,  
 rigor, & manſuetudo:  
 ſi pio in Principe inveniant ſedem domicilii.  
 Priuſquàm ſolium conſcenderet regiæ dignitatis;  
 jam ſubditorum animos dulci quadam benevolentia occupaverat.  
 Hinc amari pronumerat ab omnibus, qui omnes prævenerat amando.  
 Ita verò etiam, quem timere nemo bonorum poterat,  
 illi nemo non timebat ſollicito ſemper amore vigil.  
 Et quia ſinum erga omnes habebat apertum;  
 non eſt paſſus benignam ulli dextram eſſe clauſam.  
 Liberalitatem itaque ſuo præfecit ærario diſpenſatricem,  
 quàm promptam, tam quòque MAGNIFICAM:  
 quæ beneficia non ſpargere, ſed pleno ſinu effundere videbatür.  
 Patrem ſiquidem ſe exhibere maluit, quàm Regem:  
 ne quiſpiam in Regno audiret orphanus,  
 aut ſe deſertum quereretur.

Utilissimum nempe genus Oeconomiae, largum esse in egenos :  
 quibus quò plus impenditur ,  
 eò amplioribus gazophylacium domesticum fortunis cumulatur.  
 Ita enim sua benefico refunditur munificentia ;  
 ut semper , quod dedit , sit eo minus , quod recipit.  
 Quemadmodum enim flumina magna , sic & opes crescunt :  
 magisque se , ac largius diffundendo dilatant alveum , & abundant.  
 Hinc ad eum omnes tanquam ad beneficium , faustumq; sidus advolabant :  
 nec ullus facile repulsam tulit ;  
 nisi qui accurrere noluit , aut segnis fuit.  
 Imò saepius non rogata exuberabant beneficia :  
 quod indignam Principe MAGNIFICO censeret liberalitatem ;  
 quam necesse sit precibus extorquere.  
 Regis , & Solis idem credebat esse officium.  
 Siquidem iste quidem se , etiam non poscentibus offert ;  
 ille verò non petentium quòque necessitatibus consuevit subvenire.  
 Amittit enim plerumque beneficii nomen beneficium ;  
 nisi sponte , & impulsu proprio in aliorum incurrat amplexus ;  
 tanquam in centrum animi liberalioris.  
 Portum dixisses GUNTRAMUM :  
 in quo fluctuantia miserorum vota , securè conquiescant ;  
 & in fortunatas quandòque solvant Insulas.  
 Fontem credidisses esse publicum :  
 qui omnium siti semper , & gratis paratus fuerit subvenire :  
 vel certè canalem pluribus Dei donis jugiter manantem ;  
 in quo , quantum affluit , tantum effluit :  
 ut vel hac arte accipientes jungantur danti.  
 Ideo , quod privatierat Laris , publici fecit juris :  
 non ignarus , arcanum esse ex primis unum  
 fortunæ votorum anchorâ stabiliendæ :  
 eam quàm plurimis communem secum facere , quoad licet.  
 Unde & sordidam in Principe existimabat esse parsimoniam ;  
 si feris frenatas asservaret opes ita ;  
 ut sibi tantum ferviant , aut fortè nulli.  
 Assiduus munificentiae impendiis distinxit ejus MAGNIFICENTIA dies :  
 ne otiosa forsan ulla elaberetur sine linea :  
 utpote quam perditam fuisse credidisset.  
 Hinc cum felices faceret plurimos ,  
 felicitatem ipse suam augebat in immensum.  
 Nam summa Regis felicitas dici potest ,  
 sparsisse beneficia magno numero.  
 Ex quibus nimirum , velut è semine jacto ,  
 uberrima gloria , & rerum seges nasci solet.  
 Et verò quævis virtus Principis est aliqua participatio Divinitatis :

sed major inde portio est MAGNIFICA BENEFICENTIA;  
 quæ subditorum animos, naturâ cætera liberrimos, reddit sibi vectigales.  
 Cum itaque suis impenderet se totum,  
 suaque prodigâ penè liberalitate expenderet  
 Rex optimus, & sanctæ MAGNIFICENTIÆ addictissimus;  
 Religiosam quôque Paupertatem,  
 quæ & seipsam facilè negligit,  
 non est passus incedere mendicam,  
 ultra metas instituti.  
 Extructa igitur ab aliis Cœnobia censibus dotavit annuis,  
 dotata verò auxit redditibus;  
 non ad necessitatem solum,  
 sed ad delicias usque ordini convenientes.  
 Ipse plurima, profusis quasi visceribus charitatis,  
 vel è ruderibus excitavit, vel à fundamentis erexit:  
 quibus regiæ fortunæ opulentiam ex assè fecit tributariam.  
 Adeoque sacro Davidis Zelo ardens  
 etiam pauperem in terris Deum pro viribus locupletare studuit.  
 Eoque studio habitationes totidem illi condidit;  
 quotquot magnificas extruxit Basilicas MAGNIFICENTIÆ suæ testes:  
 easque non tantum sumptuoso ædificii splendore admirandas,  
 sed pretioso etiam sacre supellectilis ornatu vel Cœlo invidendas.  
 Omnes Regni thesauros in Divorum Domicilia prodigere,  
 non luxum censuit prodigum, sed sacrum regalis MAGNIFICENTIÆ lucrum.  
 Aliam nominis immortalitatem vix ullam quæsitit avidius;  
 quam hospitales, easque plurimas æterno Numini Ecclesias construere.  
 Unum hoc gloriæ suæ monumentum superesse voluit Magnificentissimū,  
 quod amplissimo Christum patrimonio ditasset.  
 Summam denique regiæ dignitatis pompam existimavit,  
 in vivis hæredes habere Superos;  
 eorumque cultu regni opes exhaurire.  
 Sed Deus, qui hominum vinci se non patitur liberalitate,  
 visus est cum GUNTRAMO mutuis certare officiis:  
 quando dormienti prodigiosum immisit somnium;  
 Cujus intento velut digito locus abdi thesauri monstrabatur.  
 Ne verò evigilans illusum sibi crederet à mendaci somno;  
 oculatum visionis interpretem habuit armigerum in silvis assidentem.  
 Hic Argo circumspectior,  
 cum pro Domino sollicitas obiret excubias,  
 parvam, nec visam hætenus quadrupedem  
 ex dormientis ore Domini prodire vidit:  
 quæ in vicinam rupium cavernam properans,  
 fida latitantis thesauri proditrix antecessit.  
 GUNTRAMUS excussa sensuum compede, historiam fuisse intellexit;  
 R quod

quod sub fabulosa Morphei scena agebatur.

Hinc DEI instinctum potius,  
quàm animalculi secutus vestigia,  
ingentem deprehendit aurifodinam:

eâque talem; in qua non crevit unquam sed accrevit aurum.  
Gestiebat tam divitem liberalitatis venam divinitus ostensam sibi

Rex munificentissimè **MAGNIFICUS**:

quâ suam deinceps scenerandi artem sanctissimè posset promovere.

Ne igitur otiosus sinè lucro thesaurus delitesceret;

partem illius munificâ iterum dextrâ distribuit in egenos:

reliquum verò sacris in ædibus rependit Largitori suo:

plurimum sibi superfuturum in sua autumans **MAGNIFICENTIA**;

si omnibus tam sanctè impensis, nihil omnino remaneret.

Quoad vixit,

mutuum hoc liberalitatis certamen

cum Numine **GUNTRAMUS** habuit:

neque victoriam amisit immortalitatis laureolâ coronandam;

licèt potentiori cedere coactus fuerit, & voluerit.

Occubuit, vel potius ortus est in gloria;

qui splenduit in **MAGNIFICENTIA**:

relictò secuturis olim posteris documento,

summam in **MUNIFICENTIA MAGNIFICA**

sitam esse regiae dignitatis pompam, & existimationem.

In gaudio demum, dulcique sine quiescens

cum luctuoso totius Regni exinde inquieti sensu,

repositus est in Ecclesia Sancti Marcelli:

ubi viris Religiosis Monasterium,

sibi pacis condiderat Mausoleum.

elVs VlrVs lbl proDlglis CLara

etlaM post fVnera VIVlt.



SPLENDIDIOR FIT IN OMNIBUS IPSE.



In Geminis geminata dies nil Solis honori  
Demit ; sed geminum reddit & ipsa jubar.  
Nam quò plus fundit splendoris in astra, vel orbē;  
Plus recipit , centrum lucis ubique suæ.  
Sic & Majestas resplendet in omnibus ; in quæ  
Magnificè lucem digerit, ipsa magis.



# Encomium exegeticum

## Regiæ Magnificentiae.

**M**AGNIFICUM populi Dominum decet esse, favore  
Sortis iubentis sceptrum qui rotat manu,  
Et famulo dominatur orbi.  
Extruat astriferis minitantiæ Pergamæ Cœlis,  
Arces supinet rupibus Cœlo pares,  
Quæis recubet dominans potestas.  
Illicium Croesi rutilum dispergat Hydaspem,  
Gazis profundat regiis undas Tagi,  
Gemmicomis adamata Nymphis  
Inplebem jactet candentia munera Gangis.  
Albelcat aula regia argenti nive:  
Innocuis radiata flammis  
Auri fulgentis rutilent laquearia, Phœbo  
Raptura lucem. Marmoris venas tegat  
Assyrio peregrina fastu,  
Quam pinxere Phryges, gemmis circumdedit Indus,  
Purpura laboris maximi. Regis thronum  
Flammivomis radians pyropis  
Circumstet festiva cohors, quæ regia iussa  
Colat recurvo poplite, ut cives sciant  
Imperii Dominum vereri.  
Florens visurus regnum si prodeat aulâ,  
Auro coruscum syrma famulantium trahat,  
Auricomus velut astra Phœbus.  
Talem regna colent, prompti quoque iussa sequentur  
Cum plebe summi nobiles; hostis furor  
Non tumido petet ense jura.  
Aurea sæcla fluent tali sub Principe, terram  
Astræa viset, cincta virtutum globo,  
Pax oleas revehet virentes.  
Hunc niveis per amœna poli subvecta quadrigis  
Populo verendum, regio dignum throno  
Fama canet decimonepoti.  
Tot mater Regum lacrymis testatur Idume,  
Fluxisse semper gemmeis tempus rotis,  
Magnificas Salomon habenas  
Dum regni tenuit. Tristi Bellona cupresso

Non texit urbes, sanguinis stagnò putri  
 Non Solymæ temeravit arces.  
 Spernebatur Onyx, pedibus submisit & aurum  
 Caput terendum, lucidâ argenti face  
 In radios abiêre frontes.  
 Sæpe peregrinæ mittebant munera Gentes,  
 Regni potentis colla flexerunt iugo,  
 Non domino superata ferro.  
 Thurilegis cum classe volans Regina Sabæis  
 Per tot pericla venit irati maris  
 Alloquio fruitura Regis:  
 Cujus MAGNIFICAM raris splendoribus aulam,  
 Diffusa mundo fama resonanti tubâ  
 Arabicis celebravit oris.  
 Majestate Ducum crevit Romanapoteſtas;  
 Demeflûtque gloriam, quando polis  
 Inferuit parios coloffos.  
 Pellæus Juvenis, valido qui fulmine belli  
 Percuſſit orbem; quando ſublimi throno  
 Veſte nitens radiante gemmis  
 Dictavit leges; captivum duxit amorem  
 Populi ſubacti: nec priùs curvo genu  
 Eſt Dominum veneratus orbis.  
 Sic eſt; MAGNIFICUM Regem comitantur honores;  
 Splendor venuſtat purpuræ, & ſceptri decus  
 Illicio rutilante civis  
 Ad ſe corda rapit. Turpi ſqualore notatum  
 Ridet jocando populus: aſſuetus pati  
 Delicias radiantis oſtri  
 Horreſcit tenebras. Animi ſplendoris inanes  
 Umbris coronas obtegunt: quando Pharon  
 MAGNIFICI ſuperant nitore.  
 At nuſquam tanto nitor iſte reſulget honore;  
 Quàm quando ſacræ Numini turres caput  
 Sideribus rutilans propinant.  
 Scilicet ut prima eſt, poſt mœnia, gloria templis;  
 Sic iſta ſupplent prima murorum vices,  
 Incolumem retinendo Regem.  
 Quin etiam ſuperant. Nam nil finè Numine profunt  
 Marmorea Regno ſepta; dum patulas DEUS  
 Per ſua Tempſa tuetur urbes.  
 Quòdſi MAGNIFICUS conſurgat ſplendor utrinque;  
 Utrinque major gloria, & robur ſimul  
 MAGNIFICAS decorat CORONAS.



# S. LADISLAUS R E X H U N G A R I Æ

Insignis Fortitudine.

**C**essa queri de objecto forsan probro sterilitatis Hungaria;  
 quasi tam arido inaritata seculo  
 viginti penè lustris parturire debueris:  
 ut illustrem Regiis virtutibus Principem,  
 parèmq; Stephano Regem, orbi pareres LADISLAUM,  
 hoc nomine quidem nulli secundum,  
 factis tamen publicâ famâ celebratis etiam Secundissimum.  
 Sterilitatem enim istam liberali fœcunditate compensavit cœlum;  
 cùm è tuo gremio tanta gloriæ eviruit palma;  
 sub cujus umbra Hungaria è carie vindicata reffloruit in vigorem.  
 Crevit hic ultra staturam palmæ,  
 multis Regibus non ab humeris tantum,  
 sed toto etiam cœlo major.  
 In quo virtutum decora velut radii  
 concrevêre in illustre corpus:  
 quæ in nonnullis Regibus stellarum instar evanuerant ad solis ortum,  
 hoc est, ad lucem veritatis.  
 Et verò decuit Hungariæ horis tantum oriri solem:  
 ut tristem passa eclipsim sacra Religio,  
 velut Phœbe Phœbæo recreata vultu compleretur:  
 iisdem nempe cum eodem excepta cunis, & ad meridiem educata.  
 Utrâque enim Numinis manus liberalem impendit operam,  
 ut LADISLAUM in perfectam Principis optimi ideam efformaret.  
 Quam licet imitarentur studiosè plurimi,  
 assecuti tamen vix non nisi uno pauciores.  
 Nec mirum:  
 quia alia lineamenta admisit nunquam,  
 nisi quæ illustrior virtus superinduceret.  
 Urgentibus Regni Proceribus Regium invitus inscendit solium:  
 ut largiùs subditorum prospiceret necessitati.  
 Ut quæ supremus domina potestate prodesset infimis;  
 eandem obsequendo ut infimus, à servitute orditur.



Ita verò suscepta explevit officia, ut officeret nemini,  
prodesset omnibus, tanquam verus Patriæ Pater.

Naturæ bonitate exundans  
ceu sacro quopiam philtro usus est in omnes:  
dum beneficio, & amore omnium sibi corda devinxit.  
Inde prima ejus fama beneficiis inclaruit,  
velut facibus prælatis.

A quibus ubi vix dum populus incaluerat:  
continuo, ne egestate terra exaresceret,  
totam liberalitate Regia mundavit.

Æmula nimirum Solis Majestas, ideo cæteris eminet,  
uteò majori gloria serviat universis.

Pupillorum & viduarum causas Atrææ balance ita libravit;  
ut illam solum in pretio haberet æquus Judex,  
quam non aurum, sed æquitas inaurasset.

Si quos tamen postulante id necessitate, justitiæ ferro tetigit;  
per paucorum vulnera multorum sanitati consuluit:  
ut mala privatorum publico servirent bono.

Emortuam subditorum pietatem suâ benignitate animabat:  
quâ dum odia extinxit, communem succendit amorem.

Utrîque verò unicus è vultu radius,  
in quo Regia residebat Majestas,  
uno fixit in centro multa subditorum corda.

Urbano affatu vel maximè urbanus  
& urbanos excipiebat, & agrestes:  
ut nimirum urbes agris, & agros urbibus jungeret:  
adeoque optandâ utrorumque concordia  
harmoniam Regno conciliaret suaviorem.

Sed quàm suavis aliis, tam sibi gravis erat, & acerbus:  
etsi levissimis usus dapibus pro corpore,  
ne animam redderet graviolem.

Nazaræum faciliè dixisses:  
si assiduum, ut erat, in templo vidisses.  
Illic verò etiam accessit ad aras:  
ut se flagris in victimam cæderet pro suis.

Quibus ut semper adesset vigil,  
frequentius choro, quàm toro, incumbibat:  
musicâ frequenter etiam silente.

Ubi quanto inter orandum incendio arserit,  
flammæ testabantur, quæ Sancti corpus ambiebant.

Ab his ne membra fortè solverentur,  
aut vanâ mens gloriâ ambureretur:  
splendorem cinere sepultum pœnitentiæ,  
& carnis incentiva cilicio suppressa voluit.

Nulla porro mentis evagatio oranti obfiste-  
bat:  
nisi quæ ad cœlum raperet.

Illic autem inter negotia Regni distrahere se gaudebat,  
ut vel inde proderet, ubi thesauros condidisset.

Qui ne quid paterentur, imò ut augerentur;  
cor identidem ad Deum elevabat.

Atque adeò ut naturalem siderum cursum imitaretur;  
eo rapiebatur centro, in quo acceperat ortum.

In hoc tamen singularis, aliisque clarior stellis:  
quod procul abierit semper ab astro Veneris:  
ut procul esset à nebulis.

Martis cœlibatum communi prætulit Lucinæ  
casta castra secutus.

Et ideo ei semper candida in amplexus ruit victoria,  
Quæ Paridis recusat dextram, Martemque muliebrem abominatur.

Duplici jure cœlibis hoc esto encomium:  
ex terra cœleste fecit pomœrium castitas;  
cœlique inquilinam in terras Divinitatem traxit.

Estato certè veteri dixisset Plato Deum:  
si vidisset connubio abstinentem.

Satis autem, & plus, quàm satis, esse potest:  
quòd illecebras Cupidinis cæci Alexandrino contempserit oculo:  
imò plus, quàm Alexandrino, ne videre quidem voluerit;  
quæ amatam possent excæcare puritatem.

Aures item non fato Niobes, at arte sua duraverat in saxum;

Si quando molliores fortè Sirenum cantilenæ personabant.

Divorum sanè virtus est,

Regios inter splendores non impeti his umbris:

quibus plurimi etiam extra aulas obscurantur.

Candor iste in violam plerumque amethystinam desinebat:

quia modestà sui de millione se custodiebat:

ne inter aulæ incendia fumos pateretur;

sed in tenebris insidiarum carbunculum imitaretur.

An autem à vino, quod germinat virgines,

eam imbiberit castimonix laudem;

an à Cerere Divinissima candorem?

Inter problemata discusserint virtutis hujus amantes.

Hæc famelico rerum Divinarum, fastidium induxit terrenorum:

hæc lacteam puritatis viam purpurato præbuit Regi.

Qui nunquam satur, nisi vel in cœlo, vel de cœlo,  
pane nimirum vivo recreatus.

Unde quò plus edebat,

eò plura edebat virtutis opera.

Quo factum, ut cum etiam unus in publicum prodiret,

virtutum exercitus in ipso, quasi Duce, collectus videretur.

Auro, quod hostium in focis eripuit, patrias in auravit aras:  
pretiosis manubiis, bellique ruinis templa Deo pacis erexit.

Quantam verò in regno Dei amplitudinem pro futuro dimetiretur,  
ex latifundiis terræ, quam Sacerdotiis destinabat, metire.

Ecclesiastico Capiti quadraginta Canonorum addidit membra:  
septuaginta etiam templa, quasi totidem propugnacula, erexit:

ut tota symmetria Regni à Religione confurgeret,  
ad divinos, humanosque canones instructa.

Gladium acuit Gedeonis ad cotei virtutis, ubique constans,  
in sola honoris persecutione fugitivus.

Sed dum unam Hungariæ fugit coronam,  
in plurium devolvitur labyrinthum.

In his enim verè est labor intus  
par etiam Herculi quandòque fatigando.

Ita sui triumphans contemptu allicitur, dum despicitur honor:  
ac verò etiam calcatus calcantem elevat in sublime.

Integerrimus Rex in pretiosum trium coronarum, & pretiosam  
Dalmatiæ, Slavoniæ, & Croatiæ abiit unionem.

Neque tamen à tot purpureis livorem traxit, sed potius candorem auxit:  
quo sibi septem Electorum calculos candidabat:

ut dignus ab iis haberetur, qui fieret Romani quòque Imperii Caput.  
Usque adeo illustris tot virtutum radiis evasit frons LADISLAI;

ut eam ipsa Romana Majestas ambiverit in solum.

Sed coronam Imperii candido deprecatus animo,  
in alium transferri purpuratum cupiebat:

dum sat fuit, meritum esse id virtute;

quod non nulli quàm sævo, tam irritò Marte quærunt.

Hoc ipso tamen, imò & magis evasit honorandus:  
quòd i summum fugerit honorem quietis amatae desiderio.

Coronæ namque Regum umbræ sunt captantibus:  
ultro sequuntur fugientes, tanquam pedisequæ virtutum.

Meritò autem tantæ virtutum affluentia

cùm adnataret Imperii diadema,

appulisset forsan & Petri navicula:

Si sacer accessisset character, quem bonum publicum arcebat.

Ordinatissimus enim quò ad omnia Princeps

ad ordinem quòque sacerdotalem aspirabat.

Post Martios enim pulveres, mortis cineres mente revolvens,  
ad Divorum anhelabat pulpita, æternitatis negotia tractaturus.

His adeo solidis virtutum gradibus

lucem auxit suam usque ad perfectam diem.

Cujus serenitatem, cùm lividus Erebi oculus ferre non posset;

gravibus belli tempestatibus involvit.

Excùssa quippe aureo circulo Salomonis Fratrìs ambitio  
ferreis & annulis, & erroribus intricatur, minimè fraterna.  
Contra LADISLAUM exundante stomachatur bile Salomon,  
rhabarbarum non tam sedandæ, quàm concitandæ bili  
porrigente Cumanorum Podalyrio:  
quo incensus magis, quàm sanatus,  
flaminis frequentibus & ferro  
in visceribus Patriæ tumultuatur.

Sed rarò felicem exitum sortiuntur bella, quæ bona causa destituit.

Nam post iterata prælia desertum ab omnibus,  
inhumanum Principem ad desertum ire compulit bonus Frater:  
ut sanctiore spiritu respiraret inter bestias humanior,  
quàm spiraverat ferocior inter homines.

Copulchrus porro Regnorum helluo Hungariæ appetiit pomum:  
cujus morfu non tantùm mens, sed & dentes illi itupère.

Plerùmque enim redit in auctorem scelus.

Cuthescus item ambitione, ac furore succensus,  
obscurus Patriæ filius omnia succendebat:  
ut per flammâs offunderet fumos fuscandæ luci publicæ.  
Hujus delirio ut iret obviam purpuratus Chiron LADISLAUS,  
militari lanceola omnes ei venas incidi curat:  
ut corruptus perduellione sanguis emitteretur.

Nunquam enim exarsit LADISLAUS,  
nisi ubi hostium flammam extinguere coactus fuit.  
Tunc enim nulli pepercit victimæ, quàm DEO non litâisset:  
ferro nihil unquam persecutus, nisi quod erat ferum.  
Acus Cumanorum Dux pallidam Copulchri trabeam  
Regio LADISLAI ostro purpurare intendit:  
at vacua purpuris in Hungariæ littore conchylia reperit,  
non nisi suo, suorumque sanguine replenda.

Ad frangendam acum securi usus Persica LADISLAUS,  
hostem novo aggreditur argumento,  
Scilicet in ferio, à majore ad minus.

Securitate victoriæ à vibrata securi inchoat, adeo feliciter;  
ut una tantùm acie securis prostrato Cumanorum Principe,  
omnem hostium aciem conciderit.

In ramosum, & bardum impeggerat truncum:  
ac proinde prius utendum erat securi, quàm ense.

Jacente infra sonipedem capite,  
Cumani à pedibus captant consilium:  
& qui rem commune in acu tangere volebant,  
fractò Acu, fractas & ipsi sensere vires.

Quanto vulnere hiaverit Acus, hinc collige:  
quòd perforamene ejus integer exercitus

transierit in partes LADISLAI.

Gloriosa simul, & ingeniosa fuit hæc victoria:  
remenim acu tetigit, cum transfixit Acum.

Sed alterum ex altero bellum feritur;  
& velut herba noxia semper se propagat ampliùs.  
Belli nativum frigus armorum calore succendunt:  
in publicum erumpunt solem;

quos ad tenebras damnaverat natura.

Sed faciliè stationibus suis expulit gentem,  
quæ stare nesciebat assueta populationibus.

Dum verò prædatores Bessos in prædam gloriæ coëgit;

Pan, & Ceres in solitudine castra metabantur.

Hic ut vitâ detriumphatâ, victoriam coronent adoreis,  
vitalia militum adoriuntur seu propugnacula, seu tabernacula.

LADISLAUS interea subsistit in genibus:

ne laureata militum FORTITUDO victrici succumbat fami.

Ut quæ in solitudine hosti sub visceribus latenti resistat,  
præfidiarios vitæ succursus sollicitat orando:  
humanissimumque humanissimo Regi cœlum submittit feras.

Orpheum diceres:

qui ad suorum obsequia cervos, & bubalos induxit.

Jam verò convivantibus lautè militibus, & potus defuit:

cum novus sub Apollinenovo Pegafus

liberales ungulâ fontes propinat è vestigio.

Ita inter martis tela, & mortis falcem bis lusit vitæ aleis:

semel in arena Martis,

semel in pulvere mortis.

Meridiem victoriarum in oriente sic explicuit Græcis,

ut puniceam eorum artem aperto eluderet Marte.

Myfiam ingressus feliciter, Macedoniam reperit feliciùs.

Roxolanorum, & Ruthenorum fortunam occurrentem sibi habuit:

sed volubilem ejus rotam cum toto exercitu in præcepsegit.

Sclavones veniam à pedibus petere coëgit:

qui acephali tam acriter petebant caput.

Evagantibus Patriæ limites Tartaris præfixit terminos,

venatus palabundos ad fines Daciæ:

& qui ceu Leones funestum Regno minabantur Martem,

ut galeati lepores Mercurium pedibus prodidère:

utque fugitivi saluti propriæ consularent,

inuitata liberalitate aurum pro sanguine propinârunt.

Ne verò aureis eorundem pedicis victoria tardaretur;  
& fatuâ hâc auri luce in mortis tenebras exercitus deduceretur:

novam alchimiam è cœlo doctus LADISLAUS,

orationum flammis in lapides mutavit aurum.

felix auri decoctor !

Hanc etenim pecuniarum dilapidationem  
non vitium, sed virtutem dixeris è raris unam.

Ad hos lapides velut lydios  
probavit aurum charitatis in Patriam, ac FORTITUDINIS:

obryzumque comprobavit:

dum ab hoste barbaro suos liberavit.

Ex aurea hac semente immortalem gloriæ sibi messuit fructum;

quia post aurum non abiit,

nec speravit in pecuniæ thesauris;

sed in brachio forti fiduciam suam collocavit.

Quis non dicat aurea sub aureo Principe tuxisse secula?

Quo vivente aurum velut lutum calcabatur.

Post tot victorias, Martis calore succensus febribat exercitus:

ita, ut de plurium vita conclamatum fuisset:

nisi sanctior Æsculapius lanceâ suâ venam liquoris aperuisset;

per quam grandis militiæ animus respiravit:

dum FORTITUDO Ducis etiam robori suorum vires auxit.

Verùm cui in arena aurea illustrior auro succreverat palma,  
expertus est etiam in gelida Sarmatiæ bruma sibi succrevisse lauros:

dum astu candido candidissimus Princeps

candidis farinæ globulis

Capitolium Regni Cracoviam expugnavit.

Candidam sanè victoriam, quia sine sanguine!

Triumphanti in Polonia flammæ excitârunt Moravi,

non triumphales equidem, sed Hungariæ funestas.

Fumum hunc nec aspectare bono dignatus oculo,

excitatum incendium hostilis diluvio cruoris restinxit.

Silesiorum aquilam facilè exanimavit, dum exarmavit.

Prona enim aureas cristas galeato inclinavit aucupi.

Ab aquilarum aucupio ad venationem descendere coactus,

leonem aggressus Boëmicum,

novus Hungariæ Hercules primo congressu feliciter superavit.

Confecto autem tot victoriarum Zodiaco, Sol coronatus

ex arena Martis domum regreditur:

ut aliquam FORTITUDINI suæ quietem indulgeret.

Sed non diu quietum esse licuit laborioso Principi;

qui in coronæ peripheria centrum quietis nusquam habuit:

quia medium illic punctum erat FORTITUDO.

Rogatus absque imperio, sacre militiæ capeffit Imperium:

ampliorem nempe campum heroæ menti.

Hoc illi muneris non Romani solùm cœli planetæ,

sed etiam omnia Christianæ sphæræ sidera detulêre:

ipsūque primæ magnitudinis in terris astrum

Urbanus hoc nomine Secundus.

Ex quo non castrorum modò, sed & astrarum audiit Imperator:  
cujus FORTITUDO secunda omnia spondere videbatur.  
Sed ecce vix buccinâ classicum sacrum insonuit Mars,  
jam receptui canere jubet amara mors.

Quæ nimirum scilicet humana  
in liminibus Moraviæ adventanti occurrit Regi:  
& ne longæ expeditioni longiores innecteret moras,  
Parcarum ministerio præcidit vitæ passum.  
Sic ad Moraviæ flumina dolore oppressus exinguitur:  
qui Solymææ arcis amore succensus ardebat:  
& cùm sacri gloriam sepulchri erigere volebat,  
fato spem præcipitante,  
incidit in gloriæ sepulchrum suæ.

Ex quo tamen ipso splendorem illa concepit ampliorem:  
quia inde & apud Superos consecuta plausum.  
Neque enim illic ea, quâ de tot hostibus triumphavit victor,  
sepulta est FORTITUDO.

Imò seipsâ major, & mortem ita superavit;  
ut apertis pereandem illico portis,  
sanctiorem Palæstinâ terram ingrederetur:  
& in sublimiore Sionis Regia triumphans  
trophæa sibi statueret sempiterna.





## IN UTRUMQUE PARATUS.



Horrida tempestas, ut cernis, utrinque minatur:  
Anne etiam forti sit metuenda viro?

Armis occurrit geminis in utrūmque paratus;  
Et socios animans nil pavet iste Leo.

Si robur pietas, & Crux comitabitur ensen;  
Cordatæ manui laurea messis erit.

1000 1000 1000

# Encomium exegeticum

## Regiæ Fortitudinis.

**E** Vecti folium qui super aureum  
 Frænant legibus orbem,  
 Mundi lumina Principes,  
 Sint FORTES ANIMO. Magnanimos decet  
 Reges esse, furori  
 Sortis, qui diademata.  
 Exponunt toties. Quid juvat Herculis  
 Si vis corpus obarmet,  
 Pelidem manus imbibat ?  
 Dignum Meisenis Encelado latus  
 Mavors induat armis,  
 Si cervus fedeat sinu ?  
 Bellonæ segetes, quæ caput obtegunt,  
 Stricti fulgetra ferri,  
 Et Mavortis acinaces :  
 Arcus cum clypeis, militis agmina  
 Ferri glandibus aura  
 Horrens, signa volantia  
 Non talem stimulant tingere purpuram  
 Hostis sanguine fuso.  
 Pallet mancipium metus,  
 Si Bellona cavis cornibus intonet.  
 Pulchræ culmina laudis  
 Lentus scandere pertimet,  
 Ut Martis viridem scindat adorem.  
 Inter fulmina belli  
 Altis montibus abditas  
 Exquirat latebras, quæ caput occulat.  
 Regis pectore regnans  
 Servo digna facit timor.  
 Fortunæ furiis subjacet Imperi  
 Pomum. Regna ruinas  
 Spectant, si lepus imperet.  
 Contrà magnanimus si folium premat  
 Princeps, mente paratus  
 Firmâ plurima perpeti,

Pro charis populis; Cæsare Julio,  
 Factis non minor esse:  
 Talis dignus, ut imperet.  
 Hunc non Imperio adnata licentia  
 Fœdo turbine versat;  
 Nec laudum sitis æmula  
 Urit non licitæ fulgure gloriæ.  
 Inter mille perîcla  
 Mentis possidet aream.  
 Turbarum vacuus perpetuò suus  
 Portat fronte coronam,  
 Nec fortis metuit rotas.  
 Spargat fulmineis funera machinis;  
 Uultu semper eodem  
 Bellonæ excipiet minas.  
 Ridet, si patulis horrida rictibus  
 Iras evomat Arctos;  
 Ossæ Pelion ingerat  
 Effusus latebris Enceladi furor:  
 Belli turbo procellas  
 Volvat: rupe perennior  
 Stat **CONSTANS ANIMO.** Quem rigida arduos  
 Virtus munit ad ausus,  
 Inter strata cadavera.  
 Terrarum Domitor Dux Macedo potens  
 Hac virtute decoras  
 Tot Regum trabeas tulit,  
 Romanis Aquilis Scipio Publius  
 Sævos perculit Afros,  
 Sæpè inxistit colla Numantiæ  
 Ductor magnanimus. Sic & amabilis  
 Princeps, gloria Regum,  
 Europæ jubar inclytum,  
 Gentes edomuit **CAROLUS** efferas  
**QUINTUS**, regna triumphis  
 Ornans maxima plurimis.  
 Quàm magnis animis, discite posteri.  
 Rex quilibet gubernat,  
 Ausus magnanimos amet.  
 Hæc virtute fluunt gemineæ secula,  
 Regnum floret, & ense  
 Sævus per jugulos furor  
 Non sævit; niveis vecta jugalibus  
 Pax per compita, blandè  
 Mulcet pectora civium.

# S. LUDOVICUS REX GALLIARUM

Magnitudine animi præcellens.

**H**uctalaria Mercuri.  
Ad Principes delego.

Ludovici Franciæ Regis virtutes verè Regias Regibus refer:  
& magna consilia transegisti.  
Eccujus Ludovici?  
Sancti.

Tu Magnum quóque deprædica,  
quem nunc magnificat quàm firma, tam longa æternitas;  
non fictilibus Colossis tempus, quod labitur;  
quod fugiendo secum fugat, ac præcipitat omnia in suum chaos.

Magnum id nihil aut facit, aut patitur diuturnum;  
nisi quod æternitatem spectat:

quia & ipsum est modicum, ac breve:  
dúmque semper fluit, nunquam verè stat.

Cum tempore invidia derogat, & sæpius etiam veritas iis,  
quæ sibi infauustus arrogat sæculi fastus.

Invidia quidem dentibus rem agit iniquis;  
veritas oculis, & æquis.

Et si verò dentes excusseris invidiæ, veritate tamen vindice,  
quæ verè magna non sunt, nec diu dici magna possunt:  
dicto citiùs, & ictu sclopi, quantum vis sonent, abeunt:  
ut parvulorum bullæ, et si repræsentent orbem, momento evanescent.

Virtuti verò eminentiam suam, diminuire si velis, non potes:  
quia nec eam sibi ademeris.

Hæc SANCTI LUDOVICI prærogativa est.

Magnum, & sublime est; quidquid in eo consideres:  
Parentes, animus, gesta.

Et quia medium obtinuit animus,  
extrema quóque hoc ipso nexu majora evasêre.

Felices autem Parentes in uno Ludovico geminos genuisse videntur;  
quod pietati collactaneum, & coævum fecêre cælo.

Qua quidem sorte non tantùm binis,  
sed pluribus par, & potior unus fuit.

## Nimirum

Parentes optimi tùm primùm se natis vitam dedisse reputant ;  
cùm suos in iis mores cernunt revivuisse.

Nec solatio illis esse potest, si degenerare sinant, generasse  
Neque credunt se, ut par est, amare ; nisi DEUM illis optent amicum.

Virtutis igitur hæredem potiùs, quàm sanguinis voluere

LUDOVICUS PATER, & BLANCHA MATER :

Auctorem verò Authorum, & Majoribus majorem  
ex diphthera secretiore decrevit ipsum Numen.

Ut iis, à quibus vivendi originem traxit, & nomen,  
amplio rem cum gloria vitam redderet in virtute sua ;  
efficeretque communem ipsis cum sua perennitatem.

Certiùs enim nonnunquam in Majores ascendunt natorum merita,  
quàm descendant in posteros.

Quò autem ut ascenderunt sursum, sic descenderent etiam deorsum ;

Primum, & optimè, jactum est fundamentum in educatione :

quæ si deficiat, operam & oleum perdidit natura.

Igitur Christianissimo dignis & moribus, & literis ut imbueretur,  
instituendus traditur iis ;

quos jurata Deo Religio, cælum probavit, & virtus,

non virus infecit damnosæ Politicæ ;

non depravati sæculi mores corruperunt.

Hi, ne tacitis sese insinuarent viis in animum Sancti adolescentis,

cælestis magisterii arte fieri debuit ;

ut & primis, & reliquis annis in Innocentiæ sinu conquiesceret :

excubante ad fores mentis Pietate, ac Timore Domini.

Ubi & Spiritus veritatis, ac disciplinæ aditum omnem præclufit  
phylacteria ventilantibus vanitatis, & ambitionis Doctoribus.

Qui ut internâ corrupti tabe lilia,

vernantem tenerioris animi integritatem lædunt, vel afflatu.

Ex institutione autem tam accuratâ

& summa liceat, & optima vaticinari :

imò verò etiam completâ jam spe intueri.

Id quod primi statim anni annunciârunt :

ut fructus in flore spectaretur.

Curas enim partiri visus est in curiis, accuratione ætatem superante :

nec nisi consilio Altissimi, justitiâ, & religione arbitrâ.

Utpote qui à teneris didicit,

quod à Patre luminum ex alto doctus erat, ut filius lucis.

In Regio Capitolio ut summum ipse Caput,

memoranda fudit oracula :

quem Pallas, & Sapientia maturè erudivit,

ut velut ex tripode locutus videretur.

Neque inter ludos dubium reliquit LUDOVICUS :

ludum sibi aliquando fore

Achillis lanceam, Persei clypeum,  
scutum Hectoris, clavam Herculis.

Qui non creverat ad lyram Orphei,  
nec Sminidiridis indormierat plumis puer.

A teneris unguiculis Leonem collige, in generosos assurrecturum ausus;  
cùm Dei hostes occurrerint.

Magnum, verbo, augurare in omnibus:  
quem magnitudinis primo principio prima rudimenta dedicârunt.

Hinc ne mirare, quòd minor adhuc majora promeritus,

tarditatem, & moras annorum prævenierit indole,

& virtutis maturitate correxerit ætatis acerbitem;

spe maxima utrîque bona promittente.

Ita natus, educatûsque ad magna animus ad magna parvum extulit;  
coronæ aptavit, cordâque obtulit Regni Galliarum.

Succedit igitur merito Patri duodennis natus,

novus Atlanti Alcides.

Non premet virum orbis Franciæ, quem puer in humeros reclinavit.

Puillo corpore, jam magnis aninis, & longis manibus,

sceptro unam porrigit ornandam,

cùm plures ferulæ castigandam.

Nil territus majestatem induit,

cùm aliqui prætextam exuere verentur.

Conscendit folium solis instar,

triumphum lucis claro in ortu disponentis:

intuitu nempe suo, ceu tenebras, omne malum dissipaturus.

Mox ad Auge properaturus, ad supremam cæli, nempe polliciti, absidem.

Atque ita in majora semper sese porrexit sanctus Rex Ludovicus:

ut tanti mensuram nominis impleret.

Ut igitur cælo auspice

impavidus exerceret in alios vires, & animum,

adversum se primùm sancta exeruit odia,

in majorem Numinis amorem transitura.

Ingentes ausus ut proferret in impios, & in gentes Deo invisas,

sibi subditus, sibi severus, sibi factus est & hostis.

Vim intulit genio, in rebelles motus animadvertens.

Et sic vitia castris exuit in semetipso,

tantò felicius, quantò devotior astris.

Juventutis impetum, & nativos ad gloriæ ambitum ignes

restrinxit, non extinxit: ut fervirent aliquando ad meliora.

Angustias omnes excussit amplissimo pectore

HEROA MAGNANIMITAS

nihil non augustum in augustale illud suum immittens.

Triumphos intra domesticos limites descripsit sibi copiosos:

trophæa statuit plurima gloriosus Æmulator meliorum charismatum :  
 qui hoc modo animos, & apparatus ad ardua augere voluit :  
 nullam gloriæ non vanæ metam passurus.

Verâ nempe virtute :

quæ patinon potest, se claudi terminis, ut fabulosa.

Sic autem in Regnum animæ pacem invexit,

fui Victor, non tamen incruentus.

Ut enim tantò clariùs erubesceret purpura majestatis,

sanguinem exprimere flagris assuevit è corpore,

suus ipse sibi tyrannus :

ut aliis eò suavior esset Rex.

Neque enim ea frons LUDOVICO fuit ;

ut emendatum vellet in aliis, quod necdum in se correctum vidisset.

Melior iis esse voluit, quibus præfuit :

ut convenire sibi Regnum ostenderet.

Optimè gnarus,

malè eum imperare, qui imperat tantùm, vel qui non sibi.

Idem seipso factus inferior, non tamen minor, imò major.

Quas enim aliis, & sibi tulit leges :

ut exemplo Regio statuta firmaret ;

illudque potiùs lex videretur, quàm ipsa.

Noverat enim, malè eum præcipere, qui non priùs inciperet.

Ut tantò securiùs, æquiùsque plecteret impios,

curaret subditorum vitia,

veras Regni divitias probitatem induceret ;

potior illi cura fuit Numinis, & pietatis :

nec sæculi more sibi probro duxit, esse probum.

Cœlitibus animo junctus è cœlo animos colligebat, ratus,

vitalem esse spiritum ferventem in Superos amorem :

quo labente labatur vita, cùmque vita felicitas.

Hinc virtute desuper unitâ fortior,

expugnare in aliis impietatem aggressus

scelera ut non commisit, sic nec permisit,

vindex acerrimus pravitatis.

Aulam suam auram esse voluit,

sed quæ minimè corrupta pio mentis ad cœlum volatui serviret :

quæ aquilas, & columbas admitteret ;

noctuas & vespertiones non pateretur.

In qua favorum, & gratiarum Zephyri spirarent iis tantùm,

qui Deum spirarent, & virtutem :

adulationum Apeliotæ locus, & libertas non esset.

Ita punivit crimina,

ut irritatus potiùs, quàm iratus videretur ;

nec sponte, sed invitus in pœnas urgeri.



Amphiarai ferrum adhibuit.

Ex eadem cuspidē, quā vulnerabat, medelam attulit.  
semper tamen asperior hostibus suis, id est, Numinis;  
velut Hercules ferro & igni capitalia scelera retundebat.

Jovem imitatus,

severis exemplis in montes etiam defulminabat,  
Gigantum tumidē cælo insultantium audaciam reprimendo.

Si quam blasphema labia animæ labem inuulerant,  
cauterii pœnam iis constituit edicto quā severo, tam æquo;  
ut cautus quisque, etiam nobilior esset;

ne in horrendas eas cautes contra cælum erectas impingeret,  
deplorandum nempe naufragium conscientiae perpeffurus.

Quin obstupescere INGENTES ANIMOS LUDOVICI.

Iisdem affligi doloribus, quos infligi aliis, cupiit,  
si per id â purulenta illa atrocissimi delicti sanie Regnum perfanaret;  
ad reddendam scilicet membris puritatem paratissimus,  
cauterium ut Capiti inureretur.

En quantus Divinæ gloriæ vindex!

Non item suæ.

Pia fuit hæc sævities, rigor non exasperans.

Lenitatis spiritum non repressit illa ANIMI MAGNITUDO,  
tantò seipsâ major,

quantò remotior ab altis superbiæ, & vindictæ spiritibus.

Zelum, & discretionem attemperavit quā optimè,  
velut primas qualitates;

ex quibus coaluit felix illud Ludovici gubernium.

Manfuetudinem, atque modestiam

Fulcrum omnium regiarum virtutū, & vinculum habuit felicitatis publicæ:  
quæ labuntur, aut diffluunt, nisi eâ nixæ, nisi eâ nexæ.

Hinc pax, & communis lætitia sibi constabat securior.

Nec ubique ferire, nec ferre omnia voluit.

Rigida fuit, & fortis clementia;

clemens rigor, & fortitudo.

Securus magnitudinis suæ affectum hilarem inclinabat in omnes;  
& qui despexerat neminem, suspiciebatur ut Magnus â singulis,  
in ipsa sui demissione.

An verò suis tantum hac benignitate charissimus?

Etiam hostibus.

Senior Assassinorum Arfacidas

æmulatione, & invidiâ in Ludovicum exarsit:

eosdem sicarios, quos nuncios, misit,

& majestatis læsæ, dum lædendæ reos,

quos pacis interpretes.

Hic re probè agnitâ, dissimulatâ tamen,

eosdem remittit munerum, & oleæ bajulos,  
qui taxum feralem, & funera voluntate attulerant.

Sic regiâ munificentia dimittendo,  
strinxit amplius, dum obstrinxit animos,  
& MAGNUM silens ANIMUM demonstravit.

Eâdem ANIMI MAGNITUDE Hugonem rebellem Marchiæ Comitem  
Henrici Regis Angliæ, & Richardi fratris assistentiâ fretum  
bonâ causâ triumphante devicit;

se tamen magis:

cùm Parenti, & Filio tam facilis indulget veniam,  
quàm difficiles eam illi petituri adveniunt.

Videlicet, iram antè vicit hic Fabius Maximus, quàm Annibalem.  
Adeo nihil quidquam magnum est, nisi quod simul & placidum.

Non enim est magnus animus, quem incurvat injuria.

Minore est, etsi toto vertice supra vulgus emineat;  
cui cæca ulciscendi cupiditas caput in præcepsegit, eversâ ratione.

Ne verò minùs fortem, atque magnanimum  
debellandis patriæ, & Christianæ reipublicæ hostibus  
sefe ostenderet Rex Christianissimus;

palmis dives domesticis, clementiâ & severitate obtentis,  
exterasetiam inter gentes, & barbaros laureas quæsit:

pacem ubi Regno peperit, & securitatem,  
novam gloriæ accessione novis facere triumphis aggressus.

Martialem in eo ardorem, & flammam suspice Empyreo hausit:  
fatuos ignes, & ambitionem ne suspicare.

Dum expeditionem maximè arduam suscepisse percipis,  
Nihil concipere non sublime, non maximè dignum Rege Galliarum.

Venerare modestiam in prosperitate,  
moderamen in belli progressibus,  
fortitudinem inter adversa,  
inter desperata constantiam.

Si vanidâ victoriarum aurâ distendi felicius est,  
non fuit LUDOVICI felicibus felicioris.

Si prosterne fortunæ ictibus, & consternari pusillorum est,  
non fuit LUDOVICI Fortunæ Domini.

Illud mente persuasum habebat:

Jaëtantis id esse ingenii, & levissimi, ardore triumphandi,  
ob lauream coronam, id est, folia infructuosa,

indiscrimen, per incertos eventus certaminû, securitatem civiû præcipitare.

Hinc aliam sibi bellorum metam destinavit.

Grande latrocinium existimans,

inferre bella finitimis, & in cætera procedere;

ac populos sibi non molestos solâ regnandi cupiditate conterere.

Hinc procul à Patria, procul à finibus Christianorum, arma protrusit.

Expunxit & illud:

una, & vetus causa bellandi, Cupido Imperii, & divitiarum;  
utpote qui cum Imperii quôque Romani insignia,  
inclinante Principum affectu,  
in se transferre â Friderico Secundo potuisset;  
majore nimirum animo maluit,  
arma in Saracenos convertere, & adire Palæstinam;  
ut terram sanctam raro Principum, ac sæculorum ausu,  
non tam sibi, quàm Deo recuperaret.

Deo igitur, & cœlo fretus  
bonis ventis & avibus, freto se credit Ludovicus.

In Syriam primùm navigatur, & Cyprum.

In Societatem gloriæ Dux Burgundiæ sequitur:

occurrit Princeps Achajæ:

Rex Armeniæ suas offert, affert quæ copias:

quacunque transit Ludovicus,

fœdera junguntur fœderibus, vires viribus, pectora pectoribus.

Proceres, & Ecclesiarum Capita undique magnis animis addunt suos,  
& majores efficiunt jurejurando.

CruX & gladius in mutua sese complectuntur obsequia.

Et ita MAGNITUDO ANIMI crescit undique LUDOVICO,  
fastus tamen omnis eliditur.

Magnum non dixeris, qui non alios aut facit ipse, aut patitur magnos:  
dum nemo satis magnus est, nihil est.

Qui verò nimis Magnus esse cupit, impingit sæpius,  
& fracto capite fit minor.

Juratus igitur ad omnem belli aleam maximo præit animo:

subit Ægyptum; evertit, evertit omnia:

terrâ, marique victorem se quàm gloriosus, tam modestus circumfert;  
tanquam suorum pectora unus omnium in se reclusa præferret.

Hostiles profligat triremes, fundit Barbaros, & in fugam agit,

Damiatam occupat, Pharamiam tendit,

denuo Saracenos in Nilum præcipitat.

Hactenus feliciter omnia.

Sed hem vices!

quascum LUDOVICO DIVINA ludit PROVIDENTIA:

ut majoris offerret ansam lucri.

Pro magnitudine majestatis adest magnitudo calamitatis:

collectis repentè viribus, viribus audacior insurgit hostis,

velut Antæus â lapsu fortior,

victoribus victoriam erepturus.

Belli vertitur alea: non animus LUDOVICO.

Turbatis omnibus, copiosus Christianorum sanguis effunditur:  
non confunditur, non turbatur EXCELSIOR ANIMUS LUDOVICI.

Solitum precationum pensum persolvere incipit,  
 cum suorum manibus arma,  
 animi, animæque pectoribus excidunt:  
 quasi non inter suorum strages, & cadavera Nilo innatantia,  
 sed inter hortorum delicias, & topiaria sui securus inambulet.

Nempe, non imparatum pectus ærumnis gerit:  
 quia animo tam adversis, quàm prosperis majore.  
 Omnem fortunæ licentiam in oculis habuit semper,  
 tanquam quidquid potest facere, factura sit.

Quia verò non tam instabilem Deam, quàm DEUM fidelem observavit:  
 victorevaderet, aut victus & victus,  
 nil pensi habuit: ubi ita visum Superis.

Fugam facilem, & opportunam  
 præsens nec suasit occasio, nec animus, suus semper, & idem:  
 & si vel orbis ruina incumberet,  
 velut Atlas humeros suppositurus.

Noverat, fortes, & strenuos contra fortunam insistere spe;  
 timidos, & ignavos ad desperationem formidine properare.  
 Hinc Palladium illud scutum pectori appressit: non moveri.

Semper stabilis,  
 quia in DEO fixus.

Captivus igitur factus, non captus:  
 manus commodavit hostibus, non dedit;  
 DEO, sed soli victas obtulit.

Verùm & inter vincula libertatem servat, minimè servus.  
 Ut liberator, & servator suorum, & multorum evaderet,  
 & captivam captivus ipse deduceret captivitatem;  
 compedes iniecit amor in suos.

Hinc deterfit ignominiam vinculis  
 Regiæ, & inconcussæ mentis magnitudo:  
 & infame servi nomen oblitteravit  
 animus fortis utriusque dominus, ac magister.

Paciscitur cum Sultano LUDOVICUS:  
 fidem ab infideli mere adlaborat,  
 suo scœnore, illius jactura, etiam vitæ.

Hic enim ut malè in sortem suam oculatus videre,  
 ac spirare desiit, eneçtus à suis.

Faciles conditiones, quas iniit, sibi fecit pœnitendas, imò fatales,  
 LUDOVICO optatissimas.

Respirat hic cum suis quadringentis, quos è captivitate deducit,  
 duodena millia eliberaturus,  
 nisi à jurejurando gens perfida defecisset.

Sic est:

qui salutem suam DEO committunt,

præter opinionem è mediis emergunt periculis.

Thymus, amara licet herba, conficiendo servit melli;  
sed & fructus apiculæ dulcis est, cujus aculeus est mordax.

Habet suum & adversitas mel, suam dulcedinem;  
in quam se fortiter tolerata resolvit.

Liber igitur quinos perdurat annos in Syria Ludovicus,  
non in pace, non otiosus,  
quem ad pugnas, & labores virtus educavit.

Salutari pugnâ  
infidelium animis expugnandis intentus erat assiduè.

Nisi otium quoddam dicere velis,  
dum melior iste sylvis, saxisque trahendis Orpheus  
lusit, pulsavitque lyram inter deserta,  
ac disertus cicuravit feras verbo Divino, & rupes mollivit.

Dum castra, & urbes communiit,  
Saracenôsq; veræ religionis legibus circumscripsit.  
Vidisses ex Rege, & Duce militiæ Apostolum factum,  
fictamen, ut miles esse non desineret.

In Gallias tamen ut rediret, pietas monuit;  
ut pientissimæ Matri filiali obsequio post fata parentaret.

Interea ibi

MAGNANIMI titulum magnifici, ac munifici nomine  
non tam commutare visus, quàm augere:

quin & à suis audire meruit  
Pater, Miserator, Fundator.  
Non molles fundavit moles,  
sed se dignas, firmas, magnificas.

Dotavit cœnobia,  
erexit hospitalia,  
& utrâque proventibus auxit.

Cùmque fecisset plurima, fecisse tamen voluit videri nihil.  
Quin ut suos in Regno plausus, sua beneficia non spectaret;  
Sed exercitatum ANIMI MAGNITUDINEM ad majora denuo provocaret;  
sui ac præteritorum non oblitus,  
nec territus malis, quæ semel subierat,  
in Syriam magnis ausibus relegit iter.

Usque adeo in terram sanctam Rex sanctus aspirabat!

Regno Tunetano potitus,  
felicibus ventis, & velis ad usque Carthaginis portum victor provehitur.  
Sed eodem itinere appellit ad portum æternitatis,  
quo nullus illi magis in votis unquam fuerat.

Ubi manum Domini non ferientem, sed ad se trahentem exosculatus,  
majoribus animis, quàm quos hucusque circumtulit.  
Pestiferâ lue corripitur exercitus, & cum exercitu Dux.

Ita Sepulchrum Domini cùm videre desiderat, suum obtinet :  
& in optimo belli progressu requiescere in pace jubetur.

Obit, vel abit potius ad visionem pacis cœlestem ;  
cui hanc non novam Jerosolymam videre cœlum negaverat :  
ut novam feliciùs intueretur.

Imò non potuit non coronare citiùs assumptos ejus labores ,  
ob exantlata pericula propè innumera ,  
fortem tam variam generosè contemptam ,  
fidei, & religionis gloriam mirè propagatam.

Sic sanctæ expeditioni multùm promotæ immortuus  
magnos animos minimè sibi defuisse,  
imò etiam abundâsse docuit.

Etsi enim, quod intendere videbatur,  
non fuerit, aliud statuyente cœlo, affectus :  
affectus tamen, & ed amplius fuit,  
quod re ipsa intendebat.

Quia REGIA ANIMI MAGNITUDE adlaboravit ;  
ut Magnus Maximi Numinis cultus fieret ubique major.

I nunc Caduceator Mercuri :  
Principibus inde animos,  
ut â Divinis exorti degeneres increpent ,  
torpentes, & jacentes erigant ,  
& omnia rectè, sanctèque faciant :  
ANIMO UBIQUE MAGNO.

Hoc est, renovato LUDOVICI SANCTI exemplo pluribus imitando  
Qui promptior aggressus est ardua, quàm meditatus ;  
fortia faciliùs egit, quàm dixit ;  
virtute, & factis egregiis, nec nisi regiis.

Pium, & fortem,  
sanctum, & militem,  
magnum, & humilem.  
Virum altissimorum desideriorum,  
& factorum minimè ambitiosorum.

Verbo,  
Regem Christianissimum  
in orbis theatro sine errore ludit,  
spectaculum factus  
Deo, Angelis, & hominibus.

**Etiam**

ETIAM SIC TOLLOR IN ALTUM.



Rore favet Zephyrus, sed grandine detonat Eur9:  
Africus & Boreas nubila densa vomunt.

Concutitur tellus non unam passa ruinam :  
Abdunt se volucres, & nemora alta labant.

Major at his animus volucrum Reginam imitatur:  
Et vel sic propior fœvit adesse Jovi.





# Encomium exegeticum

## Regiæ Magnanimitatis.

**M**AGNANIMI solus famam, noménque meretur,  
 Quisquis porrectæ virtutis ad ardua flammæ  
 Altâ mente gerit; cui Jove dignior,  
 Et par Herculeis spiritibus vigor  
 Succrevit imis artubus;  
 Qui non terrores populi cor pectore magnum  
 Abripiunt, pulsantve sinum rumoribus urbes,  
 Et vulgi strepitu mobilis obviæ:  
 Dum fortes animos nescit opinio  
 Versare plebis infimæ.  
 Si Dea non stabilis funestis casibus instet,  
 Audaci constat vultu, Tritonia qualem  
 Nunquam virgo oculis Martia legerit,  
 In fax faciem Gorgone dum minax  
 Pallanta mutat e minus;  
 Aut videt ingenti mole immanem Polyphemum.  
 Nec qualis vel Lemnus erat, vel grandis Enipæus,  
 Cùm bella in Superos impia concitant,  
 Et montes tumidè montibus aggerunt,  
 Ossam tegentes Pelio:  
 Talem se contra fortunam audentior urget  
**MAGNANIMUS**, nullo fortis penetrabilis ictu.  
 Vires ille suas erigit altis,  
 Cùm diversa premunt fata periculis:  
 Ut palma crescit pondere.  
 Aurea mente quies illi, moderatio fronte  
 Excubat eventu quovis. Nihil ira, timôrve  
 Unquam præcipitant. Semper idem, suus  
 Semper. Continuat pulchra superbia  
 Faciem sereno lumine.  
 Fulmina non horret Martis genuina propago  
 Hæctoris, & juvenis Pellæi sanguine dives.  
 Nunquam debilitant horrida prælia,  
 Sed lauri uberior gloria provocat,  
 Quæ summa prodit, indolem.

Alea si bellinutet, milēsque sub armis  
 Attonitus cecidisse loco, non pellere pronus  
 Hostem, solliciti frigora pectoris,  
 Turbatāsque metu non solito fibras  
 Fateatur ore pallido;  
 Vires MAGNANIMUS DUCTOR, vitāque reducit,  
 Ac velut arcano perfundens viscera succo,  
 Exemplo revocat robur ad impetum;  
 Iras exacuit vocibus entheis,  
 Ardens Leonis ignibus.  
 Non tamen in ferrum temerarius involat æstu  
 Indomito, cæcōque ferox ruit agmine in hostem,  
 Qui se quantus agat nescius. Occupat  
 Discrimen veniens consilio prius,  
 Argo sagaci cautior.  
 Sic vinci se posse negat sapientior ausus,  
 Et certas geminat fortis prudentia palmas.  
 Nec lentè nimium, nec nimium citò  
 Affectus rapiunt MAGNANIMUM sui,  
 Moderante praxi spiritum.  
 PROPRIA REGNANTUM EST VIRTUS, HÆC NESCIA VINCI  
 VIS ANIMI, solidūque crepans mens pectore grandi.  
 Audere intrepidè non temerè, ardua,  
 Undantis populi fluctibus & sono  
 Eripere celsū verticem,  
 Principe dignus honor, quem nulla pericula frangant,  
 Nulli deiciant casus, terrōque metusque;  
 Afflictis animos qui dare noverit,  
 Ac fortis doceat vulnera, funera  
 Forti cachinnotemnere.  
 Hæc Fabios, Mariōsque dedit miracula mundo;  
 Hæc magna æternis inculpsit nomina cedris  
 Divū progenies, æmula siderum  
 Virtus, nobilitas maxima purpuræ  
 Factis triumphans inclytis.  
 Hæc pacem stabilit, conservat jura, coronas  
 Auget, & imperium solidis successibus implet.  
 Hæc solū statuas, clarāque nomina  
 Firmat Principibus; nec finit emori  
 Per fata Regum Spiritus.

# S. O L A U S R E X N O R V E G I Æ Justitiâ celebris.

**H**ic, ne temerario ad altiora saltu  
abiret in præcipitium fortunæ;  
per virtutes gradum sibi sterneris ad fastigium,  
Regium ascendit folium ea forte:  
ut in eo coronas ipse suis veriùs ornaret moribus,  
quàm ab iisdem ornaretur.  
Et verò vix fecerat initium vivendi;  
cùm illico factum est principium gaudiorum inquilinis regni:  
ut festus istis dies esset, qui natalis fuerat illi,  
& ipsis errorum tenebris obductus  
meridies illucesceret in aurora.  
Non vanis enim præsenferant auguriis;  
quòd is, cui mortalem ad tempus vitam Parentes dederant  
generando, & educando;  
subditis aliquando suis collaturus esset immortalem & ætrenam  
precando, & instituendo.  
Magnitudinis regię characteres, ut præcellens expresse-  
rat indoles, jam ex parvuli vultu circumstantes legerunt; simul & viderunt,  
in ea Symmetria naturæ Deum benigniùs collaborasse:  
eique, qui inter gentium errores natus, procul esset à Deo,  
propio-rem plura Deum bona contulisse.  
**H**inc festiva passim admurmuratione, ut Dei totus esset,  
aulam personuère voces illæ:  
mendaces sint aliis, ut frequens fert naturæ lapsus,  
frons, oculi, vultus;  
in hoc, silente etiamnum lingua, sunt veritatis oracula:  
futurum aliquando Principem,  
in, & cum quo Respublica Norvegiana  
pristinam resurrectura sit in libertatem.  
**M**agnus ergo etiam in cunis dictus est inter suos, quantumvis cæcos.  
Nec mirum: quia & oculatissimam, & maximam  
habuit gerulam, providentissimi Numinis dextram:

& vel idcirco verè dextram,  
 quòd sinistra protoplasti maledicta dexterrimo favore submovit.  
 Quando maturiorem deinde suscepit in ulnas;  
 ac verò etiam in alienas extulit oras;  
 ut peccati ab origine contracti vires  
 feliciter elideret apud extraneos:  
 & postliminio quàm candidum, tam iustum in patriam referret.  
 Abiit enim DEO Duce potiùs, quàm fortis casu, in Angliam:  
 & illic hospes peregrina inter decora  
 veram curiosius aspexit, ardentiusque dilexit fidem.  
 Quam quidem postmodum despondit sibi;  
 cum Rothomagi sacris est ablutus undis:  
 & inde magno Antistitum sacrorum, & fidei præconum comitatu stipatus  
 suis induxit regionibus.  
 Quin & ipse sibi gloriosum duxit,  
 ut ejusdem factus præco, in lucem plures affereret, ac veritatem.  
 Hos inter fuit & Asmundus Sueciæ Regis Filius:  
 quem ubi lucratus Christo,  
 ut Regius omnino Pædagogus principia docuit & regia, & meliora.  
 Ad virtutum quòque syntaxin è rudimentis evexit ita;  
 ut avitæ natalium claritati rectè facta construendo,  
 & ipse præmio se dignum supremo Agonothetæ comprobaret.  
 Tum verò etiam revocato Promethei astu,  
 quàm studiosè, tam sanctè, haustam è cælo flammam  
 torpentibus populi sui animis infudit.  
 Ut quos gelaverat in mortem exorbitans opinionum error,  
 vitalis per Christi fidem calor animaret.  
 Hæc ubi docuit erectos ad sidera tollere vultus,  
 & ad æterna mentes allexit:  
 eò primùm solliciti congestit animi curas;  
 ut rectam per leges viam edoceret.  
 Adeoque & verbo & facto strenuissimè ad laborabat;  
 ut secum sui ad Decalogi tabulas, & rudimenta sacra fidei,  
 antehac usitata scitè declinarent vitia;  
 neque sinistris unquam calibus exerrarent.  
 Atque ita supremum gubernationis suæ firmamentum statuens;  
 assiduum Numinis tuendi, colendique studium;  
 & favores Cœlitum sibi, & accolarum benevolentiam suis conciliavit,  
 ad felicitatem utrobique firmiorem.  
 Cui quidem & pondus, & alas adjecit SACRA THEMIS:  
 quæ velut majus inter astra luminare emicuit:  
 quando felix in hoc solis æmulus  
 & eundem se omnibus exhibuit;  
 & iniquitatis vel tenebras, vel spectra

æquitatis luce propulsavit.

Unde bonis quidem omnibus charus ,  
neque ulli aut gravis , aut molestus fuit :

nisi ubi vel justitia odio , vel probro virtus habebatur.

Ad illatas sibi offensas irasci nescius ,

adversus injurias Deo irrogatas acer ,

alios & ipse non agnovit hostes ; nisi quos Deus & JUSTITIA averfaretur.

Hinc ut justum timuere singuli ;

quibus ut jus & fas , ita & Numen erat contemptui.

Nec pauci ad meliora revocati sapuere ;

quibus æquitas non sapiebat vindex.

Ita eadem , quæ terrori improbis , est ornamento Regibus JUSTITIA :

timere nescia , quibus timenda sit , monstra ,

suæ facit argumentum gloriæ , quidquid obluetur virtuti.

Ad hanc se manutenendam videbatur sæpius animasse

celebri illo Plutarchi effato , experientiâ quoque comprobato :

Absque justitia principatum gerere nec Jovem quidem ipsum posse.

Neque verò ignorabat , quod divinus olim Sophorum Principilus docuerat :

æquitatem prosperitatis esse fontem ;

quo nisi res publica assiduè irrigetur ,

non tantum non florere , sed ne virere quidem possit.

Hoc JUSTITIÆ reliquis animi dotibus adhærentis tenore

etiam ultra humanarum metas virium

victoriarum cursum extendisse videbatur :

dum Danos non tam potentiâ , quàm JUSTITIA ,

adeoque non grave , sed suave sub jugum misit.

Cùm verò à Sueonum Rege , fortior longè adversario ,

consumptus quasi putaretur ;

exortus est ut Lucifer inter nebulas gloriosus :

quando ex arcto maris sinu , in quo conclusus hæserat ,

formosiore vultu emerfit :

multisque fulgidus manubis in littore Norvegiano ,

omnium bonorum applausu visus est resplenduisse.

Sed & auctus iste Splendor fuit ,

cùm pars magna hostium suæ portas urbis ipsa reclusit ,

feliciorem se , & rectè quidem , fore rata :

si tam iusto & æquo Principi

& animi regendi adyta , re fixis contumaciæ feris , panderet :

utpote majores illico , sacrationesque gazas illaturo.

Regium Gothorum Caput ad feriendâ pacis fœdera

non jam adigit armis , sed JUSTITIÆ pellexit exemplo.

Habet enim hoc regiarum hæc virtutum Regina :

ut hostes etiam suos vel sibi devinciat volentes , vel devincat nolentes.

Unde non defuere ,

qui victorias OLAI JUSTITIÆ debitas existimarent :  
quòd ea potissimum tum in Republica , tum in exercitu ejusdem  
facta rectâque perpetuò fervaretur.

Ita namque factum ,  
ut exercitus ille non quietem tantum inter suos retineret ;  
sed laureas cum eadem quòque plures ab hostibus reportaret.  
Siquidem justâ pugnare manu , est semen jacere palmarum ;  
& inire prælia , est messem earundem consummare.

lactantia fuerit militaris olim Sergii :  
ferreâ se manu tot capiti suo laureas meruisse ;  
quot hostium capita detruncâset :  
OLAI modestia JUSTITIÆ tribuere potest libramento ,  
in præliis Domini ritè peractis  
cum gloria se triumphâsse.

Nempe auream secum habuit manum ;  
quæ dum ad normam æquitatis ,  
attingit à fine ad finem fortiter , & suaviter disponit omnia ;  
totum versat , & circumplectitur orbem.

Verum unde egressa est in campum ,  
eò triumphatrix revertatur

JUSTITIA OLAI GLORIOSA.

Confectis quippe bellis , veteres resumpsit sedulus curas domi :  
ut nihil in Republica metuerent innocentes ;  
nocentes verò , ut par est , haberent etiam , quod formidarent.

Æqua etenim semper lance  
& divitum pariter & pauperum seu delicta , seu merita ponderabat ;  
asseverare solitus , tam his , quàm illis præmia deberi sua.

Ne scilicet legum texta fierent similia araneorum telis ;  
quæ muscas quidem attinere soleant , avibus ultrò cedant.

Quod equidem , si quando casus ferat ,  
ut potentioribus liceat , quodlibet ,  
cenfurâque , quæ vexat iniqua columbas , absolvat corvos ;  
certam cum legibus , ac tribunalibus ruinam  
etiam regnis imminere , non ignorabat.

Siquidem haud fallat axioma , quo monemur :  
Respublicas non tam peccatis , & hominum lapsibus collabascere ,  
quàm delinquentium impunitate.

Quia verò plurimum caput esse delictorum solet superstitio ;  
initium pœnæ sumpsit ab ariolis ,  
& horum fociis incantatoribus.

Quos , ne virus in plures possent suum , ut assolent , erivare ,  
ut pestis hæc meretur , ejecit regno omnes.

Contumaciores verò , quos apprehendit ,  
addixit flammis :

ut nempe digna ignis merces esset iis,  
qui fumos inter cineres vendidissent.

Verùm ut missa sint alia de aliis,  
certante in secum in ipso met JUSTITIAM,  
ac verò etiam victricem videamus.

Bacillum fortè tantisper immemor Ecclesiasticæ legis  
festo die nudaverat cortice OLAVS;  
qua de causa, nihil refert meminisse,  
effectu tamen certè cum primis memorando.

Monitus quippe, memoriâ legem refricante,  
• severas ejusdem neglectæ pœnas illico sumpsit;  
& in suamet ipse manu observantiam sanctè vindicavit:  
quando recisas in eadem assulas incendi voluit.

Ut nempe, quod in umbris memoriæ perpetratum fuerat,  
luculentiùs expiaretur in igne.

Ac forsàn etiam præludium hoc fuit;  
ut qui justitiam exercendo in se perfecerat,  
eandem per alienam iniquitatem tolerando  
ad merita sublevari et ampliora.

Interea nãmque per consuetas orco technas invaluit  
Proceribus quibûsdam ducibus impietas.

Quo factum, ut membra malè affecta  
periculum afferrent Capiti;

illudque cum justitia proscriptum regno vellent.

Stabat has inter procellas, & turbines iniquitatis,

inter tela, & fulmina improborum,

inter sceptri ruinas, & famæ naufragia,

inconcussa Regis magnanimi pietas;

& coronam potiùs, quàm æquitatem, dimittere parata,  
excessit in exilium non invita:

ut vel sic integra perseveraret.

Ubi & inter adversæ arietes fortunæ firmus,

ut virtutem centro stabiliret suo;

affixit IMMOBILI eam DEO;

utque perennem efficeret, IMMORTALI, ac æterno.

Et vel hac arte firmavit folium,

etiam extra regnum.

Quamvis & in id revocatus postliminio,

quia JUSTITIAM secum reduxit SUAM,


iniquis meta factus est furoris;

ut per eorum jacula DEO fieret scopus amoris.


Insurrexere in eum Dani audaciores,

Servi tum iniquitatis:

quod justitiam, ut putabant, cum justo tollerent.



Obstitit & Rex initio solers, ac fortis,  
& in arma se paravit.  
Cùm verò castra movere cæpit animosus,  
res mira, scalam videt inscendendo paratam cœlo,  
quò dum conatur eniti,  
expergefactus à legato se detractum cœlo credit,  
ac verò etiam tristis plorat.  
Neque tamen ereptum erat votis cœlum,  
quod facta sibi pridem obligârant.  
Siquidem JUSTITIÆ causâ iniquè proditus â suis,  
in prælio cecidit inter hostes.  
Imò cùm cecidit, surrexit,  
quia Martyr;  
hoc ipso nomine gloriosus.  
Felix, qui sinistra passus pro JUSTITIA,  
secundam sibi fixit fortunam  
in æternitate beata!  
Illatus huic est quarto calendas Augusti,  
hoc est, sole ASTRÆAM respiciente:  
ut vel moriens in virgineo JUSTITIÆ  
semper amata gremio requiesceret.





QUISQUE SUÛ PRÆSTET, QUISQUE SUÛ ACCIPIAT.



Id melos est auri, quod mel solet esse palato:  
Sed mentem recreat justitia una magis.  
Musica cuique suas disponit in organa partes:  
Cuique suum, ut fas est, justitia attribuit.  
Illam Phonaescus, Princeps hanc dirigit: & sic  
Concentus concors hos, aliosque beat.





# Encomium exegeticum Justitiæ Regiæ.

**S** Alve sacra Themis, clarum claræ decus aulæ:  
In qua, sereno quasi polo,  
Sidus amabile agis.

Sidus constanti semper fulgore beatum,  
Et auspicati luminis  
Omnia flore beans.

Sub radiis fortuna tuis viget inclyta regni,  
Et albicante calculo  
Signat amica dies.

Sic ventos cœlo virtus in vela secundos,  
Fovendo jura pellicit;  
Sorte regente ratim.

Sic pax alma viret, civésque in pace quieti  
Sceptri sub umbra candido  
Principem amore colunt.

Sic plures etiam plantat victoria palmas  
Adversus hostes patriæ,  
Eumenidumque faces.

Sic procul usuræ, cædes, & furta fugantur;  
Nec est rapinis, fraudibus,  
Luxuriæque locus.

Præmia virtutem lactant, & crimina poenæ  
Eliminata supprimunt:  
Integra jura virent:

Exilium vitiis indictum servat honorem  
Regno, regenti gloriam,  
Omnibus omne decus.

Annè ergo esse potest quidquam felicius aulâ,  
Ubi sceptrum versat æquitas,  
Constabilita throno?

Audax fortunæ, Superi tenor æquus amatur:  
Qui cuncta justo pondere  
Librat, is astra sapit.

Atlas imperii Princeps est, atque columna:  
Sed firma justæ Principis  
Est basis ipse Deus.

NUMINE JUSTITIÆ cunctorum corda trahuntur :

Civis ut in hostes Principis

Exerat arma sui :

Ut lex tranquillâ multis dominetur in urbe

Lustris ; amorque mutuus

Regis in obsequia

Conglomeret vires , prompto sua pensa labore

Reddens ; ut arbor limpido

Fonte rigata solet.

Sic faustis avibus Princeps velut alter Iason

Quieta tranat æquora , &

Ditior inde redit.

Dum Themis ipsa vices naucleri suscipit , alni

Argivæ habenas dirigens ,

Dispiciensque vias.

Hinc inter fluctus etiam succrescere laurus

Assolet olivæ proxima ,

Perpetuæque cedro.

Nil regni Diadema timet , nil sceptrapavescent ,

Nec sacra languet purpura ,

Regificumque decus.

Namque ubi jus fulcit regna , Augustoque refulget

IUSTITIA amata Cynthio ;

Non premit umbra jubar.

Contrà ubi subverso hoc fulcro , diadema labascit ;

Eclipsis umbræ jungitur ,

Et tenebrescit honos.

Quot non sceptramano , quot non diademata fronte

Cecidère ; dum æquilibrium

IUSTITIÆ exciderent.

Hoc lapsu nulli quidquam funestius aulæ :

Nam rectè agendi regula

Insuper ipsa cadit.

Hinc jus omne procul , immania crimina visu

Portenta superant , Herculis

Vix abolenda manu.

Iuri naturæ fieri contraria cernes ,

Adversa multa legibus ,

Plura timenda bonis.

Ergo qui regni moderatur fræna virentis ,

Periculosa huic aleæ

Subtrahat ille manus.

IUSTITIAM folio secum veneretur eodem :

Ut & coronas Principi

Servet amata suas.

# S. OSWALDUS REX ANGLIÆ

Liberalitate dives.

**N**E mirare, viator, si videas  
Masserfeldiani campi insolitam venustatem.  
Natura huc suas collegit vires,  
ut magno Regi OSWALDO magnificum adornaret Mausoleum.  
Utpote qui insolitum ejus extitit ornamentum,  
non tamen artificio naturæ,  
sed gratiæ illius limites multis gradibus transcendens.  
Verum, ne forsan anceps hæreas in campo;  
ab agri tantisper virore regressus  
ad OSWALDI decorem oculos reflecte;  
& arcanam supernæ in eo PROVIDENTIÆ vim de mirare.  
Nam ut eum triumphantem quondam Patrium attolleret in solium,  
tenerum adhuc, & imbellem ejecit in exilium.  
Sed felix exilium!  
In quo tandem ad beatam illam Patriam genuinum edidit tramitem,  
fidei orthodoxæ initiatus.  
Futurus alioquin fortè æternùm cœlesti extorris patriâ:  
si terrestri ad momentum non exulâset.  
Multum nempe est, â teneris assuescere duris;  
& heroicæ virtuti præludere,  
cùm lusus est inter crepundia,  
frangere corticem, ut nucleum esse detur.  
Proprio igitur OSWALDUS regno dejicitur,  
ut plures ei quondam, quàm Antecessorum ulli, Regiones subjiciantur.  
Bellicos inter tumultus, & hostium furias educatur:  
ut olim gloriosis Antecessoribus gloriosior ipse  
ad publicos populorum applausus educatur.  
Qua in re agnovit omnino artificem OMNIPOTENTIS dexteram:  
& gnavum se ei tradidit discipulum,  
formandum in gentium amabile prodigium.  
Eâ enim duce, adversa ultro amplexus est adminicula:  
ut res suæ prosperos fortirentur eventus.  
Agnovit verò etiam probè, non nisi gloriosos sibi

ex his principiis exitus præparari.

Viderat Ofrici, & Lanfridi superbâ depressam per nefas Angliam :  
Præceperat insuper animo non vanè, probatum se sinistris, & approbatum,  
aptari ad coronas.

Quare ut tanto par foret molimini,  
solitum jecit fundamentum profundæ & pietatis, & modestiæ :  
dum coram suis aperto in campo Supremo supplex Numini  
sefe profternit in genua :  
earundem virtutum verbo, & facto exemplum factus exercitui,  
non aliter secum triumphaturo ;  
quàm si cum ipso se demississet.  
Iacuerant Ofricus, & Lanfridus Ceadvallæ prostriti pedibus :  
quia rejectâ Christi humilitate,  
quam cum OSWALDO extorre didicerant,  
feliciores tunc in Scotia exules, quàm postmodum in patria Reges,  
perfidi deinde Deo facti, erectâque contra eum cervice ausi stare,  
fortunam ipsi suam supplantaverunt.

Stetit è contrario, dum se prostravit OSWALDUS :  
cùm salutis anchoram in cruce veneratus, poplites flexit,  
ut pedes firmis figeret in arena.

Quo facto & Navarchum se in tempestate probavit optimum,  
& Archistrategum in prælio expeditiorem.  
Idque virtute, & pio simul astu.

Namque ut elatum, & insolentiorum victoriis tyrannum,  
quem grandibus circumscriptum copiis viderat,  
& nulla sibi vi palmam eripi posse, jactantem audierat ;  
exiguâ quidem suorum manu, dextrâque tamen comprehenderet ;  
firmam sibi in humilitatis valle delegit stationem.

Non ignarus, lubricum nimis esse, incertumque gradum ;  
in quo ambitiosos collocat superbia.

Cujus pes cum tantum unus sit, quantum vis altus ;  
facili subverti solet ictu.

Quem scilicet & boni pugiles vibrare consueverunt  
genu flexi sæpius feliciorum.

Sed & Christiana docet hoc polemica :  
ut qui triumphos petit eminentiores ;  
non canat victoriam ante pugnam :  
nec temerè ; sed apud ritu, in auras mentem levet ;  
ne præcipiti ambitionis turbine dejiciatur.

Urget verò etiam, & sanctè :  
ut qui declinare lapsum velit,  
in profundo se demissionis dextræ acclinat OMNIPOTENTIS :  
quæ in imo levat, & fulminat in summo.

Huc igitur innixus & iste,

Ceadvallâ fulminato, levatus est in altum.

Sed aliàs quóque secundis avibus  
exlabyrintho non uno feliciter evolavit.

Quia Crucem Domini non minùs in corde, quàm in manibus deferabat.

Hæc illi in rebus dubiis & scutum, & anchora semper fuit.

Hanc ambobus brachiis quàm reverenter, tam confidenter arripuit:  
cùm lacerata hostium furore Northumbria ad incitas jam declinaret:

& verò etiam expertus est sospitatricem.

Hujus item viribus animatus, & auctus,  
cùm in decreto pugnae campo instar labari

eam suis ipse manibus statuisset;

amissam Patriam recuperavit;

ut erecto etiam ante certamen trophæo,

triumphum postea celebraret.

Exinde ardens alioqui rem Christianam proferendi desiderium

in eas tandem flammæ erupit;

ut munus non indignum sua crederet Majestate,

Antistiti ad populum verba facienti

interpretem assistere se Regem:

quò plures, & suaviùs Deo animas lucraretur,

Coronatus ipse in cœlis coronandas.

Non tamen animorum solùm, sed & Regnorum

visus est esse magnes:

dum quatuor linguarum gentes

in potestatem suam virtute, non vi pertraxit ita:

ut ubi Reges alios non fecùs, quàm terricula, fugerent,

ad hunc velut ad asylum convolarent.

Vim nempe nacta est admirandam sociata clementiæ **LIBERALITAS.**

Aurei est instar hami:

quo mentes humanæ capiuntur.

Emicuit hæc in **OSWALDI** & manibus, & vultu,

instar auspiciati fideris;

quocunque se circumferebat.

Optimè enim noverat,

ut libertatem, sic **LIBERALITATEM**,

bonis agnatam esse Regibus.

Utrique, ne quid unquam decederet,

id cum primis cautum voluit;

ut suis auri cupido manibus

ferrea nunquam injiceret vincula,

& veleminus imperaret:

cùm minimè sit liber,

qui servus est seu avaritiæ, seu cupiditatis.

Longè enim supra vulgus eminent,

Deoque ipsi propinquant Reges:  
 & vel maximè studio benefaciendi,  
 suâque pluribus bona communicandi.  
 Nihil namque, facundissimo Græcorum teste, ita Deo reddit similem,  
 quàm benignè facere.

Regio exciderat quondam junior Dionysius animo,  
 Parentis testimonio:  
 dum argentea sibi data nimis avidè servavit vasa.  
 An non autem vel ideo claruit Regio OSWALDUS animo,  
 quòd cum Regiis dapibus, argenteum quòque discum  
 liberali manu in frustra comminutum  
 disperfit in egenos?

Quo quidem factò admodum festivo,  
 quia paschali solennitate decorato,  
 dum Regias Christo in pauperibus dapes obtulit;  
 ad cœlestis ab illo Agni epulas commeritus est invitari.  
 Jucundissimum hoc liberalitatis Regiæ prodigium  
 Aidano Antistiti sancto fuit spectaculum:  
 magis utique delectato pietate tantâ,  
 quàm regio mensæ apparatu.

Munificentissimam igitur OSWALDI dexteram arripit,  
 osculòque cum reverentia fixo,  
 ut spiritu divino afflatus erat,  
 ita cum fiducia imperat singulari:  
 ne manus ista ullo unquam tempore putrescat.  
 Et verò imperium hoc, fuisse vaticinium,  
 eventus ipse docuit.

Siquidem illa manus annum à morte integrum pendit integra:  
 ac deinceps quòque immunis à corruptione perduravit.

Quasi jus suum exercere natura non fuisset ausa  
 in liberalissimum illud brachium;  
 quod suo in bona sua cessit juri,  
 ut ea cederent egentibus in solatium.

Vel certè ipsa docere natura voluit,  
 corrumpi non debere,  
 quod à corruptione plures præservaverat.

Quàm felix esses hoc thesauro Anglia;  
 si eodem etiam num uti nòsses!

Sed quia absconditus est oculis obtenebratis,  
 ut negligitur, sic non prodest:

imò verò etiam num prodest; quantum vis id ignores.  
 Hoc brachio non nemo dixerit, velut fulcro te sustentari:  
 ne redactâ ad incitas fidè, omnino collabaris.  
 Suspiciunt tamen hanc dexteram inter astra



non pauci è Principibûs:  
 & vel illius digito directi discunt,  
 Regiam ejusmodi Largitate in  
 venam esse auream, & semper affluentem:  
 quâ MUNIFICENTIÆ DIVINÆ dona redundant.  
 Siquidem & flumina, quas oceano immittunt undas,  
 magno fœnore recipiunt ab eodem:  
 & vel inde habent, ut semper fluant.

Expertus certè etiam in vivis est OSWALDUS:  
 quando, ne Divinam sibi clauderet manum,  
 suam aperuit suis, ubi res ferebat.

Et hac etiam arte,  
 dum Regia dona, ubi potuit, contulit;  
 Regia quóque dona, ubi non speravit, retulit:  
 quando pluribus etiam regnis est cumulatus.  
 Laudanda ne inpe usura est LIBERALITAS:  
 ubi nihil quidem petitur, multum tamen supra sortem accipitur:  
 quódque sponte datur, sponte redit.

Cùm & in aliis non sit infrequens,  
 ut qui dat sine pignore, recipiat cum fœnore.  
 Quanquam ut beatiùs est dare, quàm accipere;  
 sic, plus in sua, quàm aliena manu,  
 voluptatis habet LIBERALITAS,  
 ipsa sibi facta gazophylacium:

cui Superi monetariam sociare solent officinam.

Apostolica tamen, & hoc ipso Regiâ major,  
 fuit illa Regis hujus Munificentia:  
 quâ & linguam sociavit manui;  
 ut veram gentibus fidem,  
 fideles fidei leges,  
 & mores legibus consonantes  
 beneficentiùs impertiretur.

Hac enim sacratissimâ Largitate  
 & cœlum sibi devinxit ampliùs:  
 dum tot numismatum ad imaginem Dei reformatorum,  
 quot animarum Ecclesiæ, virtutisque addictarum,  
 & numerum & pretium æterno intulit ærario.

Ubi pietatis luce collustravit  
 Britones, Pictones, Suevos, & Anglos:  
 ut alios ne memoremus.

Quid multa?

Et harum, & aliarum, quibus ornatus erat, virtutum odorem  
 tanta passim LARGITATE Rex optimus diffudit:  
 ut exteræ etiam, & remotissimæ nationes

myrothecia inde sua replerent ;  
 & in amorem pariter , ac imitationem ejus exardescerent ;  
 quin & patronum apud , & inter Superos cuperent ,  
 magnôque cultu venerarentur.

Neque frustra.

Nam & à morte inventus est orare ,  
 in genibus , & manibus in cœlum sublevatis :  
 ut suorum se clientum ostenderet meminisse  
 liberali apud DEUM intercessione.

Sed cùm transire viator apparas ,  
 ne à liberalissimi Regis funere discedas absq̃ue munere ;  
 thesaurum , qui hoc in agro ditissimus proistat , priùs adi.  
 Postquam enim Rex hoc in campo suum pro Christo sanguinem fudit ;  
 vel thesaurum abscondit in agro suum ,  
 vel agrum ipsum convertit in thesaurum.

Pretiosa namque tinctura fuit viri tam sancti cruor :  
 qui dum ignobilem attigit glebam ,  
 in pretiosiores auro vertit gemmas.

Siquidem humo illic ad viri altitudinem egesta ,  
 tumulus factus est :

ad quem sepulchro proximi non tumulandi caderent ;  
 sed redivivi surgerent.

Nam vel pulvisculi inde assumpti adversus quosvis morbos  
 catholicum facti sunt medicamentum.

Recipe igitur & tu , si placet , ex hoc pulvere :  
 ut quot atomos , totidem feras uniones ,  
 & ægris , & afflictis in cordialia vel maximè servituros.

Interea verò pretioso hoc pulvere dives memento ,  
 in obscuriores inopiæ veteris pulveres te facillè rediturum ;  
 nisi pulvis hic in memoriam quôque tibi serviat ,  
 & colendæ , & imitandæ LIBERALITATIS.



QUI SEMINAT IN BENEDICTIONIBUS,  
DE BENEDICTIONIBUS ET METET.



Si quis Principibus, quâ cresceret aurea messis,  
Artem suggererem, gratus Apollo foret.

Munificæ tamen â Superis est indita dextræ ;  
Ut sparsum fatis hæc semen in arva docet.

Optima terra manus inopum, bene vel meritôrû:  
Summa, quæ in hanc auri spargitur, aucta redit.



# Encomium exegeticum Liberalitatis Regiæ.

**R**Ex confanguineofacram  
Fauftâ forte trahens progeniem à Jove  
Attrorum eſt melior ſatus  
Ortûſque â Superis Semi-Deus ſoli.  
Nec feliciùs hunc tamen  
Splendentes tituli, & nomina juverint,  
Ut plauſum populi ferat,  
Ac dignis ſoli laudibus emicet:  
Quàm ſi MUNIFICENTIA,  
Quæ verè Aſtricolis conſimiles facit,  
Exæquâtque hominem Jovi;  
Ejus perpetuò ſit lateri comes.  
Solo hoc Numini ſectypam  
Virtutis minio fingit imaginem;  
Uſurpâtque ſibi regens.  
Tum juſtè patrio degener haud polo  
Præſert genus, & domum, &  
Seſe aſtris perhibet ducere ſanguinem,  
Summis dignus honoribus;  
Cùm ſpargit facili divitias manu  
In claros meritis viros:  
Vel quos pauperies vexat iniquior,  
Oblatâ recreat itipe.  
Hic mos eſt Superis: cornua copię  
Dum largâ evacuant manu.  
Hoc & nobilium dextera Principum  
Seſectetur methodo æmula:  
Ut quæ multa tenet munere Numinis,  
Partem dando alios beet;  
Imò & divitias accumulet ſuas.  
Sic Saturnia ſæcula,  
Sic florens patriæ vultus, & aurea  
Campos mellis inambulât:  
Dum Nili Charites rore rigant humum.  
Hoc quondam duce Julio,  
Scauros, Æmilios, Fabricios dedit

Orbi conspicuos decus.

Nam cor MUNIFICUS vi trahit abditâ ;  
Innectitque animos fibris

Dives Mygdoniis aula favoribus.

Ut montes Rhodopœius

Sylvas, atque feras cantibus attrahit ;  
Sic Rex muneribus rapit

Incultos genio, moribus, indole ;  
Et quò vult, faciles habet.

Nôsti Musa viros, quotquot ab AUSTRIA  
Surrexere Domo, inclytos.

ANNON MUNIFICE SUAVIOR indoles  
Cunctis fecit amabiles ?

Si contrà volucrum rostra Typhoidum  
Stringas, ut radiet tibi

Auratis rutilans Lydia fontibus,  
Mensque auri ebria flumine ;

Neronis tumidi gemmea nil domus,  
Æquatúsque polo juvat  
Vertex ; cùm putrido sordeat hospite.

Cæco secula turbine,  
Incertis que equitant lustra favoniis ;

Si quando diademata  
Exfugunt populos instar hirudinum.

Námque auri litis improba,  
Quot pontus rapidis flatibus excitus  
Alvo versat arenulas ;

Tot gignit tineas nominis inclyti.  
Hinc quo non Cynico fale

Rex quondam Phrygiæ Tantaleus Midas  
Conspersus medias famem

Inter divitias, & meritò luit !  
Quid ? quòd summa pericula,

Quando auri cupidus perfurit Africus,  
Incumbunt folio ; & premunt ?


Auratum Phaëton, nempe jugalium  
Phœbi, qui premeret jubar

Lucis cœligenæ parcus ; is excuti  
Tanto dignus ab essedo.

Quare quisquis avet conspicuus face.  
Ferrilimina in utrâque

Mundi, aut cœligenam prêndere gloriam ;  
Nôrit largiùs aureo

Gangis Regnicolas flumine tingere.



# S. STEPHANUS REX HUNGARIÆ

Religione eminens , & Apostolicus.

**C**oronæne fuerit, angemma Principum,  
dubium reliquit STEPHANUS.  
Si corona Regum indigitatur gloria;  
non tam nomine, quàm re, corona fuit pretiosissima.  
Quòd si dignum meritò præmium corona dicitur,  
omnium STEPHANUS excellit meritum, præterquam suum:  
quanquam & altior se ipso.

Adeoque cæteris quidem donum fuit, sibi verò soli corona,  
quia suus ipse sibi STEPHANUS.

Jam verò si gemma coronæ decus est:

STEPHANO pretiosiore corona nulla habuit gemmam.

Donare quidem gemmam hanc ultra meritum voluit mundo cælum:  
verùm ne projiceretur ante porcos, cavit.

Et ideo sacro prius rore tingi cum consorte tori Geysam voluit:  
ut ab idolorum sordibus abluerentur;

neque immundis gemma illa manibus vel in origine fusciperetur.

Erit ergo tibi Hungaria, si pretium spectes & decorem,  
gemma STEPHANUS pretiosa:

erit Regia, si spectes gloriam, corona:  
de qua tibi plùs, quàm aureâ, gratuleris.

Quis porro factis futurus sit Stephanus,  
ex ejusdem ortu vix assequeris.

Ergo tota potiùs in occursum adornare:

ut dignè recipias, quem cælum nunciat venturum.

Nec expecta minorē Rege, quem Regius cœli genius, ut prodromus præit.

Et, si ex præcurrente cœli Principe venturum colligis Regem,  
ex præeunte Proto-martyre, nasciturum tibi, ne diffide Apostolum.

Obsequiosus certè Levita nec in cœlo sui non recordatur muneris,

APOSTOLORUM in terra dicatus obsequiis:

ut novum sibi substituatur APOSTOLUM.

Sed ignosces generose Christi testis,  
nec lapidem in te projectum verbo credes:

si quispiam fortè ambitionis reum te notare aufit;  
dum Regio huic APOSTOLO tuum imponi nomen jubes:

ut vel sic accedat etiam APOSTOLORUM numero STEPHANUS.

Verùm ne inane solùm nomen STEPHANI transfret in APOSTOLUM,  
protectorem se ei, & præceptorem Sanctus recipit esse futurum.

Ut vel sic præter nomen optimam sui partem in novellum derivet APOSTOLŪ:  
virtutem scilicet, & Apostolico plenum zelo spiritum.

Perge porro Proto-Martyr sanctissime,

Sic ad Apostolatûs infulas, imò & coronas aspirare.

Da favente cœlo multos ejusmodi mundo STEPHANOS:

qui & REGES sint, & APOSTOLI;

& utrôque nomine te imitentur.

Nihil enim hîc intercedit arrogantiae:

ubi quidquid arrogatur, pium est, & sanctum.

At quem putemus futurum sub tanto Præceptore discipulum?

Quem sub tanto Duce militem?

Exitium fanè tibi time, pernicioſa Sathanæ Synagoga,  
& quisquis hoc magistro noxia spargis per mundum dogmata.

Quando redivivus STEPHANI spiritus non solùm oris utrîque acutum,

Sed & invictum potentioris dextræ gladium arripuerit:

qui te clypeus defendet?

De bonis igitur pactis cogita: neque lapidandum amplius inermem spera:

qui fortissimi Principis assumpsit apparatus.

Alioqui tuo discas exemplo,

quàm durum sit allidi petrae

in firmamento fidei solidatae.

Imò si tua pergat se opponere duritia,

oppressa cadet lapidibus;

quos in alterum à te jactos, retorquet iste in te STEPHANUS.

APOSTOLUS cùm esset STEPHANUS certo Vaticanæ sedis testimonio,

Regem ipse se testabatur arrepto Regni gladio:

ut jura cum RELIGIONE tueretur.

Rexne verò prius, an Apostolus fuerit,

non quidem excellentiâ muneris, sed ordine temporis,

quis decidas?

utrûmque fore, nondum natus prædicitur:

vix natus utrûmque spirat:

utrûmque voce sonora cœlum denunciat:

idémque repetit vicaria in terris Echo cœli.

Ut utrûmque hoc munus unâ inditum,

unâ executioni datum,

& ipsa sui unionem majus extitisse,

quàm raro, tam claro exemplo videamus.

Certè cùm parvulum sacro unxit chrismate



APOSTOLUS earum gentium Adalbertus ;  
 & REGEM fore , & APOSTOLUM , non dubitavit.  
 Quia gratiæ utrîque suffecturæ sementem ex alto jactam vidit :  
 ac verò etiam expertus est re ipsâ ,  
 in terram optimam cecidisse.

Neque aliud eventus ipse docuit :  
 cùm regni primum clavo manum Rex optimus admovit.

Siquidem illico favente quasi vere floruit  
 Respublica , & RELIGIO.

Idque eò felicius , quòd se regendum DEO  
 Rex ipse totum tradidit :

ut firmiora scilicet essent regni fundamenta ;  
 quia summo nixa centro.

Huic ut firmius & subditi inhærent ;  
 Apostolicas omnino curas eò vertit :  
 ut per viros Apostolicos ad bolidem ,  
 quam Gisela ipsi desponsa secum tulerat ;  
 hoc est , ad rectam orthodoxæ veritatis regulam ,  
 Regnum omne dirigeretur.

Cùm enim præesse nollet , nisi etiam prodesset ;  
 primum afferre voluit suum molumentum :  
 quod si vel unum , solùmque desit ,  
 bona omnino omnia periêre.

Pulcherrimo Principibus documento :  
 non satis bene sceptrâ geri ,  
 nisi fiant indices in automato reipublicæ ;  
 quibus & animæ subditorum ad salutem dirigantur.

Utpote quas mentem nactas immortalem ,  
 adeoque notas cœlo , & natas æternitati ,  
 non minùs , imò magis , quàm corpora suorum , aut fortunas ,  
 gubernio commissas habent suo.

Curas itaque omnes deposuisse STEPHANUM diceres , velut incurium Regni ;  
 ut unam curaret RELIGIONEM :

nisi ea etiam Regnis vel maximè proficeret cura ;  
 quâ curantur negotia salutis.

Quod enim educendæ altius moli fundamentum ,  
 hoc est RELIGIO reipublicæ ;  
 quod fluctuanti voraces inter procellas navi anchora ,  
 hoc imperiis est vera Fides.

Eò majorem proinde incuriæ notam incurreris ;  
 quò sublimiorem ædificii molem struxeris , neglecto fundamento.

Ignarum te naviculariæ demonstraveris :  
 si nulla sit in alto cura anchoræ.

Optimè igitur STEPHANUS , ne imprudenter erigeret Regni solium ,



solidam substruxit basim RELIGIONIS:

in qua ut suam prius, ita suorum deinde & sortem, & salutem,  
hoc est, geminam, completamque felicitatem, confirmavit.

Idque eventu prorsus desiderato:

quando amplissimum hoc Regnum in ipsis quoque primordiis,  
ad eum evexit statum;

ut orbis delictum, populorumque desiderium, haberetur.

Florent nempe Regna, dum intacta floret RELIGIO:

eaque deflorente languent, & marcescunt.

Cujus equidem effati veritatem luce clariorem

utinam tuo Hungaria damno æque, ac aliorum exemplo Regnorum,  
non esses edocta plus, quam satis!

At enim usque adeo inculcant eam etiamnum tot, ac tantæ calamitates;

ut quibus vel has deplorare, vel illam satis commendare queas;

vix, aut ægrè reperiās calamos.

Non deerant equidem, nec defunt Reges:

qui Apostolicam STEPHANI tui pietatem imitati,

ut RELIGIONI, sic felicitati manum porrigerent sospitatricem:

si quis æger admitteret Archiatrum.

STEPHANUS igitur quemadmodum ad laboraverat,

ut sub uno DEO, & uno Rege, in una Ecclesia, & una fide,

firma staret in Regno RELIGIO:

ita proximas adjecit curas;

ut pax & concordia floreret inter suos:

alterum scilicet Regni fulcrum.

Ac proinde in primis cautum voluit;

ne vel fide, vel perfidiâ, dissidentibus inter se civibus,

ullus esset locus, vel turbis, vel seditionibus.

Verum quia aquæ multæ populi multi,

ut facilis est in oceano tempestas,

cum varii concurrunt venti;

sic & in ampliore Regno motus Bellona ciet;

dum diversi inter se genii colliduntur.

Visus autem & Deus est aperuisse campum:

in quo & meriti, & gloriæ messē legeret Rex optimus uberiores:

unde posset & aliis panem frangere, quo ad meliora alerentur.

Expertus hoc est Gyula:

cum usus est amico, quem fecerat hostem:

quando perfidiâ suâ fidem, & insolentiâ salutem,

obstetricante STEPHANO, præter spem suam sibi peperit.

Abduxerat hunc Rex victum, captumque, ceu triumphator:

sed vel hoc modo ab hostis antiqui vinculis exemit:

adeoque cum servum fecit, liberum dimisit.

Quia ad fidei lucem feliciter eruditum,

in sacram filiorum Dei libertatem asseruit.

Imò verò ut reverentiam haberet Apostolicis APOSTOLUS constitutionibus ;  
quæ in emptam à Christo libertatem assertos vinciri prohibent ;

suo eundem etiam absolvit mancipatu :

ut geminam conferret libertatem.

Felix profectò ex ipso fortunæ suæ lapsu :

qui semel captivus , bis factus est liber !

Sed & Conradus Imperator debilioribus erat oculis ;

quàm ut splendidissimum hunc solem in Hungariæ Zodiaco coruscantem  
propius posset intueri.

Crediderat is forsan , minùs eundem posse sub nubibus ;

quibus pientissima sui demissio involvebat :

atque adeò facilè , si non extingui , suppressi saltem posse.

Abjecerat equidem se STEPHANUS ad ipsos pauperum pedes

exemplo summi Regis abluendos :

unà verò etiam suis met manibus dividere sportulas ,

& stipem erogare delectabatur.

Quin , ubi certamine inter mendicos exorbitante ,

sua vidit in spoliis discerpi barbam ,

hilari dissimulavit ore :

ac verò etiam ut generosos milites coram Deipara dilaudavit.

Néque tamen ideo quidquam detrimenti passa est

vel Autoritas Regia , vel Majestas :

imò , ut clarior esse solet post nubila Phœbus ,

ad solium regressa splendore micuit ampliore.

• Siquidem non tam à throno Rex , quàm thronus à Rege ,  
ad veram gloriam inclarescit.

Quia igitur Conradus hunc æquis videre non potuit oculis ,

ut fieri solet , invidere cœpit oculo iniquiore.

Atque ne radios in alto diffunderet illustriores ,

exercitu formidando depressum ivit.

Verùm ipsa hæc eclipsis fulgorem auxit STEPHANO ,

radiis ex alto ministratis.

Patronam sibi , Regnòque delegerat , & sanctè coluerat

MAGNAM CŒLI DOMINAM ,

eandemque CASTRORUM ACIEM ORDINATAM.

Huic ergo , ut ad arma , sic ad pietatem suis Dux ,

coram exercitu suo supplex factus ,

omnem committit aleam belli.

Et ecce tam feliciter illa cadit :

ut ante prælium victoria STEPHANO faveret :

Conradi copiis hostium ne visorum quidem timore percussis ,

& ad sua sese recipientibus.

Huic Palladi adeò felici ,

in alia contraperduelles expeditione  
 sancto, ut solebat, consilio sociaverat STEPHANUS  
 clarissimos & virtute, & belli peritiâ,  
 victoriisque tum profanis, tum sacris celebres  
 binos è cœlo Archistrategos  
 MARTINUM, & GEORGIVM.

Idque eâ felicitate, ut victor esset;  
 ubi spes & salus in apice constituta videbatur.  
 Campo enim excellit nequitia non ausa comparere:  
 falsâque palâm, se STEPHANO non esse parem armato;  
 cui inermi insidias paraverat.

Quamquam & istæ inter callas periêre nuces:  
 cùm inermis etiam, somnôque sopitus excussit arma victor.  
 Siquidem quot astra nocturno, ludôque in cœlo micant,  
 tot oculis in STEPHANI salutem intentum esse Numen videbatur.

Quâm securus cubat, pro quo talis excubat Argus!  
 Sed non potuit non agere vigilas pro STEPHANO cœlum:  
 quem non nisi labores pro cœlo exantlati in ferum declinabant somnum.

Totus nempe attraxit sibi curas cœli;  
 qui curas in cœlum omnes unum dirigere solebat.  
 Verùm ad nutum quôque cœli, & Regia virtute perduellem vicit:  
 dum ferri tremulâ malevoli dextrâ excidentis ferali strepitu  
 excitatus pepercit feræ, & machinato mortem, donavit vitam.

Adeoque ut in publico sapius hostem subigendo,  
 sic in privato supplicem erigendo triumphavit.

Aliam tamen optabat victoriam ardentius,  
 precibusque in cinere, ac cilicio fufis urgebat:  
 ut favente cœlo consummatam stabiliret,  
 Rex pientissimus, & APOSTOLICUS.

Regnum, priusquàm è vivis hinc migraret,  
 ut orthodoxæ totum fidei addictum cerneret;  
 id enim verò vel maximè in votis erat.

His ut faventes pelliceret ventos;  
 viros Religiosos, & spiritu DEI plenos,  
 quos tanti Regis fama in regnum traxerat;  
 tanquam auxiliares è cœlo copias,  
 magna suscepit comitate, munificentiaque fovit.

Atque ut sedem in Regno figerent,  
 plura & templa, & cœnobîa,  
 velut præsidia RELIGIONIS,  
 magnâ auri profusione struxit.

Ne scilicet in suos minùs, quàm extraneos,  
 pro RELIGIONE pius esset, & liberalis.

Nam extra Regni quôque fines authorem colunt STEPHANUM

varia pietatis domicilia.

Tres è multis testes accipe, omni tamen exceptione majores :

Hierosolymam, Romam, Constantinopolim.

Ubi si RELIGIONIS tantæ vestigia, ut par est, venerabere :

in pia facilè erumpet affectus vota,  
quæ mediam extremis velint esse copulam :

quâ in eandem denuo fidem colligentur ;

& ex barbara malè feriata liberæ

in optima forma

Sub ROMANAM redeant CORONAM.

Verùm ut alia pientissimi Regis monumenta ne memorentur,

prætermitti certè nullo modo debent,

quæ in fastos retulit suos Ecclesia.

Archiepiscopatui nempe Strigonienfi,

Episcopatus denos junxit STEPHANUS

admirabili & RELIGIONE, & munificentia Fundator.

Verùm dum plures meditatur laudes calamus,

ubi vix dum cœpit, cursum sistere cogitur :

inopem dum copia reddit,

& medium extra medium servare jubet.

Ita quidem, ut ne nullus sit aliquando finis,

jungendus sit initio vix facto finis :

quò medium sit vel nusquam, vel utrinque.

Unum tamen adjicere fas sit verbum :

dùm STEPHANUS dicto terris vale, conticet ;

& dextrâ post mortem integrâ

RELIGIONEM loquitur.

Et si enim suavissimus corporis totius odor

& saluberrimus, qui ex eo profluxit liquor

eandem & spiraverit, & liquido probaverit ;

manus tamen, quæ illam tanta largitate,

nullòque fessa labore promovit ;

eandem sibi perpetuò servâsse visa est,

ut posteris monstrare viam possit,

quâ studium RELIGIONIS imitentur.

Imò verò etiam totus monstravit eam suo viam

in EMERICO STEPHANUS.

Quia se in illo, utpote simillimo,

& ad Religionem, ac virtutem omnem instituto,

tanquam viva scilicet effigie reliquit.

Coronam tamen Regni sacram,

ut securior ea perennaret,


non reliquit repositam in capite Filii, quantumvis digni ;

sed quò antè deposuerat, in sinu Matris :

MAGNÆ nimirum DOMINÆ.  
 Hujus in cœlos assumptæ festo,  
 die scilicet cum primis fasto,  
 albôque notanda lapillo;  
 morte faustissimâ, secutisque prodigiis clarâ,  
 non tam obiit, quàm abiit ad Superos:  
 in quorum consortio forte felicissima  
 jam fixam antea semper habuerat mentem.  
 Ut nimirum, quam eo semper ardore dilexit,  
 eâ pietate, ac Religione coluit;  
 ut nulla ipsi dies abiret sine linea,  
 quâ se ad hujus archetypi imitationem  
 non expinxerit æternitati:  
 ex ultimo quôque puncto vitæ  
 lineam ducturus infinitam,  
 Filius Matrem sequeretur,  
 & faustis inter Angelos avibus  
 assequeretur.



ALIS, ET VOCE SEQUUNTUR.



Cùm sol arridens vernantibus adfavet agris ;  
Plaudit, & assurgens laudat alaunda DEUM.  
Mox matrem totus comitatur in aëra nidus ;  
Et vocat aligerum in cantica læta chorum.  
Sic Regis pietas exemplo pertrahit Aulam  
Cum populo ; & coelo regna favente beat.





# Encomium exegeticum Regiæ Religionis.

**Q**uid juvat hostili potare cruore mucrones,  
 Perque cadaveribus  
 Horrentes campos, Martis versare quadrigas,  
 Quas comitetur honos  
 Plaudentis populi? Si sacre Numinis aræ  
 In cineres abeant,  
 Religio captiva gemat, si templa ruinis  
 Sordida perfidiæ  
 Victrici pede calcentur, si mysta verendus  
 Exilium subeat.  
 Non nomen victoris amat, cui corde gelatur  
 RELIGIONIS amor  
 Nec lauros fors fausta metit, si pectoris arcem  
 Occupet impietas.  
 Victus abit, qui victor erat, si fulminet hostes  
 Impietate Duce.  
 In cœlum, Superosque pius, qui Numinis ædes  
 Vindicat à furiis:  
 Is bello felix, & felix pace, per orbem  
 Ut jubar igne micat.  
 Hæres virtutum, Regali sanguine dignus,  
 Dignus & imperio.  
 Augustus coram populo, charusque Tonanti,  
 Qui pius in Superos  
 Quos Superi pleno cornu fudere favores,  
 In sua regna trahit.  
 Pannoniæ testor colles, fulsere trophæis,  
 Quando sacre viguit  
 RELIGIONIS honor: cingebant tempora lauris,  
 Quas manus eripuit  
 Virgineis præincta globis. Non machina prægnans  
 Fulmine flammivomo  
 Terruit Odrysiam Lunam: non bellica rauco  
 Buccina plena sono  
 Hostibus appendit timidis talaria plantis,  
 Sed pietatis amor.

Auxiliante polo, Regno victricibus armis,  
 Quas Erebus vomuit,  
 Expulit Harpyias. Quoties Mahometus & Achmet  
 Marte ferox Getico,  
 Succendit patriam, toties â Pannone victus  
 Vix pedibus rapuit  
 Vitam; qui voluit ferro pessum dare vittas  
 Pannoniæ populis.  
 Sanguine testatus proprio, non vincere posse  
 Per furias Erebi,  
 RELIGIO Syncera Deo, quæ Regna tuetur.  
 Templadicata Deo  
 Mœnia sunt Regni. Quæ dum Lernæa propago  
 Hærelis, Hungariâ  
 Connivente, solo stravit; velut agmine facto  
 Irruit omne malum.  
 Sunt fractæ lances Themidos, pietatis honores  
 Prò dolor, & facinus  
 Audax! Exitium passi. Constricta catenis  
 RELIGIO gemuit.  
 Triste chaos subiit virtus. Pharetrata libido  
 Lilia mixta rosis  
 Messuit audaci dextrâ. Stimulante furore,  
 Hostibus Odrysiis  
 Tradidit impietas regnum. Quid tristius? orbis  
 Delicium Hungaria  
 Isinarium perpeffa jugum, captiva furoris  
 Vincula sæva tulit.  
 Buda parens Regum, Belgradum compede victum  
 Sæpius indoluit,  
 Pro lætis tristes lauris crevisse cupressos.  
 Exitioque suo  
 Europam docuit, Geticos evadere, si vult  
 Victimam mœsta canes;  
 Sit veræ pietatis amans. Huic militat æther,  
 Pax oleas revehit  
 Civibus, hac dominante: rotis fortuna secundis  
 Perdita restituit;  
 Aurea sæcla fluunt, si Regia sceptrâ gubernet  
 RELIGIONIS amor.  
 Ergo DEI sit cura Duci, qui lancibus æquis  
 Dirigit imperium.  
 Hac florente, diu felix dominabitur orbi;  
 Hac pereunte cadet.

A P O D O S I S.

sIDERI

IN A V S T R I Æ , V N G A R L Æ , I M P E R I I ,  
E V R O P Æ , O R B I S Q V E S O L A T I A ,  
F O R T V N A F A V E N T E  
C O R O N A T O

oMNIa

I N G R A T I Æ D I V I N Æ ,  
A V I T Æ Q V E V I R T V T I S O R N A T V  
F E L I C I A .

Filius accrescens JOSEPH ,  
Filius accrescens :  
& decorus aspectu.

*Ex Græca septuaginta Interpretum versione :*

Filius auctus JOSEPH ,  
Filius auctus :  
desiderabilis.

*Prolepsis, & Syllepsis epigrammatica.*


**E**Rgône tot Capitum laudes capiat Caput unum?  
Bis senos numerans annos , & vix Adolescens  
Bis senosne Senes , aut saltem ætate Coronis  
Maturâ claros , completi mente tenella  
Possit , & assurgat tantos Imitator in ausus?  
Scilicet ætatem supplet , superâtque faventis  
Gratia Naturæ dotes imitata Parentum.  
Filius accrescens Patrii splendoris honore ,  
Filius accrescens Patriæ pietatis amore ,  
Nominis augmento geminum illigat incrementum :  
Ut pede Sors longo millena in millia crescat ;  
Et rectè scandat Virtus , innixa Coronæ.

RESP.

# RESPONDET IMAGO.



Rarum vidisti speculum ? Præstantius isto  
Nectibi crySTALLUS, nec mihi margo dabit.  
Margo divorum est virtus, & gloria Regum:  
Par in crySTALLO reddit imago decus.  
Hoc ubi se totum centro transfuderit uni,  
Quem cernis, vultus quàm pretiosus erit ?



# AVE LUX,

**Q**uàm Serena, tam amœna,  
quàm clara, tam chara,  
in ipsa etiam gloriæ Aurora Tuæ  
omnibus lucem amantibus  
inter lucis filios,

JOSEPHE SERENISSIME.

Si quis infensus, aut infestus invisum Te sibi putet;  
Splendores, quos volet oppressos, acuet:  
dum fervientes luci tenebras invitus imitabitur.

Atta men ipse viderit,  
futurus oculis forsan clausis acutior, quàm apertis:  
nisi opticos læserit invidia nervos,  
caligine, ut solet, offusâ menti.

Alioqui vel oblæsâ monstrabit se pupillâ cæcutire;  
vel noctuarum se nido prodiisse prodet  
in tenebras potiùs, quàm lucem.

At vel ideo fatebitur, etiam nolens,  
fulgore Te majore clarum,  
quàm ut ferre eum possit oculus non aquilinus.

Aquilinos enim obtutus in Te fixisti,  
etiam non longè digressus ab ortu:  
in quo vel ipso jam rapueras,  
non quidem vi, sed indole aquilina.

Ortus autem es nocte in diem declinante:  
dum ad vastum evigilantis aquilæ clangorem,  
festivo gallus cantui interferendo pausas Reginam reveretur;  
feralemque bubolellum abruptit fugitivus:  
ut omine auspiciatissimo

ipsa in aurora tenebris diem diceres,  
faustâque tuos luce recreares.

Hanc sibi per Te auctam falsa est Vienna,  
ante solis ortum, solem in Te ortum sibi gratulando  
in publicos effusa plausus.

Dies ille vel maximè fastus erat,  
non tantùm, quòd secundâ Tecum horâ cœperit,  
sed etiam, quia festum, sacrûmque sibi fecit ANNA,  
in cuius Te sinum deposuisse visus est JACOBUS.

Non jam Anna quondam Perenna

120  
inter commentitias veterum Deas nominata ;  
sed quæ perennat meliùs festivâ inter Superos luce ;  
quia Auroræ Solis æterni bajulæ,  
hoc est,

MATRIS DEI MATER:

adeoque ut per fulgores utriusque clara,  
sic nominis etymo feliciter expresso,  
per utriusque gratiam gratiosa:  
& vel ideo nitidiores luci Tuæ radios,  
per majorum nempe luminarium conjunctionem,  
in gratiis à FILIO per FILIAM communicandis affusura.

Néque verò vano casu responditea festo feria,  
quæ nomen est à Marte nacta.

Hâc enim & Ungarica deinde corona Te ornavit,  
& Romana electum invitavit :

ut confirmato quasi præfagio licuerit vaticinari,  
in Te, & à Te maritandum quoque  
Martialem spiritum virtuti gloriosæ.

Hic ut animos nancisceretur pares,  
solè Leone, quem triduo antè fuerat ingressus,  
igniculos indoli communicavit aciores ;  
qui congenitam fortitudinem ad majora animarent.

Concurrere verò etiam illustriora  
cum leonis astro Sidera

Leonis & ipsa nomen nomine complexa suo,  
virtutem autem animo longè supergressa,

LEOPOLDUS & ELEONORA

PARENTES AUGUSTISSIMI,

Ut nempe trino undique perfectio,  
major, ac melior Trismegistus  
in stella quàm bona, tam gloriosa natus,  
feliciter tuis affulgeres in stella semper bona.

Ne porro quidquam desiderari posset,  
complevit omen mensis Julius ;  
& quidem à denis jam diebus declinans in Augustum ;  
Cæsareus nempe Cæsareo, Jovialis fortunato  
dextram porrigens.

Ut nativitatis Tuæ schema  
geminos complecteretur Cæsares,  
alterum bello, alterum pace gloriosum,  
utrumque gestis maximum :

binosque menses præ cæteris eximios, & faustos.  
Siquidem Julius tutelâ Jovis illustrior, & jucundior olim,  
Augustus favore singulari Fortunæ Romanis erat felicior :



utérque TIBI , & per TE tuis optatissimus.  
 Ut in spem victoriarum , ac triumphorum  
 gloriosæ paci , & felicitati præudentium  
 ipsum TE cœlum dedisse ,  
 natura edidisse videatur.

Et verò etiam de tempore id erat , & ad rem opportunum :

quando ea ipsa , funesta nempe tempora ,  
 quibus Pythonem parturiebat novum perduellio ,  
 postulare novum visa sunt Apollinem ;  
 qui Paternâ fractum potentiâ monstrum ,  
 spiculis demum suis omnino interimeret.

Cepisti in hunc , & alios hostes arma primùm ,  
 cùm primo ætatis flore factus eques ,  
 pretioso velleris aurei nexu ,

TORQUATUS ILLUSTRIOR ,  
 integritati fortitudinem copulâsti.

Idque auspiciatissimâ illâ die ,


quâ veterum Rex Romanorum Tullus Hetruscos triumphavit ,  
 expugnatâque Indiæ Metropolis Lusitanorum Regi cecidit ;  
 sanctus autem Faustus cum sexaginta , & sexcentis commilitonibus  
 feliciter Arium superavit.

Ut si ve in Madianitas moventem castra Gedeonem ,  
 si ve Jasonem in Colchos vela facientem ,  
 ambos nimirum à vellere memorandos ,  
 conatibus gloriosis imitère ;  
 inde rore recreatus , hinc auro animatus ,  
 faustis triumphes avibus.

Quidni & ovibus cum vellere recipiendis ,  
 & armentis in propria reducendis ,  
 ex infamis Polyphemi , immanisque Caci manibùs ?

Ita triumphis adjicietur & ovatio.

Quinto deinde idus Decembres ,  
 quo Austriæ gubernaculis primam admovit feliciter manum  
 Augustissimus Parens LEOPOLDUS ;  
 quo Sigismundus Imperator clarissimus  
 est summa spe in lucem editus ;  
 quo Philippus tertius Hispaniarum Rex  
 omnes è regnis suis exegit Mauros ;  
 quo Carolum Burgundiæ Ducem Austriaci  
 glorioso Marte devicerunt :  
 inter faustas populi acclamationes ,  
 omniumque bonorum applausus  
 sacrâ Ungariæ coronâ es ornatus ,  
 & in Regem hæreditarium inauguratus.



Eâ utique spe, fore,  
ut, quam adiisti Sanctorum hæreditatem Regum,  
eoi undem & favore, & imitatione recuperes.

Quartâ demum & vicesimâ Januarii  
quâ Sementinæ quondam feriæ indicebantur  
fausto sementis omine;

Janus TIBI aperuit januam Imperii Romani:  
ut & bello; & pace memorandus,  
sed & Josephi in Ægypto clari felix imitator,  
pluribus, & amplioribus quóque Regionibus  
optatam revehas alimentorum ubertatem.

Cujusequidem visus est spem obsignâsse  
coronâ deinde TUA POLYCARPUS.

Unum est, quod hîc miremur.

Quâm & altâ est, & ampla simul hæc janua,  
tam difficile est, ut quis ingrediatur,  
nisi maximus.

Nonnulli etiam superiores Paribus,  
maiores Grandibus, & Primatibus anteriores,  
damno id experti suo:

quando magnitudine multis artibus amplificatâ,  
vel ruptis visceribus, vel fractis viribus,  
vel certè impacto superum in limen capite,  
ingressum temerè tentatum doliuere.

Tu, etsi nunquam parvus, imò à cunis maximus esses,  
Ingressus es eandem parvulus,  
quia duodennis:

dum duplo & staturâ, & ætate majores  
nec vi, nec arte possent:

quantumvis clavibus & ferreis, & aureis adniterentur.

Summum igitur aliquid, imò nihil non summum,  
quin & omnia compendio maxima  
in tam tenera & corporis, & ætatis habitudine,  
necesse erat, ut viderent, qui præerant,

Custodes januæ supremi:

ut concordibus omnino suffragiis

TE non tam immitterent, quàm introducerent;  
ingressoque læti gratularentur.

Ita enim verò ingentis peripheriæ centrum

sacræ etiam IMPERII ROMANI coronæ

sacrum feliciter supposuisti caput:

ut ingentes etiam tum vires animi demonstrares;

& specimina minimè dubia dares,

AUGUSTISSIMO TE PARENTI

non tantùm inter varias armorum curas,  
 ut Ascanium Æneæ suum,  
 quàm parvo, tam alacri passu accessurum;  
 sed etiam fixum orbis Imperialis onus gestanti  
 Herois ausibus, & faustâ sorte,  
 ut Herculem Atlanti successurum.

Septimus fuit ille dies ante Februarii calendas:  
 quo orientalis quondam Imperii scepro admotus  
 LEO MARTIANI FILIUS.

Unde qui aliquem sanguinis Tui rivum dimanâsse putant,  
 non sine Numine Divûm possunt augurari;  
 eodem denuo in mare redituro,  
 virorem juri suum, & florem spei fore

AD CORONAS ORIENTIS.

At enim quo fato ab Oriente tùm, & Occidente  
 offusa Serenitati Tuæ nubila?

quid sibi voluêre & nebulæ, & pluviæ de cœlo  
 in splendoribus inaugurationis Tuæ?

Fausta, ut spes persuadet, omnia.

Aquæ prægnantibus excussæ nubibus  
 ad extinguenda, quæ grassabantur, incendia venêre,  
 & irrigandam Imperii felicitatem.

Tempestas illa Martialis, & infesta  
 per iridem in sinu Tuo oriundam  
 prænunciare visa est,

Phœbum post nubila Sereniorum.

Dies erat Jovis imitandi Regibus:

ut inter fulmina sint, & ventos firmi,  
 in procella qualibet, acturbine Sereni.

Talem verò etiam Te à Sole animatus Tuo præstitisti;  
 quando frementibus nec quicquam inimicis,

eXorlebarls Inter fortVnæ aDVerfæ nebVLas  
 qVasl steLLa MatVtlna.

Talem Te communicato gloriæ splendore major  
 dulcissimæ exhibuisti Patriæ;

quando inter gratiosa Serenitatis auctæ parelia  
 AVgVsta reDVX

VlennaM soLennl IntroItV reCreâstl.

Hucusque duodecimum ætatis annum egisti, nec totum exegisti:

JOSEPHUM tamen & gratiosum in polymita,

& gloriosum in purpura,

adeò feliciter egisti:

ut in plurimis magnâ laude sis æmulatus;

in non paucis etiam supergressus.

Hic si etiamnum vivus in terris TE videret,  
 & sibi in TE, & TIBI in se gratularetur.  
 Certè si pugillo tanta comprehendisti,  
 quid facturuses integrâ & apertâ manu?  
 Exiguâ ætatis tenellæ periodo  
 magnam orbis partem circumscripsisti:  
 quousque se extendet integra vitæ sphaera?  
 Mirandum quid, & singulare!  
 Ruborem id eliciat æmulis, & inimicis:  
 candorem augeat & solatia candidè addictis:  
 juncto autem in RUBRO simul, & ALBO, quia Tuo,  
 Sortem spondeat secundam PRIMO  
 ad tanta favore Superûm elevato.  
 Prima annorum ne completorum quidem duodena  
 Regnorum TE duodenorum exhibet CAPUT:  
 & quidem tale Caput, quod capere possit unum plura,  
 quàm plura, quantumvis magna, ceperint.  
 Cùm autem una adeò recreet nos duodena;  
 complures TIBI in ætatem feram optantibus  
 quid dabit altera? tertia? quarta? quinta?  
 Boni Superi bona vota secudent!  
 Quidni autem secudent?  
 Quando secunda in omnia concurrunt omnia;  
 quæ acceptissimum TE reddunt Superis,  
 quorum beneficio ea accepisti:  
 Origo, indoles, temperamentum, educatio,  
 insignia naturæ, gratiæque dona.  
 Hæc enim pleno quasi alveo exundant  
 in florentem primo vere virtutem.  
 Quæ ut est pupilla Superûm,  
 sic maximè est illis curæ, & in oculis.  
 Virtutum certè Regiarum duodena  
 ut quotidianum TIBI; & jucundissimum est spectaculum,  
 in AUGUSTISSIMO AUGUSTISSIMORUM PARENTUM vultu;  
 ita velut in speculo, & imagine relucet in TE:  
 qui & speculum, & imago es illorum viva.  
 Multorum illi tum domesticorum, tum extraneorum  
 præclarissima Regum ornamenta  
 ut animo ad summa nato sunt complexi;  
 sic in TE feliciter transfusa perficiunt;  
 perficièntque magis & exemplo, & institutione.  
 Inde, ut videmus, reciprocis emicant radiis  
 clementia justitiæ illigata,  
 ingenuus animi candor in prudentiæ sinu requiescens,

magnificentia, modestiâque liberalitati sociatæ,  
constantia fortitudinis, & magnanimitatis amplexibus innixa,  
temperantia denique comes Religioni,  
firmissimo & pulcherrimo inter se nexu.

Quo equidem, ut lucida solet area sidus,  
illustri Te circulo ambire ambiunt,  
& ambiunt:

ut choros in plausum ducturæ videantur.  
Atque adeo ut annorum & regnorum, quâ flores,  
duodenæ respondent,

velut pretiosi in Pontificia quondam veste lapilli:  
ita sunt, & erunt, faventibus TIBI Superis,  
intotidem coronas, annulos, & gemmas;  
quarum ornatu conspicuus, & venerandus eris orbi,  
pretiosus autem, gratiosusque cœlo:  
adeoque concurrentibus utrinque suffragiis,  
in tempore, & æternitate gloriosus.

Jam verò cum Paterna transieris in vestigia,  
quis respondebit flori tam pulchro fructus?  
quæ suis expressa coloribus figura iconismo?  
Optatissima videtur omnia spondere cœli diphthera.

Quod videndum se nunc offert in speculo  
perspicuis crysalli visceribus eruto;  
incisum tum apparebit adamanti, quàm pellucido, tam robusto:  
quod modo emicat in umbra, opaca scilicet & amœna;  
in sole radiabit quàm aperto, tam illustri:  
quod in polymita fuit amabile, per picturas, & figuras;  
spectabile fiet in paludamento virtute, & majestate exornato.

Suspicietis in sagou ut CAROLUS;  
qui, cum quintus esset, quingentis plures commeritus est laudes:  
in toga ut FERDINANDUS;

qui, cum secundus esset, nulli secundus fuit:  
compendio utrinque facto, ut LEOPOLDUS in utrôque MAGNUS.

Gratulabuntur proinde TIBI, & sibi Regiones  
sub gratiosa coronarum TUARUM umbra lætiores,  
quia securiores, & feliciores;

inter mutuos olearum & laurorum amplexus,  
eodem vectas effedo Victoriâ, & Pacem:  
& in gremio ambarum candido faventem vultu,  
virtutisque Tuæ publica spondentem vota Fortunam.

Venerabuntur Te in sinu Famæ præfulgentem,  
in throno Gloriæ præpotentem,  
in fastigio dica posteriorum summo consiliis eminentem.  
Deprædicabunt amicis amabilem, terribilemque inimicis,

benignum tuis , benevolum alienis ;  
 felicibus faventem , miseris miserentem ,  
 egenis liberalem , bene meritis munificum ,  
 errantibus clementem , rectè agentibus gratificantem ,  
 omnibus æquum , & nulli non amandum ,  
 quàm pium denique , tam charum DEO.

Hoc est , JOSEPHUM virtute non minùs Regiâ ,  
 quàm felicitate , felicissimè ACCRESCENTEM.

Atque ita demum Serenitate TUA ubique diffusâ ,  
 dies illucescent omnibus amœni ,  
 aureâque fluent sæcula.

Suavissima verò etiam virtutum TUARUM harmonia  
 plurimorum demulcebit , & lucrabitur affectus.


Et , nequa desit , vel inter nemora , ac rupes Echo ;  
 festiva Inter gaVDia , VotâqVe fortVnata

Cantabit oMnis popVLVs

affectum TIBI syncerè devotorum secuturus :

VIVat reX JOSEPHVs Dles Canos :


VIgeat , fLoreat , trIVMphet.



Prin<sup>2</sup>

PRINCEPS amoeno de Charitum sinu  
 Ascendat, nido gloriæ in effedo  
 Dignus ad astra vehi?  
 Hic est millenis unus dignissimus Argis  
 JOSEPHUS Argus Imperi.  
 Quem sceptris genitum sceptris capessere  
 Voluere fortis ARBITRI;  
 Dum prima floret ætas,  
 Congenitusque decor.  
 Hic, velut PRINCEPS VETERIS CANOPI  
 Gratiâ fratres superavit omnes,  
 Quando præstanti radians amictu  
 Mente virtutem niveâ fovebat;  
 Inter juvenes eminet unus.  
 Per arva quale floridos inter patres,  
 Majale veris quando concilium sedet,  
 Stat altiore vertice,  
 Frontemque Phœbes æmulam,  
 Ceu lacteam propinat  
 Liliu casti soboles amoris.  
 Huic alma virtus intimis hæret fibris,  
 Et summa quæque spondet,  
 Favente cœli gratia:  
 Quando AUSTRIACÆ nidulo ALAUDÆ  
 Infidens, pullos fociare pullis  
 Gaudet, & junctis animare pennis.  
 Ut prævolantem per Jovis atria  
 Sequantur Aquilam, & alitum ducant chorum  
 Ad superna se levantem;  
 Odasque lætas intonent.  
 Quod virtus voluit, præstitit indoles,  
 Et auspicato fidere  
 Præmia sueta tulit.  
 Dum vox ALAUDÆ suavis in aëra  
 Sua mella sparfit;  
 Labitur ex alto celeri Jovis Armiger alâ,  
 Et nido se immittit ALAUDÆ,  
 Unanimemque fovet.  
 Jam stipate sacris Phœbe Sororibus,  
 Cortinas aperi: & quæ tibi Diphthera  
 Summi Tonantis credidit,  
 Arcana pande.  
 Et ecce Numen annuit,  
 Nec vano tumidi, ludimur omine!





Dum responsa parat Pieridum Domus,  
AUSTRIACÆque favet.

Jam sacra panduntur bifidi penetralia montis:  
Præfagi cæco Tripodes versantur in antro: &  
Auribus arcanos immurmurat aura fufurros,  
Fatidicumque melos:

PRINCEPS AUSTRIACI GLORIA SANGUINIS,  
Præstans ingenio, moribus, indole,  
Integer vitæ, scelerisque purus,  
Flore virtutum viridi decorus,  
Clara MAJORUM generosus acta  
Grandi laude sequetur.

Huic & eburnas Fama curules  
Apparat almæ Sortis in Aula:  
Unde per extremas Europæ devehat oras,  
Laudesque vulget orbi.

Huic palmas, Laurisque suis Victoria in hortis  
Ingenti plantat numero, veteresque corollas  
Illigat arte novâ, caput armatura coruscum.  
Jamque per umbrosas designat grandia colles  
Robora cum fagis, ulmisque virentibus; unde  
Brachia decussit non servitura trophæis,  
Quæ statuenda videt.

Interea plures acuit sibi Mars piter enses,  
Cumque globis tormenta parat, quæis fulminet hostes,  
Et fausto possit sonitu memorare triumphos.

Sed & Pax placidis vecta jugalibus  
Hortos Hesperidum lustrat, & atria  
Formosæ Zephyritidos.

Ut cum sub umbra Pieriæ arboris  
Ornata prædis arma quieverint;

Arrideant victoribus  
Festiva florum gaudia.

Hæc ubi dicta dedit, diffunditur intima rupes  
Parnassi, & firmant voces ostenta faventes.

Undarum Domitor, quæ sua Bosporus  
Thracum Metropoli brachia porrigit,  
Vectus albicante conchâ  
Per quieti terga Ponti  
Visitabat littora.

Hippocampis insidentes  
Ister, Hebrus, Nessus, Arfus,  
Et Sodales his propinqui  
Ponè Patrem cinxerant.

Cùm subito GENIUS RUBRIS vestitus & ALBIS,  
 Gemmatâmq; CRUCEM vibrans,  
 Quâ Sævum complectitur Ister,  
 Nicopolimque vehit,  
 Se patulo demittit Olympo,  
 Augustâque in luce refulget.  
 Atque ubi Tauruni super arcem  
 Ter geminos pennâ signâsset in æthere gyros,  
 Mœnia Byzanti plaudentibus involat alis;  
 Ac summæ fastigia turris,  
 Quâ celeberrima visitur ædes,  
 Ter circumvolitans, affixæ cornua Lunæ  
 Dejicit in terram, substituitque CRUCEM.  
 Cærulei stupuere Patres.  
 At postquam exposuit Summi decreta Tonantis  
 Jupiter æquoreus, mox toti in gaudia versi  
 Exiliunt, plaudunt, & lætis vocibus implent  
 Auroræ Thetidisque domos.  
 Nec mora: Pannoniæ residens in montibus Echo  
 Audiit, & variis geminans responsa figuris  
 Excivit patrias festiva in cantica Nymphas,  
 Mœnaliósque Deos.  
 Læto cum fociis exiliunt pede, &  
 Juncto choreis jubilo,  
 Grandi pulsant rura cothurno.  
 Plenâ etiam Cereribuccâ corridet Jacchus,  
 Rhamnusiæque cornu  
 Ambo beantes copiam  
 Dant sua nexis munera dextris.  
 Tùm rima patuit tenuis ad sacri sacra  
 viscera montis:  
 Ostenditque AQUILÆ PULLUM, qui cum SENIORE  
 Sacræ virentis insidens lauri comæ  
 Prata circum liliata  
 Clangore læto personat,  
 Dona perque odora Floræ  
 Se volando recreat.  
 Jam plura videre vetabant,  
 Plurima, quæ circum sese ostendere trophæa  
 Claris decora manubiis,  
 Inter Nyctæridum probra volantium.  
 Ast & cum plausu siluere oracula; quando  
 Mœonides pleno concinuere choro:  
 Io secundis perge volucribus

INSIGNE GERMEN AUSTRIÆ!

Perge, perge GEMMA MUNDI,

Perge SIDUS IMPERI.

Roftra fcande, vela pande,

Flantibus Favoniis,

Per decoræ fluftra Floræ

In favorum patriam.

Scande clivum fronde vivum,

Quam mereris, laureâ:

Scande bellis alta ftellis

Sorte vectus aureâ.

Quò tua TE Fortuna vocat: quò gratia Summi

Numinis alma præit, fequiturq; DOMESTICA VIRTUS:

AD AVITI CULMEN HONORIS.

Quò TIBI MAJORUM callem veftigia monftant,

Quos Hyperionios ultra, nitidæque meatus

Dictynnæ, ad Superos virtus auriga Penates

Vexit, & æthereos juffit fupplere pyropos.

His ducibus gradere, & feros fervatus in annos

Paterna faufto fceptra concurfu tenens

Solare terras Imperî.

Perge felix laureato,

Candidoque Sidere:

Perge grefsu gloriofo

Colligens adoreas.

Quas amicæ Gratix,

Quas paravit indoles,

Stirpsque, DOMUSque TIBI.

In TE Minervæ germina frondeant,

Et centum geminis ditia frugibus

Hesperii fuperent viridaria mali.

In TE vireta Patriæ

Felicitatis aureo

Flore nitefcant.

In TE facra Themis

Pietasque fuam fecura ferat

Fidemque, fpemque, nullis

Præcipitanda dolis.

Vive læto femper axe:

Vive sæcla Neftoris.

Melle pota, lacte lota

Sors favore nutriat:

Ut SECUNDET, ac abundet

Gratiarum copia.

Quæ TE PATERNIS dotibus deum parem  
 Et beatum, & gloriosum  
 Mille in auret laudibus.  
 Dum tandem meliore sorte raptum  
 Hisce castris, reddat astris  
 Culta puro corde Virtus,  
 Accinente Gratia.  
 Divûmque ad subsellia Regum  
 Stellatis vectura quadrigis  
 Clarum perpetuis ornet honoribus;  
 Et cum fausto Superûm plausu  
 Regno refulgentem beato  
 Æternâ decoret coronâ.

F I N I S  
 PRINCIPIVM SIT SINE FINE  
 AD NOVAS  
 IN FVTVRA FAVSTA  
 GRATVLATIONES.

